

Дагъусттаннал адабият

16+

ISSN 0235-0165

ЦӀубарз

Адабиятрал ва жяматийсса политикалул журнал

100
1921 · 2021
ДАССР

1/2021

январь - февраль



**Барча улай буру Дагъусттан республикалул
хъунама С.А. МЕЛИКОВ цIусса шинащал!**

ЧIа тIий буру ванан цIусса шинаву тIайлабацIу!

Цубарз

Адабиятрал ва жяматийсса политикалул журнал
Литературно-художественный и общественно-политический
журнал

КIива зуруй цал буккайссар

Периодичность - раз в 2 месяца

Учредитель:
Министерство информатизации,
связи и массовых коммуникаций
Республики Дагестан

Журнал основан в 1952 году

1/2021
январь - февраль

Государственное
бюджетное учреждение
Республики Дагестан
“Редакция республиканских лите-
ратурных журналов “Соколенок”
и “Литературный Дагестан”

КАЯЛУВЧИ - ХЪУНАМА РЕДАКТОР

**Мурад МахIаммадович
АхIмадов**

ЖЯМАТИЙССА СОВЕТ:

Советрал хъунимий:

К. Давдиев

С. Илиясов

Аь. АькIиева

З. АьбдурахIманова

И. Къаяев

Кь. КъурбанмахIаммадов

Р. Муслимов

Х. РахIимов

А. ХIажиев

А. МахIаммадов

Д. Магъдиев

Ш. Шалласуев

РЕДКОЛЛЕГИЯ:

Хх. Аминова

Э. Аьбдуллаев

А. Аьбдуллаева

Р. Башаев

М. Давыдов

Х. Ильясов (*редактор*)

С. Къасумов

А. Кукуева

К. Мазаев

И. МахIаммадов

С. Мусаев

И. Саидова

Сс. Увайсов

С. ХIажиева

Электронный адрес редакции:
litdag@mail.ru

XI. Муркъелинский. Саэд.....	3
Xx. Аминова. Дагъусттаннал автономиялун 100 шин шаврин: Саэд Габиев.....	5

ПОЭЗИЯ

И.-Х. Къурбанаьлиев. Умуд.....	10
---------------------------------------	-----------

ТАРЖУМА БУВМИЙННУВА

XI. Юсуфи. Тарихран ккавкссар... Таржума М. Аьлиевлул.....	13
---	-----------

ТАРИХРАЛ ХХУТТАРДИВА

А. Хусайнаев. ШавкӀуллал ХӀадислуя дакӀнийхтунусса махъ.....	15
М. Аьлилов. СумматӀлив хъуна хъусса щайх Вали-Аьбдуллагълуя тгунма бавмур.....	25
Аь. Магъдиев. Социализмалийн бувксса шиннардийсса Ккурккул.....	28

ПОЭЗИЯ

М. Давыдов. КъюкӀливасса чу.....	39
Б. Гъазиева. Ва щар щил диявав?.....	47
ЧчитӀгал Эся. Халкъуннал зумуну.....	53
А. ХӀажиев. Танка.....	55
К. Мазаев. ГъангъаратӀи.....	58

ПРОЗА

Х. Илиясов. Аьли ва Мариян. <i>Хавар</i>.....	59
XI. Хусайнов. Шяравун хъин хъанан. <i>Хавар</i>.....	65

ДРАМАТУРГИЯ

С. ХӀажиева. Сsigъа.....	69
---------------------------------	-----------

ПУБЛИЦИСТИКА

М. Раджабова. С. Оь. Азувлуцалсса ихтилат.....	72
---	-----------

КРИТИКА ВА БИБЛИОГРАФИЯ

С. Къасумов. Абачара Хусайнаевлул творчестволия урчӀва-ацӀва махъ.....	76
---	-----------

Регистрационный номер: серия ПИ №ТУ05-00410
выдан Управлением Роскомнадзора по Республике Дагестан от 22.04. 2019 г.

Новолуние №1

январь - февраль

На лакском языке

Выход в свет 1.03.2020 г.

Тираж 435 экз

Печать офсетная. Бумага офсетная

Формат 70x108 1/16

Усл. печ. л. 8,4. Усл. изд. л. 8,7

Заказ № 822

Цена свободная.

Типография: ООО «Издательство «Феникс - пресс»

Адрес типографии: 367018, РД, г. Махачкала, пр-т Петра I, 61

Редакция и издатель: Государственное бюджетное учреждение Республики Дагестан

“Редакция республиканских литературных журналов

“Соколенок” и “Литературный Дагестан”.

Адрес редакции и издателя: 367000, РД, г. Махачкала, ул. Даниялова, д. 55.

Муркбилинахъал ХІАЖИ

САЭД

*ПаччахІнал зулмулул, залимнал ххяппул,
Чувин бувну бивкІсса зунттал захІматкаш,
Цаннаца личин бан, чаннайн буккан бан,
Бувссар ина захІмат, жан пида дурну.*

*Ина ия зунттал халкъуннал бакІчи,
Мийннал цІаний цІавицІлай, цІаравун ххяхлай,
Ачайва, тур дурккун, ятІул ттугъчину,
Ина ия зунттал цІадурк шагъбарзу,
Виричу цІанихсса, цІу куна, лавхъсса.*



*Вил дакI дия чаннан, чурхгу чарвитул,
Къачайва ина хIучI, къакIула вин нигь,
КъакIула вин рутан бивкIулийн ттиликI,
Къабувну бивкIу сан, ачайва хьхьичIун.*

*Ина ия шаэр, оьрмулуд аьшукь,
Низамрайн бувиума заманалуд щукь!
Вилва байлсса къалам щун буллай иттав,
Душмантал мурчIи-чIавкI икIайва буллан.*

*ПаччахIнал жалладтал, жиндралсса ккаччив,
БикIайва вийн хьап тIий, ина ккуччу ан,
Вил ка-ччаннай дишин дуснакьрал махру,
ДикIайва мийнначIа мудан хIадурну.*

*Вил пикри, вил мурад халкъ илкин бансса,
Бушиву кIулхьукун, бачайва ххяхлай,
Ци гьужум бивкIнугу мийннал бувайсса,
Къавхьуна мийннаца ина лахIан ан,
Лавсун нани ххуллу къабитан уван.*

*Ина ия ххира арс Дагьусттаннал,
Революционер хьунасса, хIакьсса,
Лениннул аманат бартбигьлай ивкIсса,
Къянкьасса большевикI, маигьурну ивкIсса.*

*Чумул ина лавсун жуя лавгнугу,
Циксса шинну ттигу ккуру гьарчагу,
ЛичIанссар абадлий вил ца бусравну,
Варакьрай чирчуну тарихрал чIапIуй,
Халкъуннал дакIниеву хьамакьадиртун.*





Ххазина АМИНОВА,
филологиялул элмурдал кандидат



ДАГЪУСТТАННАЛ АВТОНОМИЯЛУН 100 ШИН ШАВРИН: САЭД ГАБИЕВ*

(Бишлашиссар кутIа бувну)

С.И. Габиев увссар 28 майрай 1883 шинал Опочка тIисса шяраву Псковский губерниялийсса. 1877 шинал хьусса оьрус паччахIнайн кьарщисса востаниелувух гьуртту хьуну ивкIун тIий, ганал ппу, цалла миналия уккан увну, тийхун ссивир увну ивкIссар. Саэдлул ппу, Ибрагьим Габиев, дурккусса, захIмат ххирасса, дунияллий хьанахьимуния хавар бусса ивкIссар. Саэд цува мукIру хьанай ур цанма буккин-чичин ганал лахьхьин бувна тIий, аьрабнал маданиятрал цув буттал кIул увна тIий. И.Габиев Гьумучиял старшинанугу увчIуну ивкIун ур, 1877шинайнин му даву дуллай ивкIун ур. Габиевлул бутта зувиазара востаниелуву гьуртту хьумийннавух Псковский губерниялийн гьан увну ивкIун ур. Кулпатгу цащалва буцин ихтияр дуллуну дур. 5 шинава, танмихIгу лавхьуну, И.Габиев кулпатращал буттал шяравун зана хьуну ур.

С.Габиев Гьумучиял школалий дуклай ивкIун ур, Темир-хан-Шуралийсса реалном училищегу кьуртал бувну бур. ЦIусса кIанттай аьдат акъа унугу, дуккаврих гьира бусса, гьарзадрал хьирив лалалисса, вивн ухлахисса, личIлулсса Саид гимназиялуву дуклаки оьрчIаву ца яла хьхьчIунма кьахьуви.

Гимназиялуву га чIявусса чичу-букку буллай ивкIун ур, аьрабнал ва оьруснал адабиятрахун машхул хьуну ивкIун ур. Яла-яла ганан ххирану бивкIун бур Чернышевскийл, Добролюбовлул, Писаревлул, Некрасовлул, К.Хетагуровлул луттирду, цувагу чичлан ивкIун ур шеьрирду. Шиккува айивхьуну ур паччахIлугьрал мабуккару куну, кьадагъа дирхьусса литературагу ккалай.

Ссылкалийн гьан бувсса кулпатраву хьуна хьусса, паччахIнал рахIму бакъашиву чIаванийва бувчIусса, оьрчIнийва, буслай цирича, цалва ярун-

*Ва макъала хIадур бан ишла бувссар луттирду: Буттаев М. «Большевистская печать в Дагестане»; Мусаева С. «С. Габиев у истоков автономии Дагестана» ва м.ц.

нин аьзаврду ккухIлахIимий ккавксса, халкъуннал вирттавраха бувсса шеърирдай хьуна хьусса, тархъаншиврух мюхтажсса С.Габиевлун душман хьуну бур зулмукартал. Чаванийвасса шеърирдаву жуна чIалай ур гарязий акъа ушиву хIукуматрай, дащуй дихьдай ушиву диялдакъашивуртту, чаннайн букан бан ччай ушиву зунттал халкъ. Га дакцIий ур цалва миллатрай. Халкъ талихI бакъа бушиврул багъананугу, сававнугу ганан паччахI чIалай ур.

Революциялул романтизмалул экъи нанисса С.Габиевлун шаърирду бивщуну буссар «Лакку чугурданул чIу» тIисса жужрай.

Гимназистну унава га ивкIссар халкъуннал оьрму лахьлай, гайннал ци янна-ус-ярагъ ишла дуллай буссарив ххалдуллай, тIахIни-кIичIу, аьтта-ттаркъи ва манкъулат датIлай. 1904 шинал чивчусса «Лаки. Их прошлое и быт» тIисса историко-этнографический очеркраву та чIумалсса тамансса материалу ишла дурну дуссар. КогТа чIумал ганан дурагу 22 шинни диркIсса.Му ппурттуву га лапва литературалухун агьну ур. Аьрасатнаву ца бур учинсса, яла хьхьичIунсса Ставропольский гимназиялуву калан увххун ур цувагу. Га гимназия бивкIун бур Ухссавнил Кавказнавусса тархъаншиврул пикрирду цивува салкъи бувсса кIанттуну. Кавказскнал администрациялун мунияр къаххирасса зат диркIун дакъар. Цанчирча, гику диркIун дурр революционный кружокру. Мийннавух хIала увххун ур Габиевгу, дус хьуну ур революционертурал – хьхьичIунмий инсантурал. Тикку ганан бувчIуну бур бушиву кIива Аьрасат: - «казенный Аьрасат, зунттал халкъуннан душмансса паччахIнал Аьрасат ва дусьсса Аьрасат – дакI-аьмал хьинсса оьрус халкъуннал Аьрасат. Романтикалул гьавасрал га машхул увну ур народничестволухун ва цаймий революционный иширттахун. Мува ппурттуву радикальныйсса Социал-революционный партиялул членгу хьуну ур.

Гимназиялул махьва-махьмий классирттаву ганал чивчуну бур «Лаки, их прошлое и быт», цувпагу дагьусттаннаясса гимназистнал цалчинмур макьалану хьанахьисса. Унугу-унгусса тарихчи цува акъанагу, жунма аьлтта чIалай бур цукссава гьунар ххисса, аькълулул камилсса, итххявхсса, зат вив ласайсса гивназист ивкIун урив га. С. Габиевлун бивхьусса захIмат оьнма-аьдада къалавгссар: цаппара диялдакъашивуртту дунугу, ганал макьала лап экъи най чивчуну бур, га цIунилва цIунил калан гьира багьлай бур, хIакьинусса къинигу тарихрал элмулун бучIи ляхьлай бур.

1904 шинал С.Габиев дуклан увххуну ур естественно-научное отделение-лийн физико-математический факультетрал Петербургуллал университетрал. АхIвал кIюлану бушавусававну, студентьтурал гьала-кIусушивурттавах хIала увххуну тIий, университетрава уккан аву сававну, подпольный даврихун агьаву сававну га къуртал бувну бур С. Габиевлун так 1910 шинал.

Аьрасатнал революционный центрдаий ялапар хьанай, дугу дуклай, подпольный даврихунгу агьаврил ганал шалва пикри-зикри мий иширттавах гьан бувну бур. Та заманалул хьхьичIунсса пикрирдал, революциялух къистта бувксса студентьтурал жагьилсса Габиев лапва «тархъан щатIал» ласун увну ур. Аьрасатнал цалчинмур революциялул чIумал Саэд

Ибрагимович гуртту хуну ур Петербурграл рабочийнал къача-къучшивуртгавух, 9 январданий 1905 шинал ярагъгу кунтихъну га ур сангардай путиловцыйнал кюкярвух.

С. Габиевлул Санкт-Петербургуллал университетравусса цалчинсса шиннардий хуну дур 1905 шинал революция. Хакъмур ххуйхъунтйишиврий дакдарцусса жагылнал путиловцыйнал чул бувгъуну бур. Амма, цалва тймур къавхъуну, цалчинмур революциялуву бух хъувкун, ганан бувчуну бур: гужирай цичлав дахханашинна дан къахъунтйишиву, багълай бушиву инсантуран бувчин буллан, просвещение дулун. Му чумал чан-чанну тий обществолуву дахханашивуртту хъарнан диклантйишиву, халкъгу бавкъуну ва талих буну ялапар хъанантйишиву. Дялирчисса Санкт-Петербургский университетравусса дуккаву ганал цунил дайдирихъуну дурр. Дуккаву къуртал хуну махъ, обществолуву ххуйчулийнайсса дахханашивуртту хъунданна килшаву дулаврийну тисса цалва хиял бартбигиншиврул га итабакълан ивкун ур Санкт-Петербурглий цалчинсса миллатрал демократиялул газета «Заря Дагестана» (Дагъусттаннал ххяххбаргъ), мунилва хъирив «Мусульманнал газета». Цал архал га ивкун ур цалва газетарттал редактору, корректору, издательгу, наборщикгу, печатникгу, почтальонгу. Мий газетру ккалай бивкун бур ва машгурну бивкун бур так Кавказнаву бакъассагу, Дянивмур Азиянаву, Татарнаву, Башкирнаву.

Дагъусттаннал цалчинма шаэр-инкъилабчи - романтик С. Габиев хуну ур цалчинма публицист, паччахнал зулмулийн къарци увксса,

Кавказнавусса чиновниктал дащуй бихълахъисса. Мий газетирттал хъхъичгу цаппара масалартту бивкиссар: европанал зумунусса дунявийсса школартту титлаву, мюрщимий классирттаву дарсру ниттил мазурдий дившаву, раэят тисса мукъул ва муницун дархусса мяналул ахир пуч даву, военно-народный управление дукъан даву ва адатирттайнусса судирттал дазу-зума рищаву Цувагу ивкиссар просветитель ва гуманист, халли-халлах, чан-чанну тий, обществолуву дахханашивуртту дан шаврийн вихсса.

С.И. Габиев къанкъану авцуну ивкиссар укунсса пикрилий: Аьрасатнашал дус хурча Дагъусттаннал халкъуннан хъинссар, хъуни-хъунисса хъинбаларду биянтиссар. Му масалалун хас бувсса макъаларду ганал бившуну бур улу Парижлий ибакълакъисса «Мусульманин» тисса журналланий.

Мийнниява ихтилат най бур ганал итабакълакълай ивкисса газетирттайгу. Га ур паччахнал колониальный политикалийн къарци уклай, русификатортал Кавказнава бат бан ччай. Мукунма га гъаз буллай ур экономикалул, культуралул масалартту, ххуй бан ччай ур зунттал халкъуннал маэшат.

Паччахнал правительстводунгу туну мукунсса инсан ччан шайссияв? С.И. Габиева гайннан душман хуну ур, цалва пукъа лакъин лагма увксса. С.И. Габиев был членом Дагестанской социалистической группы, которая сыграла положительную роль в сплочении прогрессивных сил края на борьбу с реакционными и контрреволюционными силами.

Ганал дусшиву диркун дурр С. Орджоникидзешал, С. Кировлушал, А. Микояннушал ва цаймийгу большевиктурашал, революционертурашал. 1918 1918 шинал С.И. Габиев увххун ур Коммунисти партиалувун, ганая хуну ур Дагъусттаннай Совет власть диваврихлусса талатала.

Областной военно-революционный комитетрал хъунаманал хъиривчу Саид Ибрагимович рахІму бакъа талай ивкІун ур виваллил ва къатІаллил контрреволюциялушал. Га каялувшиву дуллай ивкІун ур Темир-Хан-Шуриинский совдепрай, Военно-Революционный трибуналланул бакІчийгу хъуну ур.

Ганал дахІаву диркІун дур Бақуйннал большевиктуращалгу. Гайннал хъунмасса кумаг буллай бивкІун бур дагъусттаннал захІматкашнан. Дагъусттаннай ЯтІул аьралуннал кьокъри датІиншиврул 1918 шинал С. Габиевлул Бақуя лавсун увкІун ур янна-ярагъ ва шагы. Ганал диркІун дурр дахІаву Бақуйннал 26 комиссарнащал, цимийлвагу хъуна авкъуну ур Шаумяннушал ва Джапаридзецал. Ганайн вихшала дишайсса диркІун дурр А.И. Микояннул, С.М. Кировлул.

1918 шинал Дагъусттаннай чІумуйсса совет власть дагъсса чІумал, С. Габиевлун Владикавказрайн гъан багъну бур, тийх Орджоникидзел каялувшиннарайну контрреволюциялушал талай ивкІун ур Ухссавнил Кавказнаву совет власть цаькъ шаву мурадрай.

Мура шинал С.И. Габиев увчІуну ур председателъну Народный советрал Терскалрал советский республикалул, комиссарну цалчинсса контрреволюционный 12-сотенный ятІул партизантурал кьокълул, Ухссавнил Кавказнал революционный комитетрал шарикну Пятигорскалий ва Аьрасатнал Ревтрудями-лул шарикну, цилгу председателъну ивкІсса цал Г.К. Орджоникидзе, яла С.М. Киров. Мийннушалва архІал Г. Орджоникидзел га ивтун ур редакторну Терский республикалул «Революционный горец» тІисса газетрал.

21 сентябрданул 1920 шинал С.И. Габиев увчІуну ур председателъну Дагъусттаннал областной революционный комитетрал. Саид Габиевлул хъунмасса захІмат бивхъуну бур ХІуцциннал Нажмуттиннул антисоветский къача-къучшивуртту духлаган дансса. Партархивирттаву бур тамансса документру С.Габиевлул зунттал халкъ контрреволюциялуйн къарщину гъаз буллай ивкІсса куц бусласисса. .

И.В. Сталиннушал ва Г.К. Орджоникидзецал архІал С.И. Габиевлул хІарачат бувну бур Советирттал созыв в Темир-Хан-Шуралий батІин, муккури баян бувсса Дагъусттаннал Советская автономия .

С. Габиев – цалчинсса зунттал чуври, прошедших университет къуртал бувсса, европанал зумунусса кІулшиву ларсъсса, Аьрасатнал чулинай урувгсса. Мий шиннардий С. Габиевлул итабавкъуну бур лу «Арабы. Ислам. Арабо-мусульманская культура» тІисса. Муний га ур евроцентристский концепциялийн данди дихълай толерантность, динналул маслихІат, миллатирттал дянивсса дусшиву. ПаччахІнал администрациялушал ччалай уну тІий, ганал итабакълакьисса газетру лавкъуссар, цувагу суд-диваннахун увтссар.

Цалчинмур щаллагу дунияллул дяьвилул паччахІлугърай хъанахъисса ишру хъиннува ягин бувссар. Февральская яла хъиривра хъусса Октябрьская революциярттал ганая хъун увссар коммунист идеологиялул уртакъ. Граждан дяьвилул шиннардий га ивкІссар талай совет власть так Дагъусттаннай дакъассагу, щалва Кавказнаву дишинсса къасттирай.

1917 шинал майрай га гьуртту хъуну ур Цалчинсса Горский съездрай Владикавказнаву (1-7 май 1917 шинал). Микку ганал халкъуннал кІулшиву ласаврил хІакъиравусса доклад бувну бур. Цувагу увчІуну ур Ухссавнил

Кавказнал зунттал халкъуннал ва Дагъусттаннал Союзрал ЦК-лул кандидатну.

Гара шинал хьуну ур шарикну «Дагестанской Социалистической группы». 1917 шинал авгъустрай къамул увну ур Чумуйсса Дагъусттаннал Облисполкомрал шарикну. 1918 шинал майрая тийнай ВРК-лул виваллил иширтталсса бай отделланул хьунама хьуну ур ганая,яла Дагъусттаннал Облисполкомралгу. Августрай Л. Бичерахов ххявхний, Дагъусттан къабитан багъну бур. Цаппара хЛаллайсса Владикавказрай мина дурну дурр. Белоказакнал шагъру бугъаннийн, «Революционный горец» тИсса газета итабакълай ивкIун ур.

1920 шинал Северо-Кавказский Ревкомрал шарик хьуну ур. 1920 шинал сентябрьданий гьуртту хьуну ур Бакуй Къиблалул халкъуннал създай. Му създрай увчIуну ур Дагревкомрал членну укунсса резолюциялушал: «Д.Къоркъмасов акъаний, председательшиву дуллан ялув бишин.»

1920 шинал сентябрьданий ХIуцциннал Нажмуттиннул бакI гъаз дурну дурр совет властьрайн къарщину. Кавказнал бюро ЦК РКП(б)-лул хIукмулийн бувну ганашал талан тIайла увккун ур ццах бакъасса революционер С.И.Габиев. Цалва хъхьичI бивхъусса масала ганал щаллу бувну бур. Дагъусттан республика хIасул дангу га савав хьуну ур. Му агъамсса ишри. Цанчирча, улу, СССР леркъун махъгу, геополитакалуву ляличIийсса кIану бугълай тIий, жулла республика хъанахъиссар Аьрасатнал къиблалул чулийсса дазуну.

Саид Габиев ивкIун ур Дагъусттаннай чара бакъа аьмсса мазну обрус маз бикIан аьркинссар тIий. Цанчирча, просвещение му мазрай ларсун дуну тIий. Пантюркизма ва панисламизмалушал ччалай ивкIун ур цувагу.

Гьарца ганал кусса махъ, бивзсса ша Буттал кIанттун мюнпатрансса бивкIун бур. Буттал кIанттунугу ганал хIисав байсса бивкIун бур Аьрасатнавун бухлахисса Дагъусттан.





*Ибрагим-Халил
КЪУРБАНАЛИЕВ*

УМУД

*Аьзисса буттал улчай, хьурдай тийна илара
Муруллава, хьяллава ца мусил мяьдан буккан:
Мискинишуву сававрай ссивиллив заназисса
Вай лакрал устартуран тархъанишврул бутла бан.*

*Ссут дайдахьлан гьан хьувкун, кьурукъ лавай бавчукун,
Ккучу-ккучунну хьуну, лакмий ялавай бачай.
Буттал кланттул ххазина цинявннан гьакъавхьуну,
Хьуна, чиви къакуну, цинявпта бувккун бачай.*

*Чара цар, хьунна нину агь-угь тийна къабивтун,
Циняв лакрал жагьилтал Оьруснавунмай бачай.
НикирацI мюрици оьрчIру «Мяммай!» тийна къабивтун,
Лакрал устартал циняв хIалтIилухунмай бачай.*

*Кувгу шагьрурдайн лавгун, кувгу хутордайн лавгун,
Гьурбатрал кьурчIишуву гьарцаннан ккухIин багьай.
ЗахIмат бан, даву лякьин клани-клантурдайх буклай,
Тахсир бакъа ссивиллив гьариманан гьан багьай.*

*Аман, хьурдай учара аьзисса буттал кланттай
Муруллава, хьяллава ца мусил мяьдан буккан:
Мискинишуву сававрай ссивиллив заназисса
Вай лакрал устартуран тархъанишврул бутла бан.*

МАКИ ВА КИИХЪ

Поэмалувасса парча

* * *

«Гьурра-гьайта!» – Заку оьвтIун ивкIунни,
Царал къавтIилувун ххявххун лавгунни,
Ванал хьирив вирттал дутту бувххунни,
НувиIуй къама кунма, чер-чертIий бунни,
Язимий цIараву талан бивкIунни.
Ккулла бухлаганнийн гьаза бувунни,
Жан дуну махьунмай зана къабикIан,
Цаппара ччаллацал хIала бувххунни.
Ахир чIара кьюкьлуйн кьия дирунни,
Махьа кумагирайн умуд кьувкьунни.
Хьуни ттупал цIарал, пулеметирттал
ХьхьичI бацIансса кьувват жуь кьаливчIунни.
Ттуршахьул вирттаврал жанну дуллунни,
ЧIявуссаннал чурххайн цаву ларсунни.
Чурххай жан духларгма ясир агьунни.
Жул чIарасса кьюкьлуй агьб кьалирчIунни.

* * *

Ай, оьрму ккавказсия ттун ва дунгьаллий –
Та Лайлацал нара ччаву дачIайни.
Амма оьрму бия ттун дунияллий,
Дяввилий душманнал хьхьичI авцIу кьини,
Ялун гьужум бувну, душман нанийни,
Лагмава ккуллардал ттугь бизлазийни.
Цинявпа гьалмахтал ттуя арх хьуни,
Душман ялун ххявххун чIарав нанийни,
НякI чIутIул ккулла на дакIнин булайни.
Агь, вана ва бия оьрмулун неьмат,
Маслакирал ялув кьия духIайни.

* * *

Душманнал ккуллардал цаву дирунни,
Оьттул бувцIу ттул чурх шанийх бивхьунни,
Бурган бувкIун, Лайла чIарав бавцIунни,
Ттул бакIрайх ка дуклай, агьтIун бивкIунни.
– МааьтIрала, тIутIий, ттул жанналучIа,
Тархьанишвирул ялув тида шавричIа.
Ттул оьттул бувцIусса ярагь ва янна –
Ттуя вин ссайгьатран дяввилул давла.
Аманат виьн бидав, дакIнин ххирасса,

Душманнал ччаннала на ххассал увсса.
Мий арцул каруннах тимар булува,
Бизар хъун мабара, на акъар куну.
Ттул чай дишай кили, канил бугъай мархъ,
Аманат, ххазинай, ххиттун къабакъин.
МааьтIрала, тIутIий, ттул жанналучIа,
Тархъанишиврул ялув пида шавричIа.
Вин на ххира хъурча, аманат ттул вийн –
ЦIарал пар-пар тIисса ятIулсса байрахъ!

* * *

– Ниттил буллу ккукку ттун хIарам хъуннав,
На вих я бивтхъурча, бакIрах бурувгун,
Ягу вил хъус, ляхъин хIисавран лавсун,
Ягу вил бахттирайн на ишан ларсун.
Ина буве пикрилул на хIайран бувна,
МакънатIисрал кунма, кIункIу бувуна,
КъутIи цIакъ дурссия вил чIарав бацIан,
Хъун пикрилул ялув архIал жан дулун...
БакIрайсса ххаятIи на чартIи банна,
Ттулва бакIрай на вил къяпа бишинна,
Вил янна лахханна, мисрин дахIинна,
Вил винтовка канил цIакъну бугъанна...
Ттувува ссихI буна шаптай биярча,
«Нину, хIалал бити ттун ккукку» чинна,
Ххирасса ссурваврайн васият банна,
Вицал ца гъаттаву бишара чинна.



Таржума був мийнгува

100 ШИН

АБЛИЕВ Махаммад,
таржумачи



ХI. Юсуфи

ТАРИХРАН ККАВКССАР

*Хьуйлува дуккан дурсса
Ватанналул дайсса тур
Бюхттулсса зунттул бакIрай,
Пар-пар тий, птерха тий дур.*

*Халкьуннал хьхьичI кьус диртун,
Икрам бан кьаччинал бакI,
Аьркиний багьантIиссар
ХьачIунттая личин дан.*

*Тарихирттал мисаллу
Ттун лап чIявусса кIулссар,
Кьув-аьстий, лама ламп тий,
Халкьуннал кьисас ласун
Кьайгьу, тикри бакьашив
ТачIав кьадувантIиссар.*

*Халкьуннал бакIрукьукьуй!
НахIакьданссар вил махьру,
Макрурду буллалаву,
Инагу, зу цинявгу,
ХIакьссар, литIунтIиссару,
Халкьуннал тархьаншаву
ДацIан дан кьахьунтIиссар.*

*Фюрер ва халкъ?
Вар, туну кІай цавайрив?!
Халкъуннал цІанийну литІлан,
Мийннахтур цІа машгурсса,
Гейне увксса. Халкъ, кІулишара,
Зул цІанийнур тІий, литІлай бур,
Ххаллишиевуртту дакъасса,
МарцІсса, цІасса агъали.*

*БакІран чІявусса ккаккун,
Чяш дурксса дуниялун
Аьчухну чІалачІиссар
Халкъуннал къакъарттавун,
Мий литІун бан къасттирай,
Загьрурду бутІлай бивкІмий.*

* * *

*Чумуйсса пахъ дагъаву
Хархавар бакъа хьуну,
Ппив-ххив хьу хІаятрава
КІива жуужугу канихьну,
Лавсун жун ккаккан бубан
Старшина увкІуна.*

*Мий ччуччин бубну бия
Ккуллардайну, цІарайну,
КІай ца шинельлануву
Соллатнал кІучІ бубуна.
Щак бакъа духъунссия
КІайннал дакІру ххарину.*

*Жу мийннуйсса чичрурду
Дурккуссия личІлулну.
ХьхьичІва лавгсса замана
Мийннуя жун кІулхьуна.*

*Ялагу цІуницІакул
Биту-ххиту гьужумрайн
Лухччинул къатравату
Жу бувкссия дяъвирдайн.*

*Гьужум буллай нанисса
Жул роталул къюкълуву
Талай нанимийннацал
Толстой ва Гёте бия.*

**Обрус мазрая таржума
бувссар МахІаммад АБЛИЕВЛУЛ**



Тарихрал ххуттардыва

100 ШИН

Абачара ХИУСАЙНАЕВ



ШАВКИУЛЛАЛ ХИАДИСЛУЯ ДАКИНИЙХТУНУССА МАХЪ

1950 шинал, Ккуллал районналийсса ЧЯйннал школалул директорну нава зузийни, ва та тИвтунавав, ванил гъану бивзма цу иявав тИсса пикри хъуна ттун. Мий затру кIул хъувкун, на махIатгал хъура: школа зий байбивхъуну бия 1912 шинал, танил цалчинсса учительгу, хъунамагу ивкIун ия ШавкIратусса ХIадис ХIажиев. ХIадис дакIний ливчIсса къари-къужри ЧЯв та чIумалгу тамансса бия. Ца шин дакъа кIикку дарс дихълай къадурнугу, хъинсса, тIайласса адамина, за лахъхъин байсса учитель ия тIун бикIайва.

1916 шинал школа къуртал бувмий итабакълакьини, тиву дуклай бивкI-мийннал «бакIуя кIама бувккуну», чулланийнвагу ца оьрчI увккун ия. Амма, лахъхъин хъанай, лажин кIялану дуклай ивкIсса танал бакIрачIангу аьжаивсса затру бувкIун бур. КIа чIумал, циваннив, Ваччав увкIун ивкIсса Гъарун Саэдов, кIа оьрчI барча ан, ЧЯв лавгун ур. КIаняхъ, ялагу дукланшиврул, дакI ххари хъунсса махъру куну бур. ОьрчIаягу мийжаннугу бюхъу бусса, тIайласса адамина хъуну ур. Хъуни-хъунисса къуллугъирттай зий ивкIун ур. Зунгу айивхъуну ур цала ххирава-ххирава цалчинсса учительнал, Лакрал округрал исполкомрал председатель, ХIадис ХIажиевлул тавакъюрайн бувну, кIира шинай уква Аьштти-Ккуллал учасокрал советрал секретарьшиву дуллай. 1983 шинал Кремлилу Совет Союзрал Коммунист партиялул язимий, яла бугъарамий члентуращал партиялул бакIчитал маслихIат ккаклакийни, щалла паччахIлугърая оьвкусса 93 инсаннавух щалла Ухссавнил чулухмур Кавказнал вакилну так ца ХIадис ХIажиевлучIа дуклай ивкIсса СумбатIлиясса Манапхъал ХIажибутгал арс Камил уссия. Жулва бахттилун, Камил цIанакулгу цIуллу-сагъну жувухва зий-занай ур.

Дагъустаннал оьрчIан цалва нитил мазрацIун оьрус мазгур лахъхъин буллан аьркинсса тIий ивкIсса, къянкъану мунил цIаний талай ивкIсса дуниявий

школалул учитель Хадис Хажиев мыйжаннугусса педагог ивкИшиврул барашиврун – ца Манапов Камил дуняллийн уккавугу гьар.

На нава хьуссара та алвагьсса чув Хадис Хажиевлуча даврийгу, шавагу. Ттун та ххуйну кIулссия. Танал революционершиврийгу, педагогшиврийгу дурмунил хIурматранна, танаву рухI дирхьуну, ттунна ккарксса сипатирттащал цIунил дуняллийн уккан увссия ттулва «Арамтурал кIунттил ярагь бувгьуна» (1975 ш.) тIисса кьиссалуву. Цувагу хьинну аьратталсса 1918-1919 шиннардий аварасса иширттавах хIала увну.



Шикку, жулва ихтилатрал буци чансса хIурхIа бувну, Хадис Хажиев цу ивкIссарив, та, чув, цизий ивкIссарив кутIану бусан багьлай бур.

Аьдуллал арс Хадис увссар 1888 шинал ШавкIрав хьудугьул-уссалустарнал кулпатраву. 1901 шиная 1905 шинайн иянин дуклай ивкIссар Аьнжилив оьрус мазрай дарсру дихьлахьисса байбихьулул школалий. 1905 шинал та дус хьуссар революциялул пикрирдащал. 1908 шинал кьуртал бувссар Аьнжилийсса шинайсса учитель шай курсру. Тания махь зий ивкIссар учительнугу, школарттал хьунаманугу Лув-Жунгутайлий, ЧIяв, Гьумук, ШавкIрав.

1917 шинал партиялул член хьусса коммунист, мукуна Дагьусттаннал агитационно-просветительский бюорорал членсса Хадис Хажиев та шиналва айивхьуссар Дагьусттаннай Октябрь революция ххувшаврил цIаний талай. Хадис ва Адам Жалиев бакIчисса кьюкьлул Лаккуйсса хIукмурду ЧIумуйсса хIукуматрал (Временное правительстволул) канихьхьун гьан кьабивтссар, ганил вакилтал Лаккуя лихьан бувссар.

Саэд ГабиевлуцIун, Гьарун СаэдовлуцIун Хадислулгу лакрал ятIул партизантурал кьюкьрай каялушиву дурссар. Та, ярагьгу кIунттил бувгьуну, гьуртту хьуссар 1918 шинал Чирюртлий, 1919 шинал Лавашав, Жунгутайнна бурхIай, 1920 шинал Яруссаннай Совет властьрал цIаний хьусса дяьвирдаву. Танал лажин кIялану биттур бувссар Дагьусттаннайсса революциялул бакIчитал Жалал Кьоркьмасовлул, Саэд Габиевлул, Уллубий Буйнакскийл цайва бивхьусса кIу-кIусса, захIматсса буржру.

Мунийн бувну, Совет хIукумат ххув хьукун, Дагьусттаннал хьунимийннал цаярва хьунимийннайн чивчуссар танан ЯтIул ттугьлил орден хIалалссарча,

дулара тий. Гайнналгу дулун хлукму бувну бивкссар. Барчаллагъран дуллуну диркссар цалла ца дирхъусса ссят, увчунугу ивкссар ДагЦИКрал, Дагъ-усттаннал обкомрал членну. Щалва советирттал билаятраясса вакилтуравух Хадис Дагъусттаннал чулуха гъан увну ивкссар Москвавийн Советирттал IX-мур съездрайн. Гикку ганал вичи дирхъуссар В.И. Лениннул ихтилатрах.

1920 шинал Хадис Хажиев партиялул гъан увну ивкссар Кураллал округрал ревкомрал председателъну, яла Лакрал округрал исполкомрал председателъну, округрал комитетрал секретаръну. Зий ивкссар соцобеспечениелул наркомну, цанасса Хамзат Цадасал цанийсса Историялул, мазрал ва литературалул институтрал директорну ва цаймийгу жаваб дулайсса хъунисса къуллугъирттай.

Та ивкссар хъинну чантI кусса педагог, дурккучу, агъали лагма лаган бан бюхъу бусса зузала, Буттал канттугу, Совет властыгу ххирасса коммунист. На оърчсса чумал, ккурчIа-чIирах, хъхъичIавасса лакрал интеллигенциянаву танал ца, Сазд Габиевлулсса кунна, Гъарун Саздовуллсса кунна, бусраврай кIицI дуллан бикIайва, та тайннал даражалул инсанни тIун бикIайва.

Дурсса хъунисса давуртту куннасса, ялун чIалансса, дуняллий личIансса аьш къариртсаривкъай танал поэзиялувугу? Хъуссарив танаща жулва миллатрал мукъул усттаршиврул тарихрай цаламур хатIгу бишин?

Ва суалланун жаваб дуллалинийгу, ай, адамина ниттил увну ттуршра шин хъусса юбилейрихха куну, щялусса махъ бувсун, жухара къалархъхъусса къелгу къаданну. Шайсаксса тIайламур банну.

Хадислул чивчусса я лахъисса, я кутIасса хаварду бакъассар. Танал канила къабукссар я роман, я драма. Хъинну чансса бур таная жунма ирсирай ливчIсса шеърдугу. 1933 шинал МахIачкъалалий итабавкъусса «Инкъилабрал ттугъ» тIисса жужраву бакъар ххюттуршва ххавагу. Микссава хъун бюхъай рикъарщунна лирчIмий назмурдаятугу.

Бищайни чичул къимат бишлан бикIай танал дурсса чичрурдал битавшиврух, лагрулул хъуншиврух бурувгун. Амма А.С. Грибоедовлул цала ца дикъарчIай дурну дур так ца «Аькьлу бушивриясса бала» тIисса хъун бакъасса луттирайхчIин. Оьруснал совет поэзиялувун М. Рудерман увххунни анжагъ ца «Тачанкалухасса балай» чивчуну. Гъарцаннан дакIних кIулли, гъар кIанай кIицI буллан бикIай Павло Тычинал назмурдава так ца «кулпат цашиврул асар» тIисса хха. Мунихава лавхъхъусса зат хъуну бур Лаккуй Хадис Хажиевлул назмурдангу.

Тай чирчуну бур, чIумух бурувгун, чивчуманал аькьлу-кIуллилул къукълай бивкIсса куццуй. Тайннуву ихтилат бур оьруснал паччахIнайн, танал хлукмурду бачин бувну бивкIмийннайн авторнан бизлай бивкIсса сситтуя. Та зидлий ур, паччахIнахлу буклай, Совет хIукуматрайн къаршимийннайн, революция ххув хъун къаритан, танихун бахчилай бивкIмийннайн. Шаэр ххарину ур, Октябрь революция хъуну махъ, билаятгу, Дагъусттангу цIу лагаврия, агъалинал маэшат ххуй хъанахъаврия, социалистийсса дузалшиннардая.

**Партизаннал начальник
Хадис пIякъ чавай ури,
Дякъил цIуцIаврил увгъун,
Дяъвилийн гъан къахъанай, –**

тІий чивчуну бур танал махъ зуманий, Буттал кІанттул цІанийсса Хъун-масса дѣввилул чІумал. Немецнал фашистурайн тгярзираи чирчусса 1941 шинал авгъустрал 12-нний «ЦІусса ххулла» тІисса лакку кказитрай бивщусса назму, байбивхъусса мукъуртгий кърталгу бувну, хъунмуний дакІ дарцІусса шаэрнал душманнахъ багъавай увкуну бур:

Ина байбивхъунни – жу къртал банну!

ЧІумул тІалавшиннарайн бувну, дунияллийн бувксса циняв вай шеъррду публицистикалул сипатрайсса бур. Циняв бур тай кьинирдал бивхъусса ма-сълартгаха зий, тайннун жаваб дуллаи. Мугу тайннул ххуйшивур. Мунищал-ва, тайннуй дур «яшасын поэзиялул» мугъруллул ишарагу. «Яшасын поэзия» тІисса цІа дирзун дия профессор Г. Лелевичлул тай азаллий урчІтуршлии зувилку шиннардий, ва банну, та банну, цІулла хъуннав, цІакъ хъуннав тІий, бачІвасса гъавасрай бувсса ялттувасса балайрадин.

Амма цалла кьюкІливух тиха-шиха лирчусса дард бусан чирчумий назмур-даву дур, вана куну, ккаккан дансса аш-бакІ дусса затру. Дур ашцуйн щусса, чичун цанналу хасъсса цалла щавулул кьюву. КутІану учин, мий назмурдаву бур бикІайкунсса, мийжаннугусса поэзия, пасихІшиву.

1912 шиналва, гърбатрай бизар хъусса шаэрнал дакІнива буттал кІанттух-са мякъллил личин бувну бур, ганал увкушиву кьакІулу, чансса махъ-махъ МухІуттин Чариновлул увкусса махъру:

**Агъ! Ттул буттал кІануй,
Лакку биляят!
Бюхттулсса зунттурдуй,
ТутІул ларе ардуй!**

ХъхъичІсса кІива хха МухІуттин ЧариновлуйхчІин чІявучил зумув багъну, халкъуннал балай хъунни.

«Гъинтнил хъхъу» тІисса ва назмулуву Лакку кІану ххалаххуха, цува шаэр кІанил хъирив нанисса ххалуха ххуйну лащан бувну бур.



Ва назмулувусса гъарзат лаккучунахъ чIявусса затиргтая бусласисса дур: зурул чани, ратI-ккутIаву ладикIлакIисса цIан, ратIаву Хъуннеххал лавсун нанисса хъуникъунттал чIурду, къурдарав хъуруннал щуршу.

**Тажутгиннул ахъув
Тамаш гъалгъа,
ТамахIкар хияллу
ХIалтIухъантурал.**

Гъалгъа паракъатсса, дунияллул дардру дурагу дакъаний кунмасса оърмулия бур. Гъинттул хъхъувай зунттаву мукун бигу-бикIайхха.

«Ччарча ччимур хъувча» тIисса назмулуну шаэрнаща махънангу асар хъуну ккаккан дан бювхъуну бур медицинский институтрал цалчинмур курсираву дуклакисса бувагу бусса ца ххирасса душница хъусса буттал къурчIишиву:

**Уккара къатIувай –
На хIайран шара,
Вил ссурухIи сурат
Хъунабавкъукун.**

**Уххара ичIувай –
На махIрум шара,
Вил ссурухIи сурат
Янин ххал хъувкун.**

«Буржуазный националистураI», «империализмалул агентътурал» дуллай диркIмур зувилку шиннардил литературалуву кунна, хIакъинусса къини тай шиннардий хъхъичIунмий инсантуран тахсир бакъанма буллай бивкIсса танмихIру кказитиргтай, журналлай, луттирдаву чичлай бур, тайннуясса бусаларду сийлий бур. Та чIумалла паччахIлугърал тIайласса политика даччан даврийн, танмихI бай органнал давриву ури баврийн къаршину цилва чIу лакрал поэзиялул цилла чIумал – танива лахъ бувну бур.

Бусса цалва чурххал гуж, щалла мазрал пасихIшиву ХIажиев ЧукIундалавл харж дурну дур, цува кулакния чарича, середняквагу акъашиву чIалачIи бан. Та ур цаймийнайгу диркIсса цайрасса къия къабучIирхха, къатIайлархха тIий. Цува тIайлашиву мийжан бувну, мунил цIаний талансса шавкъ танавун ХIадислугу руртун дур. ТаначIан ивну ивкIсса ЧукIундалавгу танахъ бусраврай барчаллагъ тIий ур. Амма тIайламур бацIан бан къавхъусса ЧукIундалав аьсивну ивкIуссар.

Юсуп Шавкринский буржуазный националистния ци икIави, му щялмахърича, Лениннул хIакъ большевикри учаву, цалва ажалданучIан увцуну нанисса танахъ дакI хъунсса махъ бувсун, чин ккаккан бан бакъанугу, мукунсса шеъри та чIумал таная чичаву ХIадислул чулуха чансса чувшиву къадиркIссар.

Мукунсса даву дан бюхъайссар хIакъсса пикрилул коммунистнаща, гражданиннащар. Вайнна буржуазный националисталли тIисса дагъ дирхъумийнахъ шаэрнал увкусса махъру:

**Къапанналивун бавкьу
Чава къарчигъай-лачин,
Ява, къайгъу мабара,
Къия дирунни куну.**

**Коммунистурал ялун
Къиярду дияйссарча,
Ява, къума машара,
Лениннул хІакъ большевик!**

Зувилку шиннардийва цайва бивхъусса авлиясса бакъурду яла бичин бю-
вхъуну, «японнал шпионшиврия» марці хъуну, дуснакърава увксса ХІадис
цаппара хІаллай даву дакъа ливчІссар. Тукунмийннаџа та чІумал чІявус-
саннан чал дикІул къанкъ ришлай диркІссар. Тана та къювулуву, 1939 шинал
бур ХІадислул лахІан дан, гъагъан дан къабюхъайсса коммунист рухІлихха,
пахава базу-базурдавух бюххайсса махъру увкуну:

**БучІибакъултрал маз бувну,
БакІрачІан ци бучІарчангу,
Бан-битанмур бакъа хъуну,
Буруккин къабувайссари.**

**Хиянатсса хаинтурал
Халкъуннал душман чирчагу,
Ххира Совет властьрахлу
Харж хъун даим хІадурссари.**

«РухІ» цуппа бувсса куцгу бахханасса, аъжаивну экъинанисса шеъри бур.
Гъарца ххуттай бур мйай-мйайва слог. Ва лакку балайрдаву нажагъ дакъа хъу-
накъадакъайсса цинни. БакІрая ччаннайн назмулуву дур чувшиврул къяртта.
Му сававну, шавкъирай буллалисса ихтилатгу оърчІи бувну, чІюлу бувну бур,
чІявуну цацІун багъну, чут хъанахъисса ца лавхъхъусса чІурдал:

**Коммунист рухІ кугъланссари,
Ккавкмур ккалли къабайссари,
Къадарданий къянкъассари,
Къадаршиву къадайссари.**

**Чирахъ кунна чаннассари,
Чаннан укунна цакъссари,
Чарил цІувцІу къалалувгу
Чихъ мадад чІа къачайссари.**

Ттул пикрилий, ва тема, вай пикрирду ххюџалла шинал хъхъичІгу, цІанас-
са чІумал, хІакъинусса къинигу инсантурал дакІния щин хІарчІсса, мийннал
бивкІу-буккулуцІун дархІусса темар, пикрирдур. Мунил бусласиссар жула
чичуя жунна лирчІмургу агъамсса, бивкІу бакъасса душиву.

Буккултран хІаз къабизансса бакъар «Ина цура?» тІисса ХІадислул цамур шеъригу. Хъаннихъхун циняр ихтиярду дулаву циняв хъаннин тІайлану къаб-увчІлай бухъунссар тІисса зат жула чичул бакІраву бухъунссия. Му иширая та хІучІ тІий ухъунссия. Тай зувилку шиннардийва танан ккавккун бур тІуллал куклусса, бигъасса, исвагъисса оърмулчІан кІункІу тІутІисса «ххуй хъункІул тІутІив». Мийннуй танал танира диялсса хъяхъаву усттарну дурну дур.

ХІадис ХІажиевлул поэзиялул бакІщаращи халкъуннал балайрдава нанисса бур. Танал назмурдугу халкъуннал назмурдаха лавхъхъусса бур. Бур ца-ца, кІи-кІи махъру, ххару тІайланма тичча лавсъссагу. Миккугу ца-ца кІанттай, щилчІав къаувкусса куццуй увкуну, «ххулу бйякъин баву», чулийнай «ач-чаву» саргъунну, усттарну дурну дикІай. ХІадислул «ДакІнийсса мабусара» тІисса назмулия халкъуннал балай хъуну бур. Танивугу бур укунсса махъру:

**Агъ, замана лавгунни,
Ччаврил тІутІив къатІ хъунни,
Вищал гъава бай хъару
ХъарацІа батІул хъунни.**

Ва назму чирчуну цимийгу шин хъуну махъ бувсса «Хъунавшаву» тІисса шеъри байбихълай бур дахъва кІицІ бувсса шеърилул ххуттая. Амма кІаймий ххаругу кІанилва хъирив тикрал банссар тІий ялугъисса буккулт цанма дакІ-ний-мазрай бакъасса шамма цІусса цаймий ххару лявкъуну, махІатгал хъунни:

**Агъ, замана лавгунни,
Зумув ккарччив къатІ хъунни,
ПасихІсса гъалгъа бай маз
ГъалатІ хъуну лявкъунни.**

«Дарурах луглагову» тІисса революционный романтизмалул рухІирай чивчусса шеърилуву буллалисса ихтилатрал бущи куклушиврул, куц исва-гъишиврул, къахъунмургу хъун кунма чІалачІи баврил, букку, дакІнийцири дардру хъамаритан увну, шаэрнал цала тІутІимунихух гъан уллай ур:

**Неххардий микІ бавссукун,
Неххащал хъхъирийн гъанна,
Эшкъилул къабувччу чурх
Хъхъирил щатІал буччин бан.**

**Дуниял щюлли хъувкун,
ДакІ тІутІавух гъан данна,
Эшкъилул къавкъесса чурххан
Дару льякъайрив ххал бан.**

ХІадис ХІажиевлул жунма къабивтсса поэзиялул ирсирая хъунма-хъунмур махъ учиннин, лакрал литературалул тарихрайн чансса аьлтту букканну.

Халкъуннал балайрдаву эшкъи хъусса жагъиллан душнияр ххуйсса, исва-гъисса дунияллий цичІар дикІайшиву къакІулли. Танил чІарах цуцІав уккансса



чара бакъар. Та шинчIав, цаманан ччан шаву бухIан бюхъ-айсса зат бакъар. Та буцин ччан ивкIагу так пулан-палачат усса ур. Душ битансса къаттагу танал гъаваллаву бувача. Акъахъурча, хъунмур кIулну икIан аьркини. Цанма муксса ччан хъумунихъ цува-гу танин хъисвагу ччай урив куну, цIуххин эшкьи хъума бакIрай ацIлай акъар.

Ванияр мыйцIа-урчIацIалла шинал хъхъичIра дунияллийн бувксса Бархъаллал Маллайл поэзиялук я битарча, тиву эшкьи-ччаврил мяъна укун дурну дурр: инсантал ду-дакъ-амийннайх, бух-ххувмийннайх кIибавчIусса жяматраву ччаву хъумий мурадлайн биян къабюхъайссар, мискинчунахсса авадан душнил, авадан чувнахсса мискин душнил эшкьи – бала-апатIри. Багту-

рал душ бур узданнах эшкьилул ччучлай. ОьрчIгу муния рязи акъа акъар. Амма ва нигыачIий ур, душнихъан сан акъа, къахъунбитанссар цалва ташу, хъун битарчагу, къюкьин уллансар, махъалу ххуйну къахъунссар тIий. Душнил ниттин мукунсса ччаврия бавнувагу ччай бакъар. Бан-битан бухлавгсса душ, мий гъарца зат бухIан къавхъуну, бивкIлай бур. Ца бакъа бакъасса душницIа хъусса нину хъуннасса аваданшивруцIун цурдалу аьсивну личIлай дур. Маллайгу бусса оьрмулукун му къартIа къуртIуна личIлай ур.

ПаччахIнайн къаршисса ша лавсун тIий I850 шинал Ссивирлийн гъан увсса Шаллал XIабибуллагълул зунгтал щарсса гъаз дурну дур танинин цаягу шаэрнаца лахъ дан къархъусса бюхттулшиврийн:

**Хъиннува ялтту увккун,
Асватлукъ мабуккара:
Ттуккуйгу буртти диркIун,
Хъирир дучIантIиссари, –**

тIий чивчуну бур танал цалла щарссанил хIакъираву цала гъалмахчуначIан. Мыйжаннугу, дахъва лакку маз бакъа къакIулсса щарссагу дирну дур тихун Иркутскалийн ласначIан цурдалу.

Хъамитайпа багъайкун тархъан баврил масъала куртIну, ларайсса даражалийн гъаз бувну бур МухIуттин Чариновлул I9I9 шиналва «XIабибат ва XIажияв» тIисса драмалуву. Амма му тIалавшинна МухIуттин щаллу хъуну ччай ур, паччахIлугърал низам цIу къадурнура, просветительтурал зумуну.

Ванийну танал дурмунил къадругу хъис лагъ къахъанахъиссар. Туллугу ххуйсса, аькълулугу камилсса драмалувусса ХАабибат хъинну ччай бур гьарца ишираву хъамигу арамтурашал архАалну ккаккаву.

Ва хъаннил масъала ххал бигъавриву ХАадис ХАажиевлул увкуссар танин цаягу лакрал шаэрнал къаувкусса, литература ца шаттирал хъхъичАуннай дуллалисса цалва махъ.

Азаллий урчАттуршлий къуку, зувилку шиннардий, Совет паччахАлугърал хъамигу, арамталгу гьарца ишираву архАал бацАан бувсса заманнай, «ДакАнийсса мабусара» тИсса ялув кИицА бувсса ХАадислул шеърилувасса душнихъ оьрчА ур цанма та ччай бушиву хъхъичАава щилчАав къабусайсса куццуй буслий. Танин ккаккунни та жагъилнан ххуйгу кАушиву цуппа, цилва биялларайсса душ бушиву, цилла дусшиву цина ччиманащал дан цуппа заллушиву. Танан ялагу кАулли та душнин цува ххуй къаизан бюхъайшиву, цаймийннаха цува яла къаувгуну итангу танихъ ихтияр душиву. Мунийн бувну та ур душнихъ ляличАину хАурматрай тИй:

**Авваланий вихшала
Дусшиврий дурсса хъурча,
Ахирданий ихтилат
Ссушиврий цан къадара?**

**Вина на къаччи хъурча,
Мунийгу аьй къаданна,
Вина ччима ттухъ буси,
Таналгу хАурмат банна.**

Вай ххарунниву дакъар инсан къулагъас дан ансса лашанбавуртту: эпитетру, метафорарду. Мий цичАар шикку личАину аьркин хъанайгу дакъар. МарцАсса дакАнияту дугърисса чувнал буллалисса уздансса ихтилатрал вичАи дирхъума, аьжаивну кАукАлу лаган увну, хханххиравун нур рутлай дур. Ванищалва, зун хАисав хъухъурча, бивзунни тИйгу акъар. Ванан ххуй бизаву даражалул ларайсса дур – душ дакАнил ххуйшивруцАун дархАусса дур.

Вай гьарца затрал мяъна – революционный демократътурал, хаснува Н.Г. Чернышевскил тИйкун, эшкъи-ччаву – цана ччан хъуманан, хъинмур, ххуймур, танан ччимур бавур. Му пикригу гъели бувну бур социализмалул зумуну инсан ххирашиврул. Вана ванийн бувнур цалва заманалул рухА цаву дурсса ХАадис ХАажиевлул назмурдаятугу халкъуннал балайрду хъусса.

Эшкъи-ччаврил мяъна ва даражалий дурсса назмурду тай шиннардий Дагъусттаннал цаймий миллатирттал шаэртуралгу буссарив, бакъассарив ттун къакАулли. Амма лакрал поэзиялуву ХАадис ХАажиевлул увкуну бур танинин щищакАуй учин къавхъусса цалва махъ. Шаэр шаэршиврун ккалли айссагу вай сипатирттах бурувгунни.

КутАану учин, ХАадислул поэзия цуппа чАивинугу, чАан куртАсса бур. Танал шеърирдаву бивхуну бур хъунисса, агъалинан агъамшиву дурсса чАумул масъалартту, мийннун жавабгу дуллуну дур исвагъину, марцАсса дакАнива нанисса гъилисса мукъуйну. Гъаннайсса, адаминал цалва миллатрал литературалуву цаява ххуйсса аьпа къабивтун бур.

Ванийну ХАадислул чивчуцири затирттал къимат бивщуну щаллу къахъанахъиссар. Му даву дахъар дайдихлахъисса. «Инкъилабрал ттугъливусса», «21 бувкАсса чагъар», «Жуав» тИсса назмурду ккалли дансса сававрай чирчусса дур.

**Москавуллал советрайн
Делегат гъан циванни?
Дардиран дару хъунсса
Дарман бан бюхълай буна...**

**Яру ялугъи банну,
Гъавалух буруганну,
ЦичIав махъун къабивтун,
Жува ца хъунмур банну.**

Вай ци сававрай, ци тIисса махърурив кIул бувну, бусан аьркинни. Танал чивчуцири шеърирду ттигу ялун личин, жучIанма биян бувар.

Жунма кIулли, МухIуттин Чариновлул кунна, «Интернационал» ХIадислулгу лакку мазрайн дурцуну диркIшиву. Амма жулла янин ккарккुकун бакъа тания гъалгъа тIаву пайда бакъар.

ХIадислул оьрус мазрая лакку мазрайн кIура баян бувссар А.С. Пушкиннул «ИвкIума» («Мертвец»), М.Ю. Лермонтовлул «Дуснакъ» тIисса назмурду ва цаймийгу. Аьркинни мийннул кIу-куклушиврухгу я битан.

1927 шинал Буйнакскалий итабавкъусса Саэд Габиевлул «Лакку чугурданул чIу» тIисса балайрдал жужран «Дайдихъуллул махъ» «Ххяхха баргъ» тIисса цашаврил жяматрал чулуха чивчуссар ХIадис ХIажиевлул. Лакку мазрай Саэд Габиевлул поэзиялун цалчин бивщусса къимат тари. Тикку ца кIанттай укун тIий тIайлану чивчуну бур: «Ва укунсса шеърирдал жангри жулвагу буна, жува чий дакI мяш хъанай занан багълагъаву хъунмасса зат бур...

Вай Саэдлул шеърирду бувккुकун, жунма аьямну чIалай бур, царагу жулла аьзизсса, мискинсса дардирал чIарах увккун къалавгшиву Саэд. Цумур шеъри буккирчагу, я угълил чIу, я леххаву тIутIаву баллай бур, цIаннаща ва зулмулуца миллат итххяххан бан бачи тIий»*.

Ва – поэзия цирив, мунил къадру цуксса бюхттулссарив вай ххару чивчусса ХIадис ХIажиевлул кIулшивур.



* Габиев Саэд. Лакку чугурданул чIу. – Буйнакс. 1927. Лаж. 5-6.



Махмуд АБЛИЛОВ,
Ккуллал район, ш. СумматГул



СУММАТИЛИВ ХЪУНА ХЪУССА ЩАЙХ ВАЛИ-АБДУЛЛАГЪЛУЯ ТТУНМА БАВМУР

Щайх Вали-Абдуллагълуясса хавар (бусала) махъва-махъ СумматГуллан бавну бур Султан Абдуллагълул душнил (ягу арнал) душния Шихшал Халуя. Мув Шихшал Халу аьпалул хьуну бур 1830 шинал 96 шинал оьрмулуну. Мунал цила ужагърай тивтГуну школагу, оьрчІан Къуран лахъхьин буллай бикІайва тІар.

Мунил бусаврийн бувну, Вали-Абдуллагъ сумматІлийчув къаивкІун ур, агана мув сумматІлийчув уния мунал тухум (нину-бутта, уссу-ссу, сеурахъ-у-хьинирвуагу икІанссия). Хаснува, мукун ца дурксса Щайхнал пахрулун, тухумгу бусланссия, чичланссия муная.

Халул хъунбуттал (дедушкал) дугъайсса хъуру диркІун дур «Лултту-къурув хъунламухалу» тІисса къурув. Интту хъу гъай тІий, хъа бугълагъисса чІумал, ахттакъунай кІиккун увкІун ур 8-9 шинавусса оьрчІ, щяивкІун ур марщай. СултІан Абдуллагълул «Ина чассара, щилла» тІийгу ссихІ къадурккун дур, я за дуки тІий, къадуркуна тІар, так хъарасрал хъирив къурнил нувци батІлай, канай ия тІар, ца цІувххукунгу Вали-Абдуллагъри куна тІар. ЩилкІуй шавай нану тІийгу къаувкІуна тІар. Ахттакъун бизайхту гъайтІавугу къариртуну, СултІан Абдуллагъхъулгу шаппай лавгун бур.

Яла СултІан Абдуллагълул кІа оьрчІая бувсун бур шаппацириннахъ, амма уттуивхъунгу кІа оьрчІ хъхъичІ ацІлай, шану къабиллалийни, хъхъудяризал, ивзун шания, оьрчІал хъирив лавгун ур. Ва ияннин, оьрчІ кІа цала къаивтсса марщай шанай ия тІар. ЧантІ учин увну, «нану ттушал» кувкун, ивзун, ссихІ-гу къадурккун, шавай цаяра хъхъичІ, кучарду цанма кІулний куна, шавай увххуна тІар.

СултІан Абдуллагълулгу оьрчІ цала яуллай, цачІава итан хІукму бувну бур. ОьрчІ ччяни шаппаминнахухгу лавгун ур, паракъатсса, увкумур байсса ия тІар.

СултІан Абдуллагълул мунал Къурангу лахъхьин бувну бур, лавхъхъуна тІар хьинну ччяни, луттирал цаппара лажинну дакІнихгума кІула тІар. Хьинну захІмат ххирану вардиш хъуна тІар, хаснува ятту ххирасса ия тІар. 15-16 шинаву оьрчІая ккаккангу авурсса, чурххалгу оьвхъусса чІава жагъил хъуна тІар. Цанма яхъанансса хъун бакъасса, лув ппал, ялув къатригу бувна тІар

«халватрахалу» тисса кІанай. Ганал кятрал эялал чартту бур Гьарунхьал ва Чассу Разухьал махІлалив. ХьхьичІра щин кьадиркІсса кІанаву, кьуви дурккун, щин дуркІуна тІар. Буслай бикІай, гьарал щинал щин гьарза шайва, кьурах шинал дукьайва тІий.

Вали-Аьвдуллагьлул ппалав яхьуну бия тІар чария бувсса ужагьрая ярагь (ккаччи кюнтІа, навтлил (майлул) чирахь, тІаннул урцІив, хьубухьу гьаяй ни-гьру ва м.ц. затру). Муналли тисса хІухчуйл кІира ттархь, кьуцуру, башлихь Шихшал ХалучІа дия тІар тІий бикІайва.

Адул АхІмадихьал ва Диллу Ражавхьал кьатрачІа, уттигу яхьуну бур, мув увкІун нюжмар-кьини чак байсса чІивисса кьатта (мунийн Вали-Аьвдулла-гьлул «Кьуплу» учай). Мивугу мийва чария бувсса ужагьрай ишла бай ярагь яхьуну бия махьнин.

Хьуна хьуну мукьах, цаламиннушал СултІан Аьвдуллагьлул яттугу ябайва тІар, гьинттул – Хьассуй, Щюллуй, кІинттул – ЯтІи Сунув, Кулливу. Гьинттул Хьассуй, Ччергьилу ардай яттугу кьабивтун цивппалу, чак бан ахттакунай шяраваллил мизитравун учІайва тІар. «Іна ятту щичІа кьабитав» кунахьгу, «ккаччачІа ва бурцІурдичІа» куну жаваб дулайва тІар. Шяраву яхьанай мунал 16 шин дурессия тІар, цалвагу мунал яттийн барцІ ххяхьсса иш хьуну бакьая тІар тІий бикІайва тІар кьари-кьужа. Шяраву колхозрал яттихІухчалт Ушан, Аьлил, Макьсуд буслан бикІайва ХХ ттуршукулул 70-80-ку шиннардий, Вали-Аьвдуллагьлул яттил гьаннарая хьусса хІайванналий ца кьукьу-линс ххишала чулуй бикІайва тІий.

Вали-Аьвдуллагь хьхьувай яттугу цивппалу кьабивтун, шяравун циванни укІлайсса тІий, жагьилтурал муная аьркин бакьасса чІявусса тІарду личин буллай бивкІун бур, валлагь, шяравусса цаппара «хьаннишал аьлахьлай ур», валлагь, СултІан Аьдул душничІанни укІлайсса тІий бивкІун бур, хаснува кІивагу шарнил мизитирттавуума муная гьалгьа тІий бивкІун бур, цикІулли бакІралгу авурсса, чурххалгу овьхьусса жагьил душру-хьаннингу ххуй из-лай ухьунссия. Буслан бикІайва тІар, шяраву ссувхІатрай, хьатІий ягу цамур тяхьашиврий мунашал 3-4 душ аьрхІал кьавтІун бизайва тІий.

Бюхьайва СултІан Аьдул ца бакьа бакьасса душ Минажат ххуй бизлай бикІангу мунал. Амма СултІан Аьвдуллагьлун мунал ххирасса цукІуй акьая тІар, цала арс куна аякьалулу ивхьунугу ия тІар.

Ахирданийгу, шарнил жагьилтурал кьютІну хІукму бувну бур, цаппара жагьилтал лавгун Хьассуйн, мунал бакІ лакьин гьинттул ивкІуну неххал аьтартувун утан.

Жагьилтал лавгун ЧІалай-рахІайх лавай, Хьассуйн, Вали-Аьвдуллагь хь-яврин ишин кьаст лархІуну бур, валлагь, вийн анаварну СултІан Аьвдуллагь оьтІий ия увкун. Мий Хьассуйн бивсса чІумал, Вали Аьвдуллагь чІивисса ххалабакІуй шанай ия тІар, чІарав цала бурчул усру ва ттархьгу дирхьуну, тамашасса иш цамургу бия тІар, яттугу хаяра бувну оьнтІав, лагмава бакІайх барцІру щябивкІун бия тІар, ятту ябуллай.

Вали Аьвдуллагьлун га цІана, чантІгу куну, бувчІуну бур гайннал дакІний-мур, усругу ларххуну, ттархь ва варсигу лавсун, яттугу кьабивтун «ххякІрал» ххуллийх шяравунай авчун ур, Хьунна рагІув ийяхту, Бартаарнил лув щинал кІунтІ кьабивкІсса кІанайн, ттархьгу щуну, «мякьнал щин хІачІан бикІуча ва щаращигу ттул аьпалун» куну бур.

ХІакьинусса кьинигу бур та щаращи, «Вали Аьвдуллагьлул щаращи» тІий цІагу дирзун. бувну, кьурах шинал та щаращи ппив бан, кІинничалтту бувцун, шяраваллил бувчІу, ттула ниттил ссурахьу, Ахьул ПатІу лавгсса чІун

хьинну дакӀний дур ттун. Мукумасса щаращи мув увчусса Уриннал шяравалличӀагу бур тӀар, къакӀулли, гъанна тӀий унува, гъан къавхьуну ливчӀунна Урив. ИвчӀаннин гъан шайрив ккакканна.

Яла, мувгу, мунал хьирив найсса жагьилталгу бивну бур, кур хьун, аьтара хьусса Хьун неххачӀан, тамашалий тия чулий цаппара инсанталгу бия тӀар. Мунал жагьилтурахь «чансса ссавур» дарагу увкун, ламуя аьтарттувун цала варси бувтун бур, неххал аьтарагу кӀибавчӀун, чӀивисса жазиралий Вали Аьвдуллагь чак буллан ивкӀун ур. Цала никиралун къючлайсса, неххавусса хьун бакьасса чаругу хьатлия хьатлийн бутлай, варсигу хьарайн бувтун, га итти хьунугу бакьая тӀар, шяравунай авчуну ур.

Шяравун ийхту, тамашалий щарнил агьлу бавтӀун бур. Мунал миннахь увкуну бур: «Зу ттуя буккан бувсса шярал хавардугу щялмахьрур, на 16 шинай явну тӀий зунгу, СултӀан Аьвдуллагьлул агьулданунгу барчаллагь, ттуя къаччан бивкӀналгу на багьишла итира.

Ва чаругу зуйн аманатри, къини дурксса чӀумал ва дарцӀу нигьлийгу агьгу бувну, ваничӀа хӀайван билуххира мий ттул яттугу зунмар, хӀайванналул дикӀгу микку гьаривнайх далучӀира, нудругу булуvara мув чӀумал, зул дакӀниймур барт лагавантӀиссар».

Та чаругу къабивтун бур СултӀан Аьвдуллагьхьал (Шихшахьал) къатрал чӀарав. Яла мунал дуаьгу дурну дур: «Я Аллагь, шяраву ужагьрал бурхьничув чан къахьуннав, зуйн ссав къадияннав ва ттуй бакьу бивхьунал ужагьрайгу ца бурхьничувнаяр лавай цама къахьуннав, цангу 30-40 шин дакъа къадулуннав» куну.

Вали Аьвдуллагьлухь агьалий миннат буллай бивкӀун бур, шярава малагара, цив багьишла бити тӀий, амма барчаллагьгу куну лавгун ур.

Та танал чару щилкӀуй, я цилцинттай бувцуну бакьар, таний духьунссар 35-40 кг. Валлагь, бунагь бунаца та цӀунучӀан бияннин гьаз бан къашайссар, тӀунгу бикӀай, бюхьай та агьгъшиврул канива личлайгу бикӀан, цал навагу гьаз бувссар, личӀину кӀуссагу бакьая, амма канива личлай бия.

Вали Аьвдуллагьлул нудру щаллу байва, шяраваллил агьуланулгу, щархьал бувкӀналгу чаругу агьугу бувну нацӀу-къацӀу дачӀайва бавтӀминнайх. На колхозрал председателъсса чӀумал, на ацӀаннингу, колхозрал фермардай КунуцӀув ва Хьуннахь хӀухчалтну буссия кӀия уссу-ссюрхӀи, Кьассагиял шяравасса, АьлихӀажий ва Аьвдуссалан. Гьарца шинал миннал Кьурван-зуруй ца-кӀива хӀайван ца-цаннал биххайва, чаругу агьгу бувну, дикӀгу агьалийнайх дачӀайва. АьлихӀажинал чӀивима арснал Вали Аьвдуллагьлул цӀагу дирзуна, СумматӀлив хӀухчуну зузисса чӀумал увну тӀий. Цибанссар, колхозругу хьамала дунни цаппара «колхозрал ятинтурал», хӀухчалтту лавгунни цала шаппай. Колхозрал «ятинталгу» цаягу авадан хьун най акьар тачӀаввагу.

Вали Аьвдуллагьлул аьпа абад буван, та танал къатта бивкӀиссар тӀисса кӀанай, «халватрах» ххуйсса зияратрал къатта бан бунни шяравучув, ДУМД-лул (духовное управление мусульман Дагестана) зузала, малла МахӀадов МахӀаммадрасуллул, ка-базу, танихсса багьа (арцу) дуркӀунни Москкавлив яхьанахьисса шяравучув Зьванов Арсеннул, мукумма мунайхчӀин магьигу дирхьуну бакьин бунни Вали Аьвдуллагьлул къуплугу.

Хьинахха Щайхнал аьпа абад бан ва даву дувавугу. Хьинну хьунссия, та чару Вали Аьвдуллагьлул бивхьусса кӀанайва (Шихшихьал) къатрачӀа га цува Вали Аьвдуллагь хьуна хьусса кӀанайва, чартту гиккува бур, ца чӀирисса далдалалугу дурну, ялув лахгу дирхьуну, биширча. ЦӀана чару, цӀуну бувсса халватрачӀа Гьарунхьал ппалнил хӀужралуву бур.



Абдуссалам МАГЪДИЕВ

СОЦИАЛИЗМАЛИЙН БУВКССА ШИННАРДИЙССА ККУРККУЛ

Зунтгал шархъаву Совет хІукумат дирхъуссар, лялусса ххаржан къадуркна, мюрайсса ттупранг бучІан къабувна.

Социалист революция ххув шайхту, аьрщи хІукуматрачІан дучІантІишиву, заллухъру циняв халкъ хъунтІишиву баян бувссар хІукуматрал. Чил захІмат канай бивкІсса помещиктурал аьрщи, Совет хІукумат шайхту, зехлан бай-бихъувссар. Баян бувссар аьрщи хІала даркъуну чІахху-чІарахмий цачІу зисса кооперативру, колхозру, совхозру, товариществорду дантІиссар, куну. Мунинсса хІадуршинна дан гьарца шяраву хъудугъултрал комитетру (кресткомру) сакин бувссар. Вайннал аьрщи чансса, дурагу дакъасса хъудугъултрайхгу дарчІуссар, ишла дуллан. Чил захІмат ишла къабуллайна зузи дуллан, цалла аьрщи авадансса хъудугъултрахъ къадиртссар.

Аьрщи мискинчунал кулпатрал букансса ччатІ буллан диркІссар, амма цамур аьркиншинна шаллу дан даххануксса хъунисса къадиркІссар.

ХІукуматралгу хъин чулий ккаклай, хъудугъултран цанмагу куннал куннан кумаг булларча, мяэшат гъаз хъун кунма чІалай, шархъаву цаппараннал хъуру аьмну ишла дуллай, ризкъи хІала бавкъуну, лухччинийсса даву цачІу дуллалисса мюрщисса кооперативру, товариществорду (ТОЗру) сакин дуллан бивкІссар. Му чІумалгу къачІа нунчІуллуйн къалахълан бивкІун бур хъудугъултрал.

20-чинсса шиннардил ахирданий шяраваллил халкъуннал мяэшат гъаз бансса цІусса мяэшатрал политика (НЭП) дачин дурссар хІукуматрал.

Ва мукъул мяъна къадурчІухъунссия гай шиннардий чІявумий зунтгал халкъуннан, амма хІукуматрал тІивтІусса цІусса мяэшатрал ххуллийн бувксса Ккурккуллал Нэпмантал бивкІун бур: Буттаев Жалалуттин, ванал уссу Щанххала, Чупалав Закири, Апанниев Бадави, Ххадиджал-ЛатІип, Мажидов ЛатІип, уссурвал Магъдиев Наби ва МахІаммадрасул, МахІаммадов Къурбан, ХІасанов ХІанзат, Тагъманов Загъиди, ХІажиев Абакар ва ванал арс Сайдун.

Вай дахху-ласу дуллай занай бивкIун бур шалва Ухссавнил Ккавказнавусса шагьрурдайн, хьунисса шархьайн. Лагайсса бивкIун бур Бакуйн, Ттуплисливн, Самаркьаннайн, Москоавлийн, Самаралийн.

НЭПмантурал мяэшат, багьу-бизу, культура чансса духьурчагу гьаз хьуну дур. Вайннал ларсун бувкIсса шарда дакъамур, чаралуха лавхьхьуну ласлай, дахху-ласу дан нанимийннашал цачIара думур гьан дуллай бивкIун бур шяравумийгу.

Шярава бувккун бур иш-бажаранчитал МухIад Магьдиев, АбдулпаттахI Магьдиев, ппу ва арс ХIажиев Абакар ва Сайдун, ЧIянкIулавхьал Сулайман. Цинугу Ккурклия бувккун бур шяраваллин хас бакъасса 21 машачийтал ва ишбажаранчийтал. 30-кусса шиннардил дайдихьулий ВицIхьав хьхьичIва-хьхьичIсса ттучан тIивтIуну бур Магьхьал МухIадлул. Шиву дахлай диркIун дур къушлий аьркин шайсса, цIуну багьу-бизулувун духлахисса матахI, цIусса журалул янна-ус, тахта-тIамагума. Дахху ивкIун ур лаялий увгьусса. Ттучан лавкъуну бур цува ккулакнан ккалли уллалисса шиннардий. МухIадлул УрттицIсса хьюву 200-ннийн бивсса мюрщисса, хьунисса лухIигьаттара бия. Хьунимий баххайва, мюршсса бярчу, къункри машин ласайва, хьуни бувну баххан. Барчан бикIайссия Гьумукун, ЦIахьаравн, цаймий кIанттайн кирилий булайсса. Гьарца базар къини ЦIахьаравн лагайва аьравалттущал, халкъуннал лавъсса къалмул гьиву ларсун учIан. МухIадлул 60 найрал хьурзилугу дия. НицI супралия къадукьайва, мачча дурна дикIайва, натIухI ххирая, дукралул ялув ацIайва. Аьгьумунил, нацIумунил чурх татан къабарча, инсаннаца зун къашайсса, аькълулул къуркъасса икIайсса, оьрму кутIасса икIайсса, тIий икIайва. НицI гьанчунайх дачIайва, ласун чара бакъасса кулпатирттавун гьан дайва.

НЭП социализмалул мяэшатрал политикалуцIун даркъусса дакъашиву, чара бухлавгсса халкъуннал ахIвал ххуй шайрив ккаккансса чIумуйсса бурхIайх къабулай ххулу лякълуйх буллусса политика душиву буслай диркIессар Совет хIукумат. Ва мяэшатрал ххуллих бачирча, кунная махьунмай цIунилгу буржуйтал хьун най бивкIессар, хьудугьултрая буржуйтал хьун най къабивкIессар. Мунияту НЭП-рал ахир дирхьуссар хIукуматрал.

30-кусса шиннардийнин шяраваллил хозяйство личIаннинсса отрасльлу социализмалул ххуллийн дурккун дур. Аьрщи най дунура хIалакъадирчуссар, миллионну хьудугьулт революциялул чулух бацIаншиврул. Гужирай хIала дирчусса дачIрасса аьрщарая хьудугьултрал ласласимур чансса дикIантIиссия. ЧIявумий хьудугьулт шагьрурдайх ппив хьунтIиссия. Ванищалва шяраваллил шагьрулул халкъуннан булайсса ччатI, сырьегу чан хьунтIиссия. Чансса хьудугьултраца чIирисса аьрщарая хьуннасса доход ласлан инсантурал кIанттай зузи дайсса техника га чIумал хIукуматрачIа къадиркIессар.

20-кусса шиннардил ахирдания шихунмай партиялул ва хIукуматрал, кIура-кIура баллай, цимийгу хIукму бувссар колхозру дан бучIиссар, му дансса халкъуннал рязишинна дусса, халкъуннал мяэшат шаллу буллалисса аьрщарай тIисса. Оьргъасса аьршигу, рязисса халкъгу бусса кIанттай колхозру дуллан бивкIессар. Колхоз дурсса шяраву аьрщи шалла ишла дуллан бивкIессар. ХьхьичIва багьана-савав хьуну дугьан къархьусса, дургьуну махь къуллугь бан къавхьусса хьу, буцан къавхьусса ххулу аьдада личIлай бивкIессар. Колхозрал хьу-лухччи, иш багьну, даврийн къабуклакисса бухьурчагу, ишла къадурна къаличIайсса диркIессар.

Цува заллусса аьрщарай зузи дансса техника ласунсса чара бусса хьудугу ивкIссар чин кьахьунссар. ИвкIун, ларсун га мунпятирай зузи дануксса хьуру хьудугул дакъая. ДиркIсса чIумалгу техника зузи дан кIулу акъая. Колхозрал аьрщарай техника зузи дангу шайссар, зузи дан га ласунсса чарагу буссар, мудан зузисса техникалул рульданух шьяикIансса инсангу хIадур айссар. Техника ласунсса гуж бакъасса колхозран, ягу чIирисса аьрщарай ххирасса техника ишла дулларча, колхозрал мяишатран заралну дацIлай духьурча, укунсса колхозирттал чIумуйсса ишла дуллан хIукуматрал кIантту-кIанттурдай шьяраваллил хозайстволул техника дацIан дурсса станциярду (МТС) буллан бивкIссар.

Аьршигу шаллуну ишла дуллалисса, кушугу цилла чIумал, техника ишла дурну буллалисса, колхозрава дуркIмур цахьра-цахьрасса аьрщарая дукIлакIимунияр ххишаласса диркIссар.

Ца колхозру дан анавар мабуккару тIимур дара бивкIссар Дагъусттанналмур. Билятрай микку-тикку колхозру дуллай бур тIий баллалиний, Дагъусттаннал зунттавугу дуллан бивкIссар, халкъуннан ччай бур тIий, хIукуматрахь. Ва хъанай дия щарнил, районналул бакIчитурал цивппа хIукуматран хьин янин ккаклакисса даву.

КуркIлив аьрщи хIала даркъусса товарищество сакин дурну дур 1935 ш. АьрщарацIун ятту-гъаттарагу хIала бавкъуну, колхоз сакин дурну дур 1939 ш.

ЦIу бакIрайсса колхозирттайн бувккун, 1980 ш. Москвалий ттухьва ца къужлул бувсмур дакIнийн багъунни. Щарсса ттучанналува дукканнин, къатлул хьхьичIсса хьюву шьяивкIссия лахьуртгуй. ЧIаравмуний цувалу шьяивкIун ия чIалачIиссаксса хьуннасса къаркъала дусса къужагу. Тамансса хIаллай лултгучIин ттух уруглайгу ивкIун, ивзун ттул чIарав шьяивкIун, къужлул хьинну къюлтIну вичIилухун цIувххунни ттухь часса ура, куну. Бусав Дагъусттанная ура, куну. Ци учин ччай уссияв къакIула, зуйн вихшала дишин бучIиссар, кунни.

– Арс, колхозру зучIагу дурив, – кунни къужлул гукунма вичIилухун.

– Дур. Колхозру шалва билятрай дуссархха.

– Халкъуннайгу, аьрщарайгу хIукуматрал бувсса ябацIу зунгу чIалай бухьунссар, – кунни къужлул, цахьва цала ттух къаурувгна.

– Ппу, Москвалийсса вин цукун кIулли гай шиннардий шьяраву хъанай бивкIмур?

– Нагу Вологодскай областрайсса шьяравассара. 1931 ш. жул шьяраву жулла карунних ках тIисса хьуру, ятту-гъаттара зевххуну, ттушагу накунмамийнацагу, цивппа заллусса хьунил зуманий ччан къабивзсса, хьурссул кIайму канил къабувгусса, хьурссулу бахIин ниц къабивкIсса, къалмувусса чалтгук кунмасса, тярашнахьхьун буллуну, колхоз дунни. Ца заллу акъасса къур бяртахьай бивхьуну мукьра шин хьунни. Къама бувгъуний, чIяхь хьунни, ххулу ццуцуву ливчIунни. ХIасил, гьагьин дан гъарахьалу дунни, га зузи дан нех дакъасса хьурув.

Нагу, накунмамийгу колхозравун къамул къабунну. 1933 ш. нагу цаппара цаймийналгу колхозрал правлениялийн аьрзри чичарду, хьу дансса аьрщи дулара тIий. Буллунни чарттал, къунттал бувгусса, аьрщи къачIалачIисса, инсаннал ша къабивзсса кIантту.

МарцI барду, гьай чарду, дургьуну чIярусса бакIлахьру ласарду. Жухь цIухлан бивкIунни колхозрал, Советрал бакIдугулт зул чарттаву цукунни

дургьмунил чІан щунсса, чІали бувцІусса, колхозрал хьурунная дургьмур цанни къадукІлакІсса, тІий. Жу учарду ва жу дугъай аьрци дурсса чарттал кІантту мудан бачІва бивкІссар. Зу бавтІун жул аьрщарайн бавкъусса аьрци дакъа бивкІмийннал, жу дурсса кунна, цанна хьуру цанни шикку къадурсса? Аьрщараву цалла рухІ дирхьуну зий бакъа тІий. Бигъа буки – ини буки тІий, ирсирай нанисса буну тІий.

Буттал буттахъая шихуннай ттуйнна дурксса, ттюнгану къуллугъ бувсса аьрци лирчІсса куццуй, дакІ аьтІий дуну. 1935 ш. Москваливн ливхъссара на. Нава шикку унагу, лякълул оьрчІру кунма, дакІнива къадуккай заллушиву данма акъа къадиртсса хьуру, ризкъи. Ва ттул ихтилат щихъчІав мабусанна, хьунилгу, ризкъилулгу заллушиву дурну, колхоз халкъуннан мунпятну зузи къадуллалимийннаясса дунагу, хІукуматрал цийнна ларсун, ттул вилаххавсса лах ххюлтІу бувну, пуркІураву ккулак къачІалан.

Къужлул ихтилат къуртал шайхту, на ганахъ ци-бунугу учиннин, ттучан-налува щарсса дувккунни. Нагу ивзра лахьурттуя. Ивзун лавай, ттул хьхьичІ авцІуну, кагу дуллуну, къужлул увкуна вайксса шиннардий ттувува бивтмур бувсун куклу хьун бакІрайн агьсса ина оьрмулул уччиннав, оьрчІал ххари аннав, ичІувассаннал пикрирдахун къаагъаннав, куну. Лавгмур хъама битансса ххаришивурттава инагу къаукканнав куну, жу лавгру.

Ккурклив товарищество сакин дангу, колхоз сакин дангу бажаранчийтал бивкІун бур ХІусулавхъал МахІаммад, Халулавхъал ХІажимахІаммад, Къарахъал ХІамзат. ХьхьичІа-хьхьичІсса пирсидятІилну ивтун ур ХІусулавхъал МахІаммад.

Колхоз сакин дурну махъ хьусса укунсса зад дакІния къабуккай. Жул кІива ниц бикІайссия гьарца базар къини аьравалттулу базаллувун лагайсса, ризкъилун дичинсса нахъ, ххулу ласун ВицІхьиял щархъавун заназисса. МухІад-буттал, УрттицІсса хьювумий ризкъилучІан къабавкъуна, хьхьувай вай шаппа битайва, захІматраха лавхъхьусса къуллугъгу бан аьркинссар вайннуха, тІий. Урттия бувкІун махъ, хьхьудяризал, кІюрххицІунмай буттал вайннун ххулу, нахъ, мюрш дурну рикІирах, хІаржулттуршал къяртив дичайва. ИлтІа къахьун, гьарца хьхьуну лухІихьюрурал иникІмалия гуржив дурну, дулайва.

Колхозравун вайгу бувцунни. Вайннул дачІи шин ххишалагу хьхьунссия кІюрххил колхозрал фермалия урттивн бувцуну наниний, ахттакьунмай къурату фермалувун бакьин бувцуну наниний, ххуллуву ккурчІайвасса «цала къаталун» бувкІун, хІухчил къабувцуна къалаглай. МухІад-буттал, жулва бивкІсса чІумал кунма, ссурсулухун массаж бувну, чапал хьуну бухьурча, марцІ бувну, бурхІайх ках увкуну, ахттакьунмай бувкІукун, гара ярмалул гуржигу дуллуну, гьан байва фермалийн буцин увкІнащал. Буттал нину, ттулла нину хьювуссул буклай бикІайва, шаппайн бувкІру тІий, «мугъ»-лищал бувххукун, лавгукун ницру. МухІад-буттал дакІгу дурчІайва, ганал гьаттарайхсса ттюнгъасса кахшах чІалачІиний, кІичІиравух нанисса ницах уруглай авцІукун, къапулуву.

Ризкъилунгу цанмасса аькълу бикІайхьунссар, укунмасса цамур ишгу хьуссия ххюцІалкусса шиннардий. Оьл бавххуссия Кумиян. Барз ххишалагу хьунни гьарца къини ливхъун шаппайн букІлай. Дяхтта бучІарча, Кумату бувкІун бувцуну лагайва. ЧІал чІумал бучІарча, ниттил, жулва бусса чІумал байсса къуллугъгу бувну, ппалавн бакъайва. Лагайва, хьювух лихълайгу бивкІун, гьан къаччайна. ДакІнин хьинну захІматну бикІайва шаппату гьан къаччисса оьл. Нину гьан къаччисса оьлил хьирив хьювуссулну дуруглан

диклайва. Ца кьини ниттихь учав, ваксса жучайува лихъан къаччисса, заллу кълусса оьл жучава бити, Кумиянгу ваних дуллусса арцу зана дити, куну. На увкумуния ххари хьусса нину хьювуссул дурккунни, оьрчІру, ххари хьуну, тІанкІа тІун бивкІунни. Оьл Кумиял буцин къабитарду.

Барзру хьуна МухІад колхозравун ларсъсса 50 дачІу дугъайсса хьуруннийн, халазаннайн иллай, гай цукун дурив ккаккан. Левкъний чІира бувну, хьу мюхчан дав, ххалазанну цуццуцІа марцІ дав, даврил цибави, заллу акъашиву чІалай бия тІий, учІайва.

Колхозрал сипта бувтсса чІалачІисса давугу хьунни гай шиннардий. 1938 ш. колхозниктурал цалла карунних ВицІхъавсса ххали-чару бусса, тавтсса кувссал кІантту марцІ бувну, кІира гектаруксса багъ бунни. Шикку бикІайссия личІи-личІийсса журалул ахъвазанналул, цІулитул, бяълилул, ичул (гъивчул), кяканналул мурхьру. Багърал ялтту, муруллул лултту ттуршрахъул метрардал манзилланий бюхттулсса, ВицІхъиял авур дучІан дуллалисса ахттаракрал мурхьирдал ша бикІайссия. Мурхьирдайнгу, багъравунгу дичин шин дурцу-ну дия ЧукІундалавл гъарахъалттила дурккун нанисса неххая. Ххюра-ацІра шинал дянив ахъулссаннул мурхьру бивзунни Сумулу, ЯлувхІатталлий, ЛувхІатталлий.

1939 ш. колхозрал цимий гектар аьрщарал дуркІссарив къакІулли, цивппа заллусса хьуру дусса цавагу кулпат ливчІун бакъая. Колхозраву 2000 бакІ яттил бивкІун бур, 160 га хьунил. 1948-1949 шш. колхозраву зий бивкІун бур 120 инсан. Вайнная 3 бригада бувну бивкІун бур. Гъарца бригадалуву 7 чутсса зузи ницру бивкІун бур. 50-кусса шиннардил дачІиннуй колхозрал диркІун дур 180 га дугъайсса хьунил, 70 зузи гъаттара, 40 чу, 2500 яттил хІайван, 80 оьл, 180 бярчру, къункри.

КолхозрацІун дархІуну диркІун дур хІукуматрал арнил кІанттайсса аьр-щигу (Львовский 10), чІаххувсса зунттайсса бизанттугу.

КІинттул колхозрал ятту, гъаттара къутанналий ябуллай бивкІун бур. Шик-кусса аьрщарай ппиринж бугъайсса бивкІун бур. Къутанналул колхозраву зузимийннал доход хьунна дуллай бивкІун бур, чансса бухьурчагу мяэшат гъаз буллай бивкІун бур. Къутанналий зун сезонналул чІумал шярава лагайсса бивкІессар. ДакІний бур, лялу ххаржангу дархІуну, аьравалттушал най бив-кІесса Гъазихъал Кумсият, Уммухъал Загъидат. Къутанналий гиккува ялапар хъанакъиссагу бивкІун бур. Мийнная дакІний бур ЧукІундахъал Аьлабуттин, ХІусайнхъал ХІажидауд.

МухІад-буттал ххалазантту, дучри бахІайсса, ницру итабакъайсса къанну, гъаннугу ларгунни колхозрахъхьун. КІира дия ляличІину хьунисса: ца – Щи-рухъату Чартташалсса дазуйн дияннин гъаз хьусса Магъилгъан; ва ТтарцІ бавцІусса, ччан лув бишин захІматсса сунату ххулу бан МухІад-буттал, багъа буллуну, буцайва. Хъаннил бригада бикІайва цулуй. Цулуй шайва 4-5 гъантта. Ххулу къакъан бан, кІура баин бан лагайссия жу, оьрчІру. Къавкъукун, бавтІун, ялавай ччех бивтун, Щирухъун бучІан бувну, хъаннил къарду дахІайва. Бутта, кІира аьрава дурцІуну, шавайн лагайва.

Хъами лагу лахъайва, бугу бучІайва ва ахир къачІалачІисса сунух. Жун, ххулу батІлатІисса оьрчІан, бучІан захІмат шайва. Ца чулуха, ччанну ччех бивкІун, бурхІай тамансса ялавай бичайвав, кІилчинмур чулуха, ялату урувгу-кун, чурххавун нигъ дагъайва. Мияжанссар, циняв оьрчІан къашайва укунсса

асар. ДакІний бур лавай бигъану лавхъсса жушалвасса ца оърчІ, ялавай учІан къашай тІий, хъювусулу шяивкІсса. Ганал лув ацІлай, ка дургъуну, шяивкІун уна, ялавай учІан уллай увчІссия къанивн.

Ва ххалазаннуй чІявусса ххулу шайва. Гъантри шайва гъарца къини кІи-кІи-ра аърава дурцІуну, хъаннил къарду дархІуну ххилай.

Магъилгъаннавмий ххулу чансса ххялтІасса суннил ххулу бия, амма ризкъилун бузссар, тІий икІайва МухІад-бутта. Ва гъануксса дакъахъурчагу, хъуннасса ххалазанну дия БуркІуллхмур. Ва даралун укунсса ца дуллусса хавар бикІайва ппухълунначІа. Шикку буркІру, яъни, вахІшисса дунгъузру бивкІун тІий. Шиккусса къур ттурлу дишайсса, хъхъемал-щинал бувччусса, ццунсса, инсаннал къаркъалттушалсса, тІутІал шап увкусса бикІайва. Цулун захІматсса бия.

Лув учІан-лахъан лахъдакъасса гъартасса ратІ дия. РатІув чІявусса чІягъа бия. Буттал гайгу ххартІ байва, бурувсуну гъаттаран булун. РатІух тамансса нех най дия, Ккурккуллал ва Кумиял къурух нанисса. Зуманий хъунмасса, дяркъусса щинал щаращи бия. Шикка ласайва щин ххалай цулуцимийннал. Щаращул хъхъичІ хъунмасса хъхъунцІа бия. Зумардайх мархъру бай уртту дикІайва. Вай дия кІукІлусса, лахІан дурну, гъақъагъайсса сума, ягу урттул къяртив. БувкІун шярава, вайннуя мархъ щашайссия. Гъаваллавух бишлай бикІайссия, цуманалмунил хъунмасса «хъхъев» учайрив ккаккан.

БуркІуллх бикІайва хъуншатригу. Цал-цал цулуцисса хъаннил миХІирахъ-хъун биривну, бивкІусса ишгу шайва, цал-цал ччаннала ливхъуннитІий, хъами, вев-шев тІий, лихълан дикІайва. РатІувасса, хъхъунцІуллувусса, къанивсса шатри хъуниссагу, къацІ чайссагу бикІайва. Ххулу буххайва ттукрай. Бувххуну махъ МухІад-бутта ва гъаннил кІанттай, маршардий дучри бахІлан икІайва. Вайннунсса уртту ххалал чІанулу дикІайва, муХІирахъхъунгу къадирирна.

КъацІ учайсса хъунисса шатри бикІайва ГъарачІав, Кумиялнихсса ратІнил тийсса къурув, ХІусулавхъл ахънил даралуву, Ялув шярайгу бикІайва хъун-шатри. Шиккумийннул загъру бутІайсса къацІ къаучайхъунссия, кІивахсса халкъ нигъа къабусайва шатрая.

20-30-сса шиннардийсса чІярусса шархъл Советрал персидятІилтал (ва чІумалгу шяраву вайннайн юзбаши тІийнма бивкІссар), ванал лагма лавгмий бивкІссар оърусрай буккин-чичин къакІулсса, хІукуматрал лавсун нанисса социализмалийнсса ххуллу къабувчІусса, жулама цузив, душман цумарив личІи ан къашайсса, ттинийннин жяматрачІа бацІлай къабивкІсса чаралул мискинсса даражалул инсантал. Вай хІукуматрал къаралланийгу, жяматрал къайгъурдалгу чІарав бавцІуну бивкІссар цалла акълу-кІулшилуха лавхъ-хъуну. Давриву хІукуматрайн тІайла бакъамийннал чул бувгъусса кІанттугу шайсса бивкІссар, хІукуматрал хъхъичІун къабуклакимий, цалва захІматрай уччинсса ччатІ канакимий халкъуннал душманталну чІалайгу бивкІссар.

Тти циппа ялувн бувкссару, нунцІлул букан банну ссуркъяпри, бурчул усру лахлахи банну, уссувун къюллу бичин къабивтна тІий, сси бунай ссан дизлазиссагу бивкІссар шарнил бакІдугъултраву.

КІанттул халкъ укунмийннайн къаршину буклан бивкІссар. ХІукуматралгу вай цийнма къаршину булакисса ххай, чІалакъачІисса душмантурал чул бувгъусса кІантурду шайсса бивкІссар.

ХІукуматрайн «къаршимийнная» марцІ дурна жул чІаххувсса шяравалу. Ва дия хъуннасса, халкъ чІявусса, аърци чансса, чІявумий халкъ мискинсса.

Хъувату дуркIсса бакIлахъру хъунисса хъудугъултрал кулпатирттан дачIи шинайрагу къадияйсса диркIун дур. Мияйжанссар, ужагъру бивкIссар ххюва, ацIва, ацIния ххюва яттил хIайван буссагу. Шинай цал биххайсса ца, шан-ма-мукъва хIайваннул дикI шалла дукансса чара бакъа, базаллуву даххайсса диркIун дур, шайссаксса кулпатрал мяэшат, багъу-бизу лахъбан.

БивкIун бур шяраву ххюцIалва, ттуршва яттил хIайван буссагу. Вай циппа бивкIун бур, цалла яттил хъирив ттархъ дургъуну. Вайннал оърму най бивкIун бур чурххая янна, ччанная ус лирккун, бакIрацI кIаралу бивхъуну утту къабивхъуна, дукра къадуркуна.

Цаппара щархъал бакIдугъултран, цIуну хъусса активистуран цалва захIмат бувну бакI буклакимий, хIукуматрайн къаршину чIалай бивкIун бур. Букан ччатI бухъурча, хIукумат цумур журалулмур хъинссарив къакIулсса, пIартIия тIий балларчагу, ва цирив къакIулсса зунттал авдалтурая кунная ккулактал, кунная буржуазно-националистический партиялул члентал буллай бивкIун бур. Уку-укунсса бакъулт бихълай, ва шяравалу чIявусса къатри бачIва ливчIун, лелуххантрал кюрттайн кIура даен дурну дур Советрал персидятIилнал ва шама-мукъа му кисси уллалисса активистурал, ккаши башлашисса мукъцIалуннайн бирсса ужагъирттал царду дуллуну дур органахъхъун, вай хIукуматралгу, халкъунналгу душманталли, вайннацIа шяравалу марцI дан аъркинссар, тIий.

Вай «халкъуннал ва хIукуматрал чIарав бавцIумий» хъинну рязий бакъа бивкIссар чIаххувсса щархъал бакIдугъултрая, циппа кунма, Совет хIукуматралгу, захIматкашналгу чIарав бацIлай бакъар, тIий.

Цува рязий акъашивриясса ихтилат дурну дия ва советрал персидятIилнал МахIаммадлул Ккурккуллал персидятIилнащал Къарахъал ХIамзатлушчал Гъумукун Исполкомрал совещаниелийн нанисса ххуллий. Хъусса ихтилат ХIамзатлул ацIрахъул шиннардил махъ бувсуна ттухъгу, цаймийннахъгу.

– ХIамзат, на 40 инсан ккаккан ав исполкомран шярава бувгъуну гъан бан аъркинсса. Ина Ккурклияту цавагу ккаккан уллай акъара. ХIукуматрал тIимур бувчIлай бакъарив, ягу ванийн къаршину урав?

– Ккурклив цавагу ккулак акъар. ХIукуматгу, цалва захIмат бувну, уччиннин ччатI канакима, халкъуннал душманни тIий, дакъар. Зул шяравугу ца инсан уссар, ина кIисса тIитIин бюхъайсса. Ина ккулактал буллалимий, ччанная бурчул усру къалиркна, чурххайсса хIухчил яннагу лирккун, кIукIлусса шаний утту къабивхъуна, дякъийгу, марххалттанивугу, къарчI бивкIун, шяв утту бихълай къачIа нунчIуллуйн къалархъсса пакъирталли. Щар малияв, щарния барачат гъан мабав. Ина, чIунгу ишла дурну, шяраву ччаннай авцIусса чув къаитарча, вана на вихъ ттива буслай, ина, шярайх уклай, щархъайх занантIиссара. Вил барча бакъашиву тахсир бакъасса щарнил агъулланийнгу диянтIиссар.

– Ттисса хIукумат миски-гъаривналли, ХIамзат. Бакъанахъ мяш тIий бивкIсса ятту-гъаттара, хъу-лухччи зерххуну, мара куну, махIрунну ливчIун бивкIмийннахъхъун дуллукун, циняв архIал бацIантIиссар, цинявннал даража ца хъунтIиссар. Цавагу аваданссагу къаикIантIиссар. Дахъа пиш тIун бивкIсса жяматрахан бахкъачилан, сурду, ппаллу, мащив дачIра личIан дурну, шярава буккан бан аъркинссар. Ина ура, ХIамзат, Ккурклив ккулактал бакъассар, тIий. ЖучIанияр ацIила авадансса ккулактал бур зучIа. ХъхъичIа-хъхъичI, инава, инава кунмасса вилва ссурахъал Шяпи, АбдулпаттахI, ниттиуссу МухIад, цаймийгу. Ина къабарча, на банна зулссагу.

– Ина ккулакталли тИцирив, цалва захІмат бувну, ччатІ канакисса захІмат-кашри. ХІукуматгу циняв маз шях буклакисса, кару цаймийннал хъхъичІун дугълагъисса мискинтал бикІан аьркинссар тІий дакъар, мюнпат ласун хъ-у-лухччигу дуллуну дакъанан, я цува-цува зий, я хІала дирчуну, архІал зий цинявннан буллугъсса оьрму булунтІиссар, тІий дур.

Ва ихтилатирай най буна дучрай, Гъумукун бивну бур.

ХІамзат буслай ия, исполкомрал персидятІилначІан, ххюлусматусса МахІарамлучІан, бухханнинсса хъхъичІ къатлувун увххукун, ацІа-ацІния ххюва инсан ия таначІан буххан ччай. На бухкІуллувун уххайхту, МахІарамлул кабинетрава увккун нанисса адаминал, на ккавккукун, персидятІил вих ялугълай урча, анаварну таначІан ухху, кунни. На кабинетравун увххукун, МахІарамлул ала-лавгу бувну, цалва хъхъичІсса столланух щяивтун, цІувххунни МахІаммадлухъ, ци тІий уссияв, куну. Ттун бувчІунни га ванацІан ттуятува аьзирай увххун ушиву. Лах1-ккухІ къабувна, бусав ххуллийх хъусса ихтилат. МахІарамлул ттухъ увкуна, ва ур цинявннан чІалачІисса «халкъуннал цІаний» щар пели-хъили дуллалисса, цалла дуллалимур цанна къачІалачІисса, духІин дакъасса, аькълу-кІулшилул мискинсса адамина. ТтучІан увкІун, ина персидятІилшиврияту укъан увну, увгъуну, акъа ан аьркинссар, тІий ия. На ванай аьй дуллай акъара. Инания, ттун увчІуссаксса, аькълулул увччусса, ца бачІвасса мукъул инсаннал къадар чичайсса чІун душиву кІулсса адамина ура. Га цалва мискинтал Сибирлийн гъан буллалисса инсапдакъухъ укунсса ихтилат дайссарив! Ттул кІанттай цама ивкІун, ванал тІикун бантІиссия. Ттиния тийнай, душман вихлувассара тІий, бусласисса мукъувугу икІан бюхъайшиву кІулу икІу. Давриясса ихтилатгу дурну, увкІра шавайн.

Ххуллийх пикри булла ивкІра хІукуматрал чул бишлай бур ттинийннин бара кумур бакъа бан къакІулмийннайн. Хаснува шяраллил кІанттай. Вайнनावу чІявумий ванил мурад къабувчІусса бикІантІиссар. ЗахІмат хъун най бур Совет хІукумат цІакъ дан, халкъуннан ва дурчІин дан. Ва персидятІил кунмаийннал, цалла гъухъ дуккан дурну, лухччиния ччатІгу, дикІгу ласласимий бат бавай бур, захІматкаш дачІрасса ссавнилу личІавай бур, тІий.

МахІаммадлул ва щарнил ахиргу ХІамзатлул тІийкун хъуну дур. 1937 ш. ваналгу, ванацІун ка бавкъумийнналгу кІисри тІивтІуну, ацІахъул цивппа ссал тахсирну гъан буллалиссарив къакІулсса хІухчалт Сибирьнавун, Казахстаннайн гъан бувну бур. Дяъвилул шиннардий ккаши багъну бур шяравун. ХІамзат буслай ия ца къини, ларзулу кІюрххилсса канай буна, хъювату «садакъа бувара» тІисса чІу баюнни. УвчІунни га МахІаммад ушиву. Щарссанихъ учав, дурккун чурттул бакІрайн, га саилнахъ шийн лахъу уча, куну. Лавхъун, ларзулусса цайнма ящайхту, къацІлива заэвсса чІугу буккан бувну, махъунай лихъан къас дунни. Лимахъара, ттул чІарав щяикІу, кІюрххилсса дукан, мукъавсса къуцуригу та яхъулу бивхъуну, учав. МахІаммадлул, уний авцІуну, увкунни: «ХІамзат, ккашил къазразан увну, къатлува къатлувун нанисса на зул къапулухъ къалавгна, зучІан увххун ура. Ина ккавккукун, га ина ттухъва шярайх уклантІиссара кусса махъ дакІнийн багъунни. Ттуща вихъ багъишла ити чин къашай, гъарзад ина тІийкун хъунни. Щарнийх къини дурккунни». Хъювату вил чІу баюкун, га чІумал нава вихъ увкумур ттунгу дакІнийн багъунни. Лавгмуния гъалгъа тІурча, ихтилат лахъи хъун най дурча, кІюрххилсса дукан щяикІу куну, чІарав щяитав. ТІайла укав, къуцуругу дуканмунил бувцІуну.

Оьрмулугу оьмургу, хьинмургу архІал бачайхха, гай оьшивуртгал ялтту ххуймургу эькилавгун чІалай бур. Бувгуну гьан бувцири шьравува ливчІун бивкІссания, гайва хьудугьултну, хІухчалтну бикІантІиссия. Шьярава эькиливчумийнная чІявумий бувкІунни инженертал, техниктал, врачтал, цаймийгу, лавгний ишла дан бюхъайсса касмурдугу ларсун. Вайннал насрулия хьунисса паччахІлугьрал кьуллугьчийтал, элмурдал доктортал хьунни. Циняв кьатригу лавсун шагьрурдай мина дирхьуну бур. Цалва кьатригу я левкьун, я чийх бувккун буний, шьяраву цІусса кьатри бувсагу хьунни, цивппа ялапар хьанай бакьанагу.

Ца шьяравун чьвхъа бувкун, чІаххувмунийнгу кьув-аьслил чІурдугу баяй, гьарал вирххугу ялтту лагай. Га заманнай шалва ВицІхьиял махІлалий ца партИийнай организация диркІун дур. БатІаву Ккурлив дайсса диркІун дур. 1930 ш. циняв коммунистал бавтІун собраниялий Магьихьал МухІад, ванал арс Шьяпи, уссуыл арс АбдулпаттахІ, ссил арс Кьарахьал ХІамзат ккулактуран ккалли бан аьркинссар тІисса районналул тІалавшинна дур куссар парторганизациялул секретарьнал Муккуриятусса Адамлул (аьрзри бувмий кІулну бур, тти гайннал насрулун кьакьамулсса бутгахьал дурсса даву итгав кьадугьланна, цІарду кІицІ дурну). Вай ккулактал бушиврущал, агьлу хьунмасса шьяраву Совет хІукуматрал дуллалимунил хьхьичІун багьлантІисса, халкьуннал ччаннай ччан бизлантІисса элементрур тІийгу бур куссар. Коммунистурал бачІи органнал тІимунисчал рязий хьуну бур, бачІи кьарязий хьуну бур. Цалва ихтилатиргтавух укунмийннал увкуну бур Магьихьул Совет хІукуматрайн ца ягьалсса махь тІий бавсса цавагу акьару. Вайннал миски-гьаривнан кумаг бай, маслихІатрайсса бакьа махь кьабусай, шьяраву дакьаву дай. Ккулакталгу бувну, вай шьярава гьан барча, шарний барачат гьантІиссар, вайннал кумаграх ялугьмий махІрунну личІантІиссар, куну. Га чІумал секретарнахь кІива чІу бивкІун бур, ва ишираву кунма, чІурду кІибавчІусса чІумал цалва кІилчинмур чІу цания цаннан буллуну, чІявумийннал тІикунсса хІукму бан. Цалва ихтилатраву ванал увкуну бур, цу Магьихьул ккулактал бан кьарязимийннал чулух уссара, цалва кІилчинмур чІугу буллалиссара вайннахлу, АбдулпаттахІ ва ХІамзат бия Советрал персидятІилталну. МухІад ия районналул ревкомрал членну. Вай шамагу зий бия совет хІукумат цІакь дуллай, вардиш бакьасса жулва халкь хІукуматрал ххуллийн буккан буллай. ХІукумат вайннай цукунчІавсса аьй ляхьлай дакьая ттинийннин. Вайнная хІукуматрал душмантал буллалимий шьяравур бусса. Мий ттуннир зунма кІулссар. Бачи дан кьабакьайсса лухІисса ттангьа кьаданнуча марцІсса шарний, куну. Магьихьул га ппурттугу бувкссар бухьтанналула.

1931 ш. партсобраниялий вава масала цІунилгу бишин бувну бур. ЧІурдугу буллуну бур, гава дукІу кунма, решениягу бувну бур гукунмасса.

Магьихьал МухІадлуца ва АбдулпаттахІлуца чІу зевххуну бур. Ва хьанай бур вай Совет хІукуматраясса бакьар тІаву. КІивагу кулпатрай дирхьуну дур индивидуальный налог. Вагу жул аьрщарай ялапар хьун ччарча, багьа булара тІисса зад хьанай бур. Вайнная кулакатл кьабувну, цайнна аьй кьадучІан, аьрзардугу кьабуллан.

Ва на чивчумур ттухь бувсуна кІирагу шинал партсобраниялий гьуртту хьусса коммунист Абдуллаев Чупанмилавл чІявусса ккурккул бавтІисса азарханалул хьюву. Буккултраву вайннатуссагу бикІан бюхъай. Чупанмилав хьинну мукьул тІивтІусса, щялмахь кьакІулсса, марцІсса, дакІива тІайламур

бусайсса ия. Цалва увкумур бюкьу-аьйлисса бухьурчагу, щинчІав къаччан бикІансса ххай къайкІайва. Ттухь гай собранияртгая бусласиний ия цува Магьихьал чулий уссия, цала уссу Аьбдуллагь зу ккулактал бан аьркинссар, тІий ия, тІий. Вив щяйтІан бусса адаминал ивкІссания, цуксса чІун ларгун духьурчагу, цала уссуя ттухь укун къаучайссар.

Гаймий оьрчІругу бакІ бивкІун, МухІадлушал шава ливчІун ия ттул ппу Аьбдулвагьаб. Ва ия хІалтІухан-къалайчий. МухІадлул къуратусса, ризкьили-ясса луртанналул ялун ттул бутгал ляхьлахьимургу ххихьукун, къуш хьиннува аваданну чІалай бухьунссия.

1935 шинал МахІарамлул, Шяпинайн цачІанма оьвкуну, бувсун бур шярава аьрза бувкІун бур МухІадхьачІа ва АьбдулпаттахІхьачІа чІярусса ккулактур-ачІа дакъа къадикІайсса хьус дурр, тІий. ЗучІан цІухла бишин бучІантІис-сарча, аьрзакарнал тІикунсса зад лякъирча, гайва ккулактурайн кІура баен буллангу бикІайссар, личІлулну бикІияра, куну. КІивайнналагу мюрачІирайсса итталун дагьанмур дуркъуну дур.

Ца-кІива зурувату, тти чІавахьулттайх уруглай цучІав акъахьуви тІий, миву-тиву дирхьуну диркІмур мюра-чІирайн лархьун дур, къатлуву дирхьуну дур. Аьрзакарнал (кІулссар га цу ивкІссарив) ялагу бувну бур органнайн аьрза, вайннал зяту ладиртун диркІмур къатІув дуккан дурну дурр, тІий. Шяпинахь ттигу бувсун бур, цІухла бишин бувкІмийннангу лякъин ччис-саксса хьус къаляркъуну дур. Амма, къатта кІачІа бувну мискинтал хьурча вих къашайшиву кІулну, мюра-чІирай, къатлуву къадиртмур, аьрис дирщуну, ларсун лавгун бур Гьумукун.

Ялагу дакъая жул агьулланул чулиннайсса «аякъа» чан хьанай. 1935 ш. МахІарамлул АьбдулпаттахІлул оьвкуну Гьумукун цІачІана, зул агьлу къакьарттул бавцІуна бурча ттигу, шярава насу, куну бия. Лавгун 60 шинал дурссар Самаркъаннай. Шинну ларгун махь кІира-шанна шинай цал учІайва шавайн. 1978 ш. бутгахьал хІатталлий уччин увкІра тІий, ивкІуна. Гьав цанна ччиний няси хьуссар, ванал аьпалун бивкІу бакъассар.

КІава МахІарамлул, Шяпинайн оьвкуну, зул агьуллнул шяраву халкъ зун къабитантІиссар тІий, зуцІа шаргу, районгу марцІ дансса куццух луглай бур-ча, агьлу кІибавчІуну фамилия цамургу дирхьуну, чанну чІалачІи бара, куну бия. Гара 1935 ш. Магьихьал Аьбдуллагьхьал фамилия Аьбдуллаев хьуссар.

Ххуллувусса чарил кьинхь гьавгьун букьан къабарча, бачІва ччаннащал нанисса мюрци оьрчІал байча щилан бикІайссар, хьунама агьну цІунцІия шайссар. Ккулактураясса, буржуйтураясса, виваллил душмантураясса ццах чурххава къабувкна, ахир пуч хьунни Совет хІукуматралгу. Ва далил ваний-нни бувцусса, 1951 ш. Лакрал районналул пІартІиялул комитетрал бюрорал на партиялувун къамул къаунна, ккулактураяссар тІий. Мьяйжанссар, 1952 ш. цІусса цалчинма секретарь увкІун райкомрайн, къамул увна кандидатну. 1956 ш. райкомрал бюрорал цІа дуллуно, райком комсомолланул цалчинма секретарьну итан, цІухху-рихху бан (собеседованиялийн) гьан унна Дагьуст-таннал пІартІиялул обкомрайн. КІулшиврул чулуха цІакь къаансса багьана къаляркъунни. ДуцІин дан унна 1917 ш. революция хьуннинссагу, хьуну махь га кьининницІассагу ттула, щарссанил, кІиннилагу мачча-гьанмийн-

нал тухумирттая, ливтГумийнная сагъмийннайн бияннинсса цГуххавуртту дуллалисса анкета. Гьарзадрал хьирив лавну, цГакь къаунна секретарьну, «из неблагонадёжной семьи» ур, куну.

60-кусса шиннардий Дагъусттаннал госбезопасностьрал комитетрайхчин институт международных отношениялун дуклан гьансса къас лархГуссия. Аьрза къамул бунни, хьинну къаччайнма, бяс-ччаллихунгу багъну. Уккан унна кабинетирттавах. ДуцГин дан унна анкета. Кадрардал отдельланувун насу, гайннал бусантГиссар цибан аьркинссарив, кунни. Лавгра. Вил документру къамул бан бюхълай бакъар, кунни. Багъана чГалай бакъар кукун, ялату къамул мабав кунни, увкунни.

* * *

Революция хьуннийн, хьхьичИсса халкъуннал оьрму най бивкГун бур ичГура дурив хъус, чурххай бурив гуж тГисса учалалуха лавхъхьуну. Ва учала коммунистурал идеологиялуцГун къабавкъусса бур. Диргьуну нанисса хьурсухун бахчилачисса чару, хьунил къатГув экъи личайсса кунма, хГукуматгу коммунизмалийнсса ххуллун багълагъмий, багълан най чГалачГимий, пикривагу къабувна, экъиличлай диркГун дур. ПГартГиялулгу, хГукуматралгу иширттал директивану къамул бувну бивкГун бур «лес рубят, щепки летят» тГисса оьруснал учала.

Гай шиннардий хъанакъимунил ххуймур ва оьккимур личГи бан къахъанакъисса хъудугьултрал, миски-гъаривнал марцГисса дакГнивасса ссая-бунугусса рязийбакъашиву бусласимур хГукуматрайн къаршиссаннун ккалли буллай бивкГун бур. Гай къача-къучсса шиннардий цаппара кГанттул бакГ дургъмийннал, активистурал, багъана бакъасса, я хГукуматран, я жяматран цукунчГавсса зарал бакъасса чиваркГу бат бувну, мийннал кулпатру, оьрчГру язугъну, ялгъузну личГан бувну бур.

Мукунмийннавасса цану хъанай ур ЧукГундалав.



Поэзия

Мирза ДАВЫДОВ,
Дагъусттаннал халкъуннал шаэр



КЪЮКИЛИВАССА ЧІУ

(Баллада-поэма)

ХАС БУВССАР ШАЛЛАСУЕВ ШАЛЛАСУН

ТТУЛ ХЪА

1

*«Цаймийннал балайлуйн
ТтиликІ дутарча,
Ниттил ккуккулул накІ
Ттун хІаран хъуннав.*

*АьтІиманал чІарах,
Хъяй увккун гъарчан,
Буттал буллусса ччатІ
Загъруну хъуннав.*

*Ккашилмийннайх къисмат
Кти къабачІларчан,*

*Шалласуй, вилва хъалийн
Къавхъунна ина хаин,
Пюрун микІирал ххуллу
Битан багълай бивкІнугу.*

*Къюкьин къадунни вилва
Аьзизсса миллатрал цІа,
ТачІав къавхъунни вища
Ганийн ттиликІну ацІан.*

*Улклул буллу неъмат
КъюлтІ чин къахъуннав.*

*Ххирасса жяматрайн,
Ттулва миллатрайн,
Лявхъусса аьрщарайн –
Дагъусттан улклуйн
Хаиншиву дарча
ХатІалийрагу,
Гъав нясив къахъуннав
Буттал аьрщарай.*

2

*Вил адав-инсапрая
Хъунни чарвитул зунтту,
ЛухІи балардал хъхъичІа
Къашайсса буван сукку.*

*ХхуллуцІ къавхътІий щарацци
Хъунни вил дакІниятту,
Ххуллул ссаннаву мякълил
Ццарал лама лагъ байсса.*

Вияту хьунни зунтту,
БакI ттуруллай дирхьусса,
ЛухIи буран бившукун,
Мунил гуж гьагьан байсса.

Гьарца каснал ца чЮйлий
Ца-ца чару биширчан,
Аьламрал дуняллийн
Чуртту бишин хьунссия.

Му чЮлий зунттал чартту
Чявуссанал бивхьуссар,
Базу бухIан бивхьуну,
Буссар вилмур чаругу.

Щаращив кьаоблукьай
Чявхьа гьарал ларчIнийгу,
ЯхI баххана бан кьашай,
Кьини дурксса кьинигу.

ДакIниву чирахь лавхьнал
Щаннайгу байча кьащай,
Ххялавух авлул кунма,
Щаравух ххуллу ласай.

Буттал кьатлул хьулуха
Байбивхьусса вил ххуллу,
Бакьяяхха бювчIусса
Щин цукун чIалайнугу.

Вилва буракьрал хьхьури
Каниву чIувин дурну,
Хьхьуния кьини хьуннийн
Най ия хIучI кьакуну.
Буракь хьхьурттарайн кунма,
Чун вийнна мютIи дурну.
Так вихшала дирхьуну
Аллагьнайнугу, виннагу.

ШачIанттая шачIанттайн
Лахьлай, лахьнийн лавхьунна,
Уздансса кьадарданул
Махьунай кьаувтунна.
Цимурцаннул щаллуну



3

Кьутайгу кьаивхьунна,
Мукумийннай тачIавгу
Акьяяв дакIмяшнугу.

Дяссавний пперхя тIисса
Бургьил хьхьичIух цакуну,
КIувраяргу лухIисса
Дагьукун цунсса ттурлу,
ЛухIи хьатIрал гьухьаллу
ЦачIун хьанан диркIуна,
Кьавхьуна пикривагу
МийннуцIун хьар дахIинсса.

Мунияту уравав
Чявучин бусрав хьусса,
Яла багьасса цичIар
Дуняллий цир дусса?

Лухччи хьюлчу-кIутIу шай,
Кьаларду левкьун лагай,
Жиндрал хьусса аьтарттал
Ламурду гьагьари бай.

Так адавралмур цIакьлил
Гьанурду хIуркь кьаучай,
Цинявпта балардал хьхьичI
Мунил гуж ялтту буккай.

Вилмур адаврал ххуллул
Дуцин дуван кьахьунссар,
Миллатрал ххазналуву
Ххазинану личIанссар.

Чахма чарийх ририцуну,
Цу личин дайсса кунна,
Ва цансса оьрмулуву
Чанину птерх увкунна.

Цаннал дакI мурчи дурнан,
Му чани шай чирахъну,
Дардирдал авъгин увнан
Шай къувтIшул ламану.

ХулуцIсса ца щарацул
Мякъмийннал мякъ лиххан бай,
Иланул хIачIарчагу
Къавкъунгума къалагай.

ДакIнил чIавахъулттива
Дунияллух уруглай,
Янин чIалачIимунил
Ура хIисав-сан дуллай.

Аблай, гъагълай нанисса
Ва панасса замана,
Ччайнугу къахъунтIиссар
Жуцава бан баххана.

Лавгссар мусил замана,
Мискин бувну оьрмугу,
Къадиртун цилва мархрай
Ил-аьламирал ччавугу.

Му ччаву лещан дуван
КъахъунтIиссар ссащачIав,
Уттигу къалявхъуссар
Мукунсса гуж аьрщарай.

«Цулавгссар» жулва оьрму
ЦуцIавурттал цIуцIуну,
Цавай ттукри кунма зий,
Цавайгу гайннай бурттий.

Зам-замрал щаращину
Ххяллувату хъякунни,
ЗяивначIан цIимийну
Аллагънал тIайла унна.

Хъхъурду чанна дайну тIий,
Зурул чани чан къашай,
Аьрци гъели дайну тIий,
Баргъгу тачIав къабякъай.

Мискаалуксса хъинбала
Зунттуну занану шай,
Душманнангу оьбала
Виричувнал къабувай.

4

Дуниял вара вари
ХIакъинугу, гъунттийгу,
Так му инсантуралли
Дух-цIу лаган дувайсса.

Дакъассар дигъалагру
Зунттал чувнан гъурбатрай,
Ппухъруннал минардур
Мунан Макка ва Алжан.

Цулаган дувантIиссар
Жан цIуллусса гъаварал,
КIа тархъанишвирул гъавас
Буссар оьттуву щарай.

Гъарца урттул мярагу
Буссар вищал гъалгъа тIий,
Мюрци щарацул жюржю
Буссар цачIанма оьвтIий.

Пикрирдал къавла увну,
Цанна къазразан увксса?
Шалласуй, бакI гъаз дурну,
ДакI аьчух дуккан дува.

Ачу гъанну зунттавун
ДакIру рахIат шай ккаккан,
ХIазран бакъархха аврду
Зунтту лахъний яшайсса.

Щунул щуттай бавцIуну,
Дуняллух бурганну,
Кюртти хъусса цархъурду
ЦIунил хъьичI дацIан данну.

Щархъал эялал къюкIлий
Щавурду дулларчангу
Ппухълуннал миналул ссихI
Бюхъайхха дарув хъунгу.

БакIлавай экъинани
Щарацул дяркъу цинал
НахIалагу буванну,
ХъьичI никругу рициуну.

Алвагъсса Щунул бакIрай
Урттуйн ссупра бутанну,
ДакIнин лавгъсса дусталгу
Лагма лаган буванну.

Овъчинну Бадавинайн,
Жула Айдахъал Аълийн,
Камилавхъал Сажидлуйн,
Сулайманхъал АхIмадлуйн,

Цалчинма генералнайн –
Къистилихъал АхIмадин,
Хъун дяъвилул виричу
ЦIаххуй чантI учин анну,
ХIасанхIусайн-аълимчу
Бусраврай къамул анну,
Бюхттул къатри дай ХIабиб
Эяллах урган анну,
Асват – цIасса муаъллим
Дяниву цяьбитанну,
Мунил чIарав Насибат –
Вил дакIниву лавхъ чирахъ.

Шагърулул лагрулийсса
Зул ЧIайннал шяраваллил
Лацаву циривавли
Та левкъсса Афиннаха.

Нувци, къур, лухIи хъюру
Дюхъайсса майдан къурду,
Заллу-зал ухлавгривав
Муччуччун тавтун бурхха.

Шалласуй, тяхъа укку,
БакI хъьичIун мадутара,
Вил буттал шяравалу
ЦIунил цIулагантIуссар.

БакIяларай нанинех
БакIларай занакъашай,
БакIялавай лавгъсса халкъ
БачинтIуссар бакIлавай.

5

Овъчинну, балай учин,
Балайчи Минажсатлуйн,
Мунилва душ Залиххайн.
УчIан анну ЦIувкIрату
Хизри – хъатIал зорнавчий.
Мунахун рицун дачIу
МахIад – цIакъсса дачIучий.

Ва оъсса чIумул овван
КъавтIунну, балай тIунну,
Шадсса чIурдал гъухъала
Зунттавух чIа дуванну,
Мюрци цархъал эяллу
ЦIунил чантI учин данну.
Зунттайх ппив хъусса аврду
Тирин бишлаши банну.

Щюллиннасса дунугу
Лухччинунгу, зунттангу
Аъркинессар муданнагу
Инсаннал ссихI ва кару.

*Мийннух ялугълай дуссар
КІай тухъруннал минарду,
Ццах куну, шанавату
ЧантІ учинхъуви лакгу!
Интту зунттал нех кунна,
Аьратталсса заманнай,
Вил гьалаксса кьюкІлил ЧІу*

*Баянхъуви аьламран...
АчІи-кьачІи чІяйричу,
АчІигу гьухъаличу,
Чув ляхъусса унугу,
Ляхъума цІивикъанну –
Алиши бакъа миллатрал
Гьалаксса кьюкІлил таргну.*

6

*–Часса, цура? – увкуну,
ЩилчІав ттухъва цІуххирчан:
–КІа Шалласул миллатрал
Чивисса арсра, – чинна.*

*Нажагъ кьини дуккарчан
Ттулва аьзиз миллатраин,
КІа куна, на уссара
ХІадурну чІарав ацІан,
Ляхъсса цІарду, бахиширу
Дакъассар жун аьркинну,
Так миллатрал цІакъшиву
Муври жунсса бахишигу!*

30.09.2020 ш.



ГУЛШАН

(Поэма)

I

Фирдаусил мазрай
ТутГуйн «гюл» учай,
Вил буттан биявав
Парснал маз кГулну,
ИчГува хъякувкун
ХъункГултГулГул кьуп,
Ганин дирзунавав
Гулшан тГисса ца?

ИкГайхъунссар инсан
Цанин лавхъхъусса:
Ихтилат хГалимсса,
Мазрай ницГ дусса,
Къунттула хъякусса
Щарацул эжюржу
Садапрал ккарччава
Экьи нанисса.

Интту оьрчГитГулГал
Дарай лирчусса,
Архния урувгнал
ДаКГ ххари хъунсса,
ЧюлубакГул махълийх
ТитГи даркъусса
Чурттациял царний
Аргъ дизан дуван.

Ниттил махълий кунма
Буттал шяраву
Хъунма хъанай бия
Бювхъу хГавину.

Хъунанал хГурмат бан,
ОьрчГру ххира бан,
Ниттил накГлил бия
Вин лахъхъин бувну,
Шанаши бан кГанттух
Увкусса балай,
Цулаглайнма бур вил
Оьтту-ттурчГаву.



ЛивцГисса щарацул хъхъичГ
Никру рищуну,
Мякънал мякъ лиххан бай,
Жан рахГат дуккай,
Ца чГивисса чГучГлул
Оьлукъингу бай,
Ца инсаннал миллат
Бюхттулгу бувай.

Къалявхъуссар душру
Лакрал аьрцарай,
Миллат къюкьин бувну,
Лавхъсса давраннайн,
Ккашигу бувхГуссар,
Мякъгу бувхГуссар,
Дардирдал къювурдал
Макъгу дуртГуссар.

БакГрачГан дуркГнугу
Къинирду оьсса,
Мийннул хъхъичГ никругу
Къадурссар лахГан.
БакГругу гьаз дурну,
Жайрантрал кунна,
Чумул аьтарттугу
Лавхъссар сивсуну.

Ци балардал гьиву
Ларсун найнугу,

БивкІулул, буккулул
Дазуйн бивнугу
Мийннал кѣабивзуссар
Ччан џалва аслий,
Кѣахъунишिवрул ттангѣа
Миллатрал яхІлий.
Буттахъал кѣирият,

Яла эмаратмий
ТутІая бувсса,
КаџДрав ина, Гулиан,
Ккаккиялунсса,
Чивисса чІумалва
Вин дур дуллуну
Тпабиатрал џилла
Щалла ххуйшиву.

Ссутнил уртту-тІутІайх
Силул ках учай,
Шиннардил дюрчІусса
Симан жиг дитай,
ДакІнил ххуйшивручІан
Вил дакІнивусса,
Шайссарив кѣутІ учин
Хъуннаришивруџа?

Ина хъунна душгу
Душ бакѣа ниттин,
Ина хъунна ссугу
Ссу бакѣа уссин,
Ятинтал хъу оърчІан
Нину-тту хъунна,
Инава кунмасса
Хъунни авладгу.

Вил дакІнил дуниял
Дур лап гѣартасса,
Бухъурча га алжан
Щалва гѣануксса,
Алжан ккавккун увкІсса

Даххана хъурчангу
Аьриџи-џин, гѣава,
Хѣама битайссарив
Миллат буссаксса,

Ниттихъал ччаву,
Мий буссар ларсун най
Оьтту-ттурчІаву,
Мийннуйн хаин шаяр,
БивкІу ласунссар,
Мийннавух аслансса
Гулиангу буссар...

2

ЦучІав акѣари,
Вил дакІнил алжаннул
Нузру тІиртІусса,
Хисав дан кѣахъунссар
Буссар чІявусса.

ЩуџІаврил бувгъусса
ЩуџІи заманнай,
Ка дулунсса џучІав
Акѣа ливчІмийннаих
Каруннил барачат,
ДакІнил хъиншиву
АрхІалну дачІара,
Хъис мяи кѣавхъуну.

Арџу-мусил кѣимат
Биџун бигѣари,
Инсанишिवрул кѣимат
Биџун захІматри,
Адаврал дуниял
Вил хъхъичІ тІиртІусса,
Бухъунссар занначІан
Бивхъусса ххулла.

Дунгъяллул ххуйшиву
Хъуннар кѣашайсса,
Дур вил адавраву
Жагъилнурасса,
Хъхъириун кѣабюкѣай
Бувсса хъинбала,
џа чІумал вичІанмар
Зана хъунтІусса...

3

Мунил ляхъан бувсса
Виртталсса душру
Вайннал џарду дур ттул
КѣюкІлий чирчуну:

Дагъусттан ххассал бан,
Миллат буруччин,
Лакрал чIара кьюкьлуд
БакIчигу хьуну
Мангьулнал аьраллу
Ххит буккан бувсса
Игитсса лакку душ

ЧюдубакIул шанна хьачI
ТIюаннал хьхьичI дарцIусса,
Шанма душ, шанма аслан
Лак бьюттул бан ляхьусса.

Ци аьламатру дусса
Диявав шикку аьрици,
Щиньявав шарав хьусса,
Жаннай аргь дизан дайсса,
Ххяхха бургьих дуругсса
Ца чIирисса шяраву
Укун кьучагьсса душу
Ниттихьал ляхьан бувсса.

Дуаь дара, ЧIурттаций,
Кьиблалийнмай бурувгун,
Ттигу чIяву баннав тIий,
Щар чIюлу дайсса душу.
Буссар чиваркIгу цIакьсса,
Зунттал тарбия бувсса,
ЧIурттациял ЧIавэжил рухI
Обьтту-ттурчIаву дусса.

ПартIу-ПатIима,
Ссавнил барзу Бавер,
Аьрцарай Гулиан.

Ляйкьессар вайннал цIарду
Чичин варакьрай,
Миллатрал чувшиврул
Тарихрал чIанIай.

4

Лакрал миллатрал тарих
Бьюттулссар зунттаяргу,
МарцIсса мийннал дакIругу
Щаращал циннияргу,
Щицар бьухьайсса мунил
Бьюттулишиврийн ка гьаз дан,
Мунил чантI чинсса цIунил
ПатIимал турлил цIунар...

Гулиан, вилмур замана
Бур лава оьлукьусса,
Хьинбала ва оьбала
Цаннийн ца ччалли бувсса.

Ччавугу, макьгу архIал
Най диркIссар ца рукIлилу
Так ччаврилмур бияла
Ялтту бьукссар мудангу.

Дигьа инагу хьарас
Аьрцаран цIун кьахьунну,
Кьанкь нахIу тIутIал ардас
Лухччайх дичиннав, куну.

22.02.2020 ш.



Бахтун ГЪАЗИЕВА



ВА ЩАР ЩИЛ ДИЯВАВ?

*Дуссия ца чIунгу ттул шяраваллил
Вев-шев тIисса оьрчIал чIурдал дуриIусса,
Душваврал балайрду, ччергьилттал гюргу,
БавиIу-бавиIу кIанай мажлисру байсса.*

*Мискин хьуну дур щар, акъари цучIав,
Бакъар оьрчIал тIуркIу, тяхъасса чIурду.
Шярава лавгусса чиваркIуннацал
Лавгун бур ниттихъал бала-гъалайгу.*

*Магъивгу вив дагьну, хъархъаллу лирчIун,
Къуману дури дакI, аьтIий бур яру.
Чун бакъа хъурукъай, ттул щарнил жямат,
Щил миллатравухру зу хIала хъусса?*

*Хъамара риртссарив буттахъал гъаврду?
Къабаллай бурив зун гайннал цIунцIурду?
Буттал шяравусса гъаврду къариртун,
Щил хIатталлий мина дишин лавгру зу?*

*Ялув махIалланий бури ца къатта,
Лув махIалланийгу бур кIива къатта,
Мийгу бухлаганссар. Ци хъунссар яла?
«Ва щар щил диявав?» – цIухланссар гъарнал.*

* * *

*Хас буллай буре цинявпагу лакран,
канаврду дуклай бивкIсса халкъуннан,
хаснува ттула ласнал ппу Гъаруннун.*

*Талатаву аьнтнийн гъан къахъурчангу,
Зу бивкIссару дуклай Октябрь канал.
Зу чансса бакъаяв му каналаний,
Хъами ва араммал, хIатта душругу.*

*Ккашигу бувхIуну, мякъгу бувхIуну,
Гъарца дайсса даврий махъун къабагълай,
Дяъвилул чIумалсса къучагъсса вирттал
Микку жан дуллусса чансса буссарив?*

*ПартIсса янналуву, тIартIсса уссаву –
Къюкъала дакъая, ци лаххарчангу.
Дякъил замгъарданух ургъилгу бакъа
КIюрххила буккайва зу даву дуван.*

*Ттупангирттал кIанай чIатIри дургъуну,
Ххичурдил кIанайгу муххал тталлащал,
Зу чансса буссарув, чувшиву дурсса,
Партиялул тIимур барт бигъин лавгсса?*

*Дяъвилул чIумалсса виртталсса чиваркI
Чансса къатI бувссарув зу бургъил цIарал?
Дяъвилул цIараву къатI хъурчан аьскар,
Гайннаяр махъун гъич зу къабагъссару.*

*Дяъвилый бакъагу дурссар чувшиву,
ЧIатIрах, кулунгирттах канаврду дуклай,
Амма къабювхъунни хIукуматраца
Зу бивхъу захIматрал кымат гъаз буван.*

*Нарив зухъ чивияв, аслансса вирттал,
Га ххувишавривугу буссар зул бутIа.*

9 май 2020 ш.



ЛАКРАЛ БЮХТТУЛ ДУШ

*Дагъусттаннал халкъуннал шаэр
Салимат Къурбанован*

*Ина лярхъун бура зунттал бюхттулний
ГъурукГул цийн чайсса лакрал шяраву,
Бухъунссияв ина цIубарз кунмасса,
НякI ссавнил гъунттулу пар-пар тIутIисса.*

*Вил ччавугу дия буттал кIанттухсса,
Ччаврил ва эшкьилул ччурччуну найсса,
Бюхттулсса зунттавух, ххяллайх лахълайсса,
Ччава гъинта кунма, ччинийн тIанкI дайсса.*

*Ччучлай дия вил дакI
Лакрал миллатрах,
Душманнайнсса зидгу
Бия вил дакIнив.*

*Ххирасса, хумарсса
Вила ччаврил дус
Зана къавхъуну тIий
Оь дяъвилува.*

*Ххувишаву ларсуну буттал миналийн
ЧчиваркI зана хъуннийн та дяъвилия,
Вил яругу бия хъулувн ялугълай,
Ххирама учIаннин оь дяъвилия.*

*Мукъал бувиЦу яру битIянхърах лихълай,
Лавгуна вил оьрму ласнах ялугълай,
Ххирасса оьрчIаран кIул хъун къабивтун,
Акъашиву ялув цала ххира тпу.*

*Жу пахрулий буру вия, Салимат,
ХIарачатрай бивкIсса миллат гъаз буван,
ЧчиваркIуннал кунна, чувшиву дуллай,
ХIайп къакуну ссалчIай оьрму бувтусса.*

*Жул нинуй, жул ссувай,
Лакрал бюхттул душ,
ЛичIантIиссар вил цIа
Лакрал миллатран.*

Декабрь 2020 ш.

* * *

*Цири учин ччисса бюхттулний бургъил,
МикЛирал къюмайртту дассан дуллайний?
Цири учин ччимур гьалаксса неххал,
Ххурхху тЛий, ххяллацал диллай наниний?*

*Цири учинтЛисса бявкъу царацул,
Щурицу тЛий урттувух экъи наниний?
Цири учинтЛисса дараччи тЛутЛул,
Пишгу тЛий, я битлай, дурккун наниний?*

*Барчаллагъ, барчаллагъ, инттусса лахЛзай,
Ххуйишиву хЛукъулул инт дайдирхъуний.
Ххуй душнил чалагъай лехлахи дурну,
Ххуй оърчЛал дарвачрайх кай-кай дуллайний.*

НИГЪАЧИЙ БИКЛАРА

*Нигъ дакъар дусная чЛарав уну тЛий,
НигъачЛийрив бура, чЛарату къагъан.
ХЛарачатрай бура, дусишиву ядан,
Вихшала дирхъуну, лавмартшин къадан.*

*Уссари дус ттуцал мудан на буний,
Ттул битайсса ххуллул ца гьалмахчуну.
Ттул хъирив ялугълай, на жард къаучин,
Янилу ябуллай, къаралчи хъуну.*

*Дусная бикЛара мудан ххарину,
Ва ттулла дакЛниймур авч бан ччай ванахъ.
Нигъ дакъар дусная, дуну вихшала,
НигъачЛий бикЛара, чЛарату къагъан.*

Апрель 2020 ш.

ЛАККУ МАЗ

*На хЛарачат банна ттигу-шилагу
Лакку мазрай чичин лакку шеърирду.
Уккарчан буккинсса лакку мазрал лу,
БувчЛайсса лякъирчан мяъна шеърирдал.*

*Булуннав миллатран гъавас ккалансса,
Лакку мазрай чивчу шаэрнал ххару.
Ххихъуннав лакрачЛа тавпикъ мазрахсса,
КЛункЛу хъуннав гъавас дакЛнил куртЛнивун.*

Чичинна цябивкІун ттигу кІива хха,
Хьунхьуви щаллу бан мукьва хха яла,
КъаличІанхьуви лак миллат бухлавгун,
ЛичІанхьуви сийлий лакку маз мудан.

Шегьррду чичлайсса на лакку мазрай,
Ттулла ца гьаз дантІий, валлагь, бакъара.
Лакку мазрай чичлай, лак хьун бувну ччай,
Дуну тІий дакІ аьтІий жулва миллатрай.

Ца-цасса къадартал бакІрайнгу багъай,
Ци байссар лакку маз, чув аьркин шайссар,
Дакъари мунил сий шагьрурдай чувчІав,
Щищал гьалгъа тІунни му лахъхьин байсса?

Агь, зун нач шивухьул,
Да, лакрал вирттал,
Ссан аьркинсса мазри
Жунма учиннин.

«Инава чассара, чув ляхъуссара», –
Куну, вихьва суал цаманал бувкун,
«На лакку чувра!» – чин нач къахьунссарив,
Ганахъхьун чил мазрай жсаваб дуллуний?

Чачаннал миллатгу бизан бувссия
Сталиннул чІумал архсса Ссибирливн.
Гайнна зана хьуну, ца-цаних циняв,
МарцІну цалва мазрай гьалгъагу буллай.

Гайннатаурагу ласира эбрат,
Гайгурхха, зу кунма, шагьрурдай бивкІсса.
ГьалгъатІий къабарчан жулва лакку маз,
Цаймий миллат жуйва хьян бикІайссархха.

Цан хаин хъанайру жулва миллатрайн,
Циван буру «нину» ччанналу дяргълай?
Сан бакъа ччанналун лакку маз бутлай,
Циван буру «ватан» халкъуннан дахлай?

Лакку миллатралли
Къянкъамий вирттал,
Гьарзасса аьлимтал
Лакралли бусса!

*Валлагъ, цIа данмуних бакъара луглай,
Ттуяра цIа даву къачча ттун бавну.
Бура на луглайнма лакрал миллатрах,
Лакку маз бусайсса лакку оърчIарах.*

*Мийннан харж давияв
Ттулва оь ва ттаркI,
Лякъиншиврул мийннал
ДакIнивун ххулу.*

*Ппухълуннал адавгу, асгу, ламусгу
Къабахханхъуви лакрал миллатрал,
БучIанхъуви цалийн, ва на тIимунийн,
Ляхъхъин булланхъуви оърчIан
Лакку маз!*

Сентябрь 2020 ш.



Читал ЭСЯ



ХАЛКЪУННАЛ ЗУМУНУ

*Аваданма мискин шай,
Мискинма авадан шай.
Ва ттул ччаврил ккуручай
Вил чулинмай къабаччай.*

*Гъарал лачИай, баргъ битай,
Хъхъу лагай, къини дучИай –
Ва ттул ччаврил къарчигъай
ТучИан зана къабикИай.*

*Цавай ччаврил дард хИалай,
Кув ччаврил карав шанай,
Нарив ца вих ялугълай
Мина дуван къахъанай.*

*На вявливсса къаивкIра,
Зунххи къаургайссия –
ХхюнчIа бувххукун карав,
Ххяххявияв на бярав?*

*Вил хаварду нацIуя,
Дулун ччимур чIяруя –
Амма тIартIсса уссува
Хъун кIисса ттуй хъяй бия.*

*Шярултрал ратИай сарси,
Ччанналун бутай варси,
Иривнал лаххай махIси,
Ччитрал хIунку був къансси.*

*Навтлил буцИай варакъи,
Ттуккул хIунку був викъи,
Оълийн лаххай варсул хъи,
Бярчру ххияй ницяхъи.*

*Шинай шамилва жалин,
ЦIан хъхъунил парча лажин,
Буцан був магъар бишин,
Малланал ччанну июшуй.*

*На вахIуруллайнни тIий,
БивкIун бия гюнгутIи:
Чаххул бувну къюкI-мурчIи
Нава унна зюьтIий.*

*Колхозрал ятту бивкIессар
Къуллугъчитураха зий,
ХIухчалтралгу ливчIмийнний
РахIму буллай къабивкIессар.*

На ца мазрай гьалгъатIий,
Ваймий цамуний – ссугай,
Ттуйва тахсир хьусса ххай,
Лякъара ттуйна рагълай.

Арснахъ къатта къалиян
Къабити тIар къалиян,
Арснал цар дур ччай лиян,
Шякъ чирчагу дуниял.

Вай эшкъилул хъару
Дуварча хъатру,
КIуларгуну тIинтту
ТIувивав журкIу?

Дурккун бюргъил тIинтту,
ЦIунI дарча ттурлу,
Вирин бизанхъуви
ЦIусса асарду.

Гьаз дурну ухьурчан рикI,
Душман, къарицайссар ник,
ТтурчIацIа дуцансса дикI,
Учайссар багъайни махъ.

Барчаман джиснсы-хIажак
Акъувалий тIатIлайсса,
Даврий, хъатIий, бивкIулий
Хьухъ бюкъан чIун дакъасса.

Циксса дурвав лакрал ххуйсса аьдатру,
Оьрмуллу чIанулу лирчIсса якьутру?
Мий гьаз дуван жува къахьурча суку,
БучIанмунил гужну банссару ссуку.

Ттукку бувккун лавгунни,
Ттала бутлай ци банссар?
Мазру къакълакьи бунни,
Щин рутIлай пайда бакъар.



Алексей ХИЖИЕВ



ТАНКА

*Мурчал ларсунни
Душил куклу чалагъай.
Нигъ дур ниттия.
Ттул хияллал чалагъай
Душил мурчал ларсунни.
7.06.2017*

* * *

*Душил иттату
КлунтI бавгъунни хъзамрайн
КъурчIисса мукъал.
Яруннил кIидарчIунни
КъурчIишиву къюкIлицал.
8.06.2017*

* * *

*ЧивитIу аьтIий.
Ссах унугу мюхтажссар.
Хъягу хъянтIиссар.
Чан къахъуннав аьтIаву!
ЧIяру хъуннав хъяхъаву!
8.06.2017*

* * *

*КIаралу бакъар
Утти ттул бакIрацI бишин.
Аьркингу бакъар.
Дишинна бакI вил хъуву.
Мурадрайн биянхъуву!*

* * *

*«Ци иш бурив?» – тIар.
«Ишру най бур хъхъичIунмай,
Муданма кунма.
Ца-ца чIумал дирину.
Кувний тIурчан хIаллихну».*

* * *

*Бурхха учала:
«ЦинцIру дуккан мадара
Къатлува къатIувн!»
Ххуйсса учала бур ва
ЦинцIаву яхъанайнан.
22.10.2019*

* * *

*Бюруйсса тIутIив
Ххуй дизайва ттуннагу,
Жулва ттуккунгу.
Ттунна – ранг ххуйшиврухлу,
Ттуккун – нахIушиврухлу.
23.10.2019*

* * *

*На гъарал клунтIру,
Бургъил тIимулийх лавххун,
Чарсса дуванна.
Яла вин тIикаш данна,
Ссавнил ссайгъатри, куну.
24.10.2019*

* * *

Оърмулул кьисса,
Ниттил лажиннараву
Ххару чивчусса.
Лахъхь тарихрал дарснун.
Заназу лайкьсса арснун.
24.10.2019

* * *

Вайнна тIутIивгу,
Ссутнил гьантри гьан хьанай,
Ца-цаних кьакьлай.
ТIутIал арних уруглай,
Дуниял ккаклай ура.
24.10.2019

* * *

Икьрал дурссия,
Зурулух хьунабакьин,
Инагу, нагу.
На утти гьарца хьхьуну
Барз хьунабакьлай ура.
24.10.2019

* * *

Чавхь тIий бишлайсса
БакъавцIуна га хьхьуну
Хьхьирил цатIивгу.
Жулла ччаврий мяи хьанай
Гай энадрай биявав?!
24.10.2019

* * *

Тава бур тIингу
Лаккуйсса уртту-цинал,
Тара кьанкь – тIутIал.
Утти Лаккуй оърмулул
Тара та дакьар мяьна.
24.10.2019

* * *

Лавсунни мурчал
Гай, мусил щин дурккусса,

Мурхьирал чIапIив.
Дарцунни, цуркийл кунна,
Ттуха ссутнил ххуйшиву.
26.10.2019

* * *

Мусил ранг чIапIал,
ХхурупIай кьавтIи дуллай,
ТIуркIу тIий бур марч.
Так ца ттун дуркIсса хханссар
Ссутнищал паиманишиву.
26.10.2019

* * *

Бюхьлай буния
Хьхьемьавхху тIутIив циняв
На датIавияв.
Бирлиантрал пар бусса
Таж буван гайннуя вин.
26.10.2019

* * *

КIива махь учин
Хьурдай вил вичIилухун,
ЩинчIав кьабаллай.
Кьамул кьахьурчагума
ДакIниймур вихь аьч буван.
26.10.2019

* * *

Утти Гьумукгу,
Пахрурду булларчангу,
Бакьар лакку маз.
Хьхьирийн аьрзирайн най дур
Аьратталсса Хьун-нехгу.
27.10.2019

* * *

КьютIи дуллай бия
Ина ттуяту ччаву,
Яру лабитлай.
Мий ттущал мукIру хьусса
Хавар бурвавкьай вингу?!
28.10.2019

* * *

Ттуруллив хьунни
Ина кӀуну бигълайсса
СсихӀираяту,
Ттуруллаву аьйкьирчан,
Утти нигь дакъар ттунгу.
28.10.2019

* * *

Урттун ххявххунни
Жулва жегъир ххуллурду,
Жува къазанай.
Бачу, тӀабиаьтрал аьш
Жунна дарснуну ласунну!
28.10.2019

* * *

КьютӀ хъанарчангу,
Чирттай вичӀив духъунсар,
Ашкара шара.
Утти макӀра укӀланна,
ЩинчӀав хавар къахъанай.
28.10.2019

* * *

Вана кӀорх дуркӀун,
Ссавний пар-пар тӀий бивкӀсса
ЦӀуртти левицунни.
Утти гайнна пар-пар тӀий,
Урттуву хъхъемал кӀунтӀру.
30.10.2019

* * *

Цу ци тӀурчангу,
Вана лагайсса бивкӀун,
Жулва замана.

Нама ивкӀсса – замана
БучӀантӀиссар тӀийрахха!
30.10.2019

* * *

Баллай бур ххурхху
Аьратталсса Хъун-неххал,
Хъхъугу, кьинигу.
Мина-ватан къадиртун,
НайтӀий, леххаву тӀий дур.
30.10.2019

* * *

ЧантӀ кунни аьрци.
На учин ччимур интнил
ТутӀах чивчунни.
Ранг-рангсса ххуттардивух
ОьрчӀисса мукъурттийну.
9.11.2019

* * *

ТутӀив къаркьунни.
Жагъилишиву ларгунни.
Гъанссар оьрмугу.
Къакъанишиврул тӀутӀив шай –
Варив оьрмул мурад?!
19.11.2019

* * *

Ина цӀувххунни:
«Циван урав пашманну?»
Винма къакӀуллив?
Ссаярив ххари хъанан
Ина бакъа, навалу?!
19.11.2019





МАЗЯЙХЪАЛ Казбек

ГЪАНГЪАРАТИВ

*Буссархха гъангъаратIив
КIулеса хъинну гъузунгу!
Гай щинал гъангъаратIив
Шай ялапар бядаву!*

*Гай щинал гъангъаратIал
Лап чIявуссар журадугу.
Ца ряхттуршва журалул
Гай бумири цивпагу.*

*Буссар гай лухIиссагу,
Буссар цIанну някIссагу.
Гай щинал гъангъаратIив,
БикIайссар оьруссагу!*

*ГъангъаратIив гай щинал,
БикIай бяраву гъузуй.*

*Ххал хъурчарив оьрватIи,
Ганил хъхъичIагу лихъай!*

*Гай лихъайссар къиялий,
Валлагъ, бярнил чIанулун.
Латва нигъабусаврил
КъутIайссар къюнуравун!*

*Гай щинал гъангъаратIан,
Валлагъ, ххирассар лехлан!
Гъаз хъуну щинавату,
Гъава ххирассар буллан!*

*Аьзизсса бярдив цанма
Къакъабитай гайннул гъич!
Валлагъ, бярнил щин гайннун:
Ца чассаг, ягу ца гъивч!*



Хизри ИЛИЯСОВ



АЪЛИ ВА МАРИЯН

Хавар

**Арив тІутІал гьакь бивну,
Хъурзилттуву най бивчІай,
Жулла ччаврил гьакь бивну,
Лирну гьансар дуниял.**

Та-бунугу чув-бунугу скрипкалул чІу баяйхту, ттул иттал хьхьичІ БатІил Аъли ва Мариян бацІай, бусала хьусса гайннал ччаврил хавар дакІнийн багъай... Ва иш хьуссар КІамахьаллал шяраву. Ласун къашайсса къала куннасса КІамахьаллал шар зунттул хьархьаллуй, къунттай дирхьуну дуссар. Ва зунттал, къунттал билаятрай хьуссар цилва бикІайкунсса, Шекспирдул зумунусса эшкьи-ччаврил драма.

Мариян чантІ увкуна аьжаивсса чІурду бавну. Гай ттюнгану кІюласса чІурду бия чІюхлай так вичІавун бакьасса, дакІнивунгу. Ганил чІавахьулу тІивтІуна. КІюрххицІунсса дюхрулушчал къатлувун ттюгасса чІурдал аьгара бувххуна. Гай бия скрипкалул чІурду. Цивпагу шарнил тийсса бизанттая бизлай бия. Га макьанналуву муксса пашманшиву, дард дияхха, Мариян махІатгалгума хьуна, чаривав Аълил дакІнивун вакссара къумашиву дагьсса тІий. Ганин хавар бакьая жагьил нукІува цийхра ччаву хьуну усса. Цуксса рухІи бакьашиву дуллай бунугу, ганища бацІан къашайва цІунил ва цІунил скрипкалул макьанналухун кІюласса чІуний балай итакьабавкъуну:

**Хъару личлай лехлайсса
Лелуххилун цир байсса?
Хъап тІий хьирив лечлайсса
ДикІул дакІнин цир байсса?**

Мариян я-иттацлани дусса, чурххал бювхъусса, шяраву бур учинсса душ бия.

Циняв жагьилталгу кьютлну ганих ччаву хьуну биклайва. Душнин 16 шин хьуннийна, ганил нитти-буттацлан цимийвагу мугьису увклуна. Амма га рязий бан кьавхьуна. «Ваксса укун макъан руцайсса жагьил, дакI хьинсса, иминсса ухьунссар», - тисса пикри хьуну, скрипкалул залуннал гъан бувсса мугьисултрахьхьун махъ буллауна. Мариян, чинарданул мурхъ кунма, бювхъусса душ бия. Ганил пишлил Аьлил дакI гьалак дуккан дайва, гъавасрал дуцлин дайва, чурххавун бухар буххан байва.

Аьли турча чурххал лахъ акъасса, амма кьютлилу куна, цлакьсса, члаванийва ятинну ливчлун, захIмат-жапа ккавксса ия. Цувагу яруссаннал Щангьи-Щитлий буттал хьамаллурачлан пагьлану лавгун ивклун ия. Гайнналгу хьирив укканма акъасса оьрчI Архзунттуин ккацрачлан тлайла увккун ивклун ия. Ккацри витIанхьравн ттивзуну, накI хIачIлай, цукун-унугу, Маугли куна, уртту-щинай уттава увккун ивклун ия байчара. Сайки-масала, ахIвал кюласса тювая унугу, душнин ганай дакI даркьуна.

Мунияту Марияннуин тамахIрайсса шарнил жагьилталгу сситтул пIякъ учавай, Аьлин ягу Марияннун цуманан ци банссарив кьакIулну ливчлуна. АпатIран пал кунма, ялун бивуна кьурчIисса хавар. Най дия Хьунмасса Буттал кIанттул цанийсса дяьвилул кьанихсса 1942 шин. КIамахIалия Гьанжилийн, архру дуклан, бригада тлайла бувккуна. Му бригадалул сияхIравун чIунархIал душваврашчал Мариянгу багьуна.

Мукун дахьра цачлун хьун нанисса кIира тIутIи, цаннихъ цаннил тIутIул зумату жуав даннийн кьариртуну, цанния ца махIрум дурну, ца зунттай, цагу ардай личлан дурна. Бачин хьхьичI шяраваллил клубраву бувсса ссувхIатрай, Аьлил скрипка бивщуну, Марияннул балайгу увкуна:

**Аьсса ххуллийх ялавай цIуку багьну лавгунни
Аман, цумур ххуйдушнил умуд барткьалавгривав?
Барзунттаву Архзунтту цIан ттуруллал бувгьунни,
Аман, цума жагьилнал дакI кьума-цIан ларгривав?**

Цивппа чIумуйнусса личIи хьанай бунугу, цирив ца кьахьунмур хьунсса кунма, абадлий личIихьанайсса кунмасса, дакI палачат дуллалисса асар бия душнил ва оьрчIал. Архзунттуй Аьлил вихшаласса дус-ихтиваргу, аьпабиву буттал бищун лахьхьин бувну бивкIсса скрипка хьуна. Бутта ХIажи-Аьли кьалайчишиву дуллай тамансса оьруснал шагьрурдайх: Аьшттарханнайх, СаратIоврайх увккун ивклун ия. Тийх ганан скрипка бищунгу лавхьхьуну бия. Шавай занахьуну лахьи кьалавгуну дуссу-кьатлул азар – гьутлурдал инжит хьуну, дунияллия батIул хьуна. Мунияту махъ нину Аминатгу личIийну лахьи кьаларгуна ...

**Ца муьцIу лакьирча, ца тIитIайссархха,
Кьумашиву цира дунияллия?
Чичрулунгу чаран бакьассарихха
Винма ци ливкнугу, духIи, дус, кьия!**

Гьалбатта, кьини най, гьанттай буклай, ларгун дур шин.Архру дуклан арив тIайла бувкмийгу, цалла давугу дурну, яни ккаккан дурссакса метрарду архралгу дурккуну, полуторкалий махъунмай Лаккуйн зана хъуну бавчуну бур. Цахъардал Къуманиялугу, ВицIхъял ТтарцIмурлугу бивтун, ГъунчIукъатIрал Чарил Ламуйн бивсса чIумал, къабаяннав, кIура баен бувну бурххарттал машина бакIра-къунтталый увччу хъусса лаялий увгъусса оьрус щупирнал.

ХIасибул-калам, багъну бур машина ахъния. ЛивтIуну, бивщуну бур ганийсса тамансса халкъ. Бивщумийннавах Мариянгу бивкIун бур. Ганил ливсеру гъавгъун бивкIун бур, ликри гъаргъун диркIун дур, шанма кIанттай бархI къаркI куну бивкIун бур, чурххайн 47 щаву дирну диркIун дур. Сагъну цукун ливчIссаривгума махIатталсса иш бивкIун бур. АпатIрахун багъмий, Къалалийсса азарханалийн бувцуну, шайсса ка-кумаг бувну бур. Мариян тIурча махъунмай Гъанжилийн госпиталланийн тIайла бувккун бур.

Мискин Архзунтгуйсса Аьлин, дахъва му хавар баяйхту,хъинну аьраттал увккун ур. Къуру кIинттул яттичIа хансса зунттаву, алхъалий, авлахърай ливчIний, хIатта гузатрай уна, бурцIурдил лагма рургъунийгума лакъавхIусса, мах-чаннан куна, къянкъасса, зиркI ивкIсса чувнал иттату микку, ккур-ккур тIий, мукъал кIунтIру ккуру лавгун бур. Га бан-битан бухлавгун, ласу бувхIуну ливчIун ур. Щин лаизанссарив, щихъ шикаят банссарив, щихъ къурчIишиву дачIинссарив къакIулну ливчIун ур пакъир, бурцIин цIими хъуну. Гавассят га яла тIирхъамур хан ккацлуйгу буртти ивкIун, шагърулийнмай юргъа буллуну бур. Хъамаравун бавхълавгсса чугу къапурдайсса бурхIулттацIун бавхIуну, Аьли азарханалувун увххуну авчун ур.

Амма я хIура къабайсса санитарнал: «Гъалмахчу, ина чунна? ЦIана къашайшалтрал ялун бучIан ихтияр дакъассар – гай бигъалагай чIунни,» - куну, га ацIан увну ур.Итаакъи тIийгу маз къабувчIлай ивкIун ур.Микку Аьлил, буккан бувну чантайлува цалва скрипка, бивщуну бур, циняв азарханалул цIимилул ссурвалгу дакIнивун чIювххуну нанисса чIурдал хIайран бан бувну. Скрипкалул чIу бяличIаннин, «оьсса» санитарначIан цIимилул ссурвал гъан хъуну, миннат-ссуннат бувну бур, лажиннича, итаакъи му жагъил, тиву мунах ялугъисса буцайдуш бурича, куну. Санитарналгу, пишгу куну: «Насу вилва ЛайлачIан Мажнун», - куну, хъярчгу бувну, гъан ивтун бур.

Микку азарханалий Аьлил цалчин Марияннул чIаврайн ппай куну бур. Щалла хъхъуну чу ххяххан бувну най, багътIатI хъуну бивкIсса ганал чурх, ччиссаннуйн ппай чайхту, цакуну кIушиву яла ларсьсса кунма, бигъа лавгун бур.

**Булбул бур багъраву
Ччаврил угъ-къак тIий,
Циярва бигъану
Бусса ххай бурвав?**

Муния махъ шанийн багъну Марияннул арулла шин хьуну дур. Аруллагу шинал мутгалий, яттичал лавай-ялавай, къутанная зунттавунай, ягу зунттава къутаннай найни, шинай цал-кИйла лув-ялун учIайсса ивкIун ур Аьли. Азарханалул цIимилул душругу, хIакинталгу ялугълай бикIайсса бивкIун бур кута къяплувусса «Страдевари учIаннийн», ганал скрипкалух вичIи дишин.

Ахиргу, азарханалия Мариян шаппайн итабавкъуну бур. Гъумучату КIамахъалийн аьравалттий биян бувну бур Аьлил. Мискин, арулла шинал мутгалий базурду бази лагарчагу, ликкурттаву рухI дакъа, занан хъанай бивкIун бакъар... Ганин мушакъатшиврул цалчинмур группа буллуну бур. Сагъну-саламатний га буцин рявххуну бивкIмий жагьилтал, душ ххалшайхту, най буна, гания ябившуну бур.

Цавува цивппа гайннавасса цаппара уграштал ххарину бивкIун бур: «Тти ххалбаннуча щил буцайрив? Тти къабитантIисса бакъарив язи увгъума гьалмагъайл?» - тIий. Аьлил гъан-маччамийгу бивкIун бур: «Вин муния щарсса къашайссар. ОьрчI бан аьркинни, ххулув буллан аьркинни, къурув буккан аьркинни, ичIаллил давуртту дуллан аьркинни. Мийннулсса цу буллантIиссар? Къабити Мариян, цамур жалин лякъинну жу вин,» - тIий. - «Къачча ттун цукунчIавсса цамур жалин, мусил хьусса бунугу. На так Мариян бакъа цамур буцин тIий акъара», - нетI бувгъуну, лахIан ан къашавай авцIуну ур някIчарил хьусса Аьлима. Ци банссия туну, пайда бакъассар тти куну, гъанмийннангу, дустарангу ганал тIимуний бавцIуну, ччайнугу-къаччайнугу хьирив бачин багъну бур.

Ххишалларан щарнил хьунилсериннал душнихъ цIувххукун, гагу так Аьлин бакъа къахьунна тIий бивкIун бур. Ци банссия микку? Жьаматрангу рязий хьун багъну бур.

ДуркIун дур хъатIул къини. Жалин ялапар хъанай бивкIун бур Ухщарний, наврузбаг – Бащарлий. Мурзуний дирхьусса КIамахъаллал щарнил кIичIирттугу къумассар, къума ратIруния. Жалин чай буртти бивтуну, хъхьури ганил гъанчувнал дугъан увну, тиха-шихагу чIарав-душварал бугъан бувну, цукун-бунугу биян бувссар тавханттувун. Мушакъат хьусса ччисса къакъабивтссар, цалва махъ зия къабувссар Аьлил. Мугу ганал ца виричувналуксса чумартшиву диркIссар.

**Ччаврия гьалгъа тIийнан
Ччаву цирив кIулссарив?
Ччаву, хIасратгу ккухIлай,
КъаивкIмананни кIулсса.**

Мяйра шинай мийннал дянив оьрчI къавхьуссар. Ялагу бивкIссар маччахьул бахчилай ганахун: «Жу вихъ тIий бакъаяв, къашайссар вин Марияннуя щарсса, цамур душ буца», - тIий. Амма Аьли цалва мукъуя тийнай ан къавхьуссар: «Нясивну бухьурча, оьрчI Аллагънал булунсар», - укуссар хIухчил.

Ахиргу, Марияннул лякълуву хьуну, оърчІ бай чІун дуркІссар. Улу, лагма щархъаятугума – Ппаласмату, КІихІарчІату, Урувату, Мукъарияту, жямат бавтІссар, Мариян оърчІах бивчІанссар, тІий. Ахиргу, щукру Аллагънайн, сагъ-саламатсса арс увссар. Так га мадарасса хІаллай оьнга тІий къавкІссар. Хъинну чІарав бавцІуссар цІимилул душ Гъумучатусса Аъжа. Ганил, чІаврдайх хъатру ришлай, оърчІ оьнга чин увссар. Ганан ХІажи-Аъли куну, аьпабиву Аълил буттан цІа дирзссар. ЦІа дизай кьини тирхханнарал аьтІутІий бувссар цалва скрипка мурадирайн ивсса Аълил. Марияннулгу цилла ляличІисса такъвалий балай увкуссар...

**Дунияллул хазналул
Заллу вия арчагу,
Ци бувайссаркъай мунил
ДакІ дачІинма акъаний?**

**Алжаннул хІурулэнтру
Циняв вилар чирчагу,
Цибанна ччиссаннуха
Лавхъхьусса бакъахьурча?**

Аълил ва Марияннун цачІу ялапар хъанай 52 шин дурссар, цив алжаннул ххари баннавча. Ликкуртгайх карщивгу дархІуну, Мариян ичІаллил давуртту дуллай, зузисса бакъацІайва тІий, буслайнма бикІай. Ганил ужагъ тІурча, накІ руртІуну хІачІан кунма, марцІшиврул пар-пар тІий бикІайва тІар.

Щятува щилва оърчІавунгу даврих гъира бувтуна тІар. Шяравугу га кунма усттарсса дарзи, мусил гулавати щацу цамур къабикІайва тІар. Марияннул чІарав ав-гъав бан ганил маччахьул бавцІуссар. Шардасса даву дарчагу, къатІаллил даврийн ганища буккан къашайсса бивкІссар. Мунин кабавкъуссар Зузу тІисса цилва ссурахъил. Зузу Аълил чІавама уссил шар диркІссар. КъатІаллил давуртту: ххулу бан, кІуриялтту буххин, ччантІакъурду бахІин, ччар дан га лагайсса бивкІссар.

ХІажи-Аълин оърчІнийва буттал пишкаш бувну бивкІссар «Казань» тІисса гармунь. ОърчІавунгу гъира бивзссар га бишлан, личІи-личІийсса макъанну руцлан, бала-гъалай тІун. ЧІаважагъил хъувкун, буттал га цащала яттичІан увцссар ца шанма зуруйсса, школалий каникуллу дуссаксса хІаллай. Аъли, мюрщину буна, оърчІру захІмат буллай вардиш бансса къасттирай ивкІссар. Каникуллу къуртал хъувкун, ганал арс цащала Гъанжилийн увцуну, «Мелодия» тІисса ттучанналува ганан ссайгъатран аккордеон лавсъссар. Муна му кьини цанна байран хьуна тІий, гармунналуцІа ришлашисса ляличІисса тІааьнсса къанкъ хъама къаритай тІий, буслайна икІай ттигу-шилагу балайчи ХІажи-Аъли...

Марияннул ялагу ххюва оърчІ бувссар: шама арс ва кІива душ. Гайннал кІия арс нязанний ливтІуссар: МахІаммад – авария хьуну, Малик-хІажи-хавар бакъа чил канища. «Ярапший, нину-ппу сагъну буна, оърчІал дард

къаккакканнав!» - тийна бикйайва тIар арсваврах аьтIаврил мурчIи хьусса Мариян. Щукру бусса ХIажи-Аьлил ссу ниттин цIасса, цIими ххисса Мариян. Шамсият тIимур душ тIурча нину-ппу апалухьхьун лавгун махь хар-хавар бакъана хъап бунни лавмартсса КIяла цIуцIаврил. ХIажи-Аьлил дунялул чу ур Юсуп тIима уссу. Строительный техникум къуртал барчагу, найрдучи хьуну, шяраву къуш бивщуну, найрдаха зузисса.

Оьнга балайлийн кIура бавну, Аьлил ва Марияннул хIакьсса ччаврил барашиннаран куна, ХIажи-Аьлия хьунни машгьурсса балайчи! Ганал балайрдугу учай, дакIния микI бассан банну, - вай ттизаманнай бигъанма интернетравух ччаву дуллалисса, ласру ва хьами ляхьлахьисса жагьи-жугьултран насихIатну хьунсса, -

**Гуламан тIутIух луглай,
Ритав щалла дунял,
ЧувчIав чув лякьинссия,
ИчIува ххяхлай дуна.**

- Лайлал ва Мажнуннул, Фархадлул ва Шириннул, Юсуплул ва Зулайхатлул, Гьумучиял ПатIиматлул ва Бархьаллал Маллейл, КIамахьаллал Аьлил ва Марияннул хIакьсса ччаврия:

**ХьункIул тIутIух буруглай,
Булбул тачIав букъаххай,
Лещивухьул вай яру,
Вих буруглай, букъаххай...**





**Хажимурад
Х ГУСАЙНОВ**



ШЯРАВУН ХЪИН ХЪАНАН

Хавар

Ца чумал на, хъинну туннурдал цуцаврил къашавай хъуну, азарханалий, хъинхъанай, ца зуруяр ххисса гъантри хъуна. Гива итаакълакъиний, на хъин уллай ивкIсса хIакиннал: «Вил туннурду хъиннува хъхъара хъуну бурча, ва авазасса шагърулул оърмулия игъалаган, марцIсса гъава бусса зунттавусса шяравун насу», - куна. Бунияла ттунмагу чIалан бивуна, къатри бувансса проектру дувайсса институтравусса чертежирттал ялун агъну икIаврил, хъхъара бувшиву ттулва туннурду. Ххишалларан ттушалва институтраву дуклай бивкIсса жагъилтал, душру бакIрайн багъний, гайннал хъами дурцуну, душру щар хъуну, оърчIругума никирацI бусса кIулшайхту, хъиннува дакIнил манзил кутIахъанан бикIайва. Ттул оърмулул шиннугу зувинния лирчуну дия. На навагу нитти-бутта бакъасса, интернатрай хъуна хъусса оърчIра. Бюхъайва ва иширайну цуксса нава чурххал оввхъусса, чувчIав цичIав жагъалашиву дакъасса унугу, душваврал ттухра ангъла къадуллай бушиву чIалан бикIайва. ХIакиннал шяравун насу учирчагу, ттул шяравугу мукун нава гъансса, гъансса инсангу акъая.

Амма ттул шяравун игъалаган лагаврил ишру азарханалия увкIсса къинийва ххуйчулийнмай кIуралаглан бивуна. На азарханалия увкIсса кIулшайхту, ттул секциялул тия чулийсса ттулва лакрал миллатрал админа ва щарсса ттучIан бувххуна. Гайннашал ихтилат буллай унува, на бувсъссия гайннахъ хIакиннал маслихIатраягу.

- Вагъ, Рамазан, ина ссал балаллий урар? Жул Лаллухъиял шяраву яхъанай дуссар Ххадиджат тIисса ттул ниттирсси. Ява, цурдагу цурдалу.

КІанин хьамалгу хьинну ххирассар. Ина ва на гьантІиссару кІаничІан, ина кІанийн тапщур уван. На яла махьунай занаикІанна, - куна чІаххучу Арсеннул.

- Валлагь, биллагь, Рамазан, хьинну культурныйсса хьамитайпа дуссар. Ява, цурдагу хьярчругу буллан кІулсса. Ина Арсеннух вичІи диша. Насу кІаничІан, игьалаган. КІанин инава бизар кьахьанан, кьатта-кьушливугу кумаг банссар, - куна Арсеннул царссанил Сабриналгу...

Ца-кІива гьантлува, ттулва машиналул багажникгу Арсеннул ниттирссин ссайгьатирттал ва нава кІаничІа усса мутгалий дукра дуллансса затирттал бувцІуну, бавчуссия жу Лакку билаятрал чулийнмай. Гьумукун бивну махьгу, Лаллухьиял шьравун мадарасса ххуллу бия. Арсеннул ниттирссил кьатри дия бакІшьярваллил махьун машина лагайсса ххуллул чІарав, кьиблалийннай дирхьуну.

Хьиривмур кьини на Арсен кІюрххила Гьумуча МахІачкьалалийн нанисса маршруткалийн иян увссия. Гания махь ца-кІира кьинилува бунияла ттун бувцІуна, нава бизар кьахьананшиврул, ци-дунугу Ххадижат ниттирссил кьатрай дуллан аьркинну бушиву.

Бия Ххадижат ниттирссил оьлгу, ганил февральланийва бувсса бугьарасса бярчгу. Ххадижат ниттирссил бувсуна ца гьансса инсанначІа ттурзанналуву бушиву ацІуннивун бивсса яттугу. Бия ванил хІаятрай мукумма мукьва аьнакІигу, гайннул хьунмурну заназисса индушккаксса ажаригу. На Ххадижат ниттирссихь бувсьссия цалчин чарабакьа шиккува, цІияллий, кІиккунмай мурцІув бан багьлай бушиву аьнакІал кьатта. Акьарив ванин цинмагу захІматну бушиву хІаятравун занан ккунуккуккирттал хьирив. Мукумма ттун ччанбивкІуна ванил кьатрал цахьисрагу сий дучІан дуван, ччянира дурсса, сир ялтту ливккун, ххяра-цулттив хьусса, цІияллийн буккайсса кьатлул нузру ва чІавахьулугу цІусса бишин.

- Аман, ттул ххуй, ттул угти вания тийннай цимий шин хьунхра, - куна ганил.

Амма на кьанкьану ттулвामуний авцІуссия. На бувсьссия ттулла цаагу, навагу дакІний личІаншиврул, дуван ччай урача вай давуртту, ихтияр дула, куну. Бувсьссия на мукумма Ххадижат ниттирссихь вай давуртту ттулла жиплува дуван ччишивугу. ХІасил, дуллуна ттухьхьун ихтияр. На яла, лавгун Гьумукун, заказ дурссия нузру ва чІавахьулу. АьнакІал кьатта бансса тІамагу, мярдугу лавсун, гай дишин «Газель» машинагу Гьумучатува бувгьуну, увкІессия. Яла, хьиривмур кьини, кІиккунмай, цІияллил мурцІув буллан ивссия аьнакІал кьатта. Ца лахІзалува, ахттайн бизавайсса чІумал, игьалаган шьяивкІун унува, ттун баллан бивуна гармун бишлашисса чІу. На Ххадижат ниттирссихь цІувххуссия, ва цур ва гармунчий, куну. Ганил бувсуна ттухь:

- Инава кунма, бигъалаган гъинттул бувкIсса жулла шяравасса, шагърулий яхъанахъисса инсантурал Лариса тIисса душ бур цилла буттарссичIа. Мунил бишлай бикIантIиссар гармун, - куну.

Ттун Ххадижат ниттирссил бувсъсса хавар хъинну тIааьн бивзуна. Ххишалларан, ттул чурххавунгу цакуну ругълу дакъа га гармун бишлашисса душнищал кIулхъун ччисса гъавас бувххуна. Амма, ци багъана бувну, гайнначIан гъанссарив къакIулну ивкIра. Ттул бахттилун, ца-кIива гъантлува жул къатрал ялтту нанисса кIичIирава Ххадижат ниттирссий тIисса чIу баллан бивуна. Га чIуний къатIув дурксса Ххадижат ниттирссил:

- Гъа, Ларисай, ина бурав, ци тIий бурав? – куну, цIияллил зуманирдай хъуна.

- Яр, Ххадижат ниттирссий, вичIания цIусса нузру ва чIавахъулу, ххишалларан, аьнакI ал къатта хъуну бур. Шюшин аьркиннихха, - тIисса чIу бавуна.

Нагу, Ларисал цIа баяйхту, Ххадижат ниттирссичIанай хъуну, га ихтилат буллалисса чулийнай урувгссия. Ххуллул лувсса ккурчIавсса чарий, щинату нанисса уршагу бивхъуну, Ххадижат ниттирссищал ихтилатрай бия душ. Ганий бия лахъисса, гъарта-гъарзасса, уттисса «даргиял гъухъа», - учайсса гъухъа. БакIрайгу лухIи-оьрчIисса карщи дия. Симангу душнил зунттал бургъил сий дучIан дурсса, хъиннура лухIи къаларгсса, урувгнал яру аглан буллалисса дия.

- Вагъ, Ххадижат ниттирссий, вичIания хъамаличугу ур. Му цур? - куна ганил.

- Ва Арсеннул ва Сабринал чIаххучу ур. Ва ттучIан отпускалий гайннал иян увунни. Ваналли вай давуртту дурсса. Нану шилунмай. Валлагъ, биллагъ шюшинна, - куна...

Гания махъ Ларисал ва ттул дянивсса дусшиву гъарта-гъарза хъанан дивуна. Ларисал бувсуна цувппа, музыкалул училищегу къуртал бувну, дарс дихълай бушиву МахIачкъалалийсса ца школалий. Ларисащал жу Лаллухъиял лагмасса бакIурдийнгу лахъайссия. Гикка, зиярат буллай, лагмасса тIабиаьтрал караматшивурттахгу буруглай, жулва-жулва хияллахъхъунгу ххуллу булайссия. Чан-къанну тIий жул дянив хIасул хъуна дакIурдил гъаншивугу. Ца чIумал мукун, шяраваллил махъсса ХъхъичI-БакIу тIисса кIанай щябивкIун, жу, шяраваллих зиярат буллай, хавардай буссия. Ттун ца лахIзалуву Ларисал бакIрайсса чIарарайх ках учин ччан бивкIуна. Ганил мурччивугу бунбутIаха лархъхъуну, гъухъа диртун, «жучIан гъанхъу», - тIисса хханссия.

- Ларисай, ца иштахI багъуннича, вил бакIрайсса чIарарайх кахгу куну, мурччайн ппай учин, бучIириив? - куссия на.

Ларисал цал хъяхъаву дувуна, щалла симан хъяхъаврил таргтІий дурну.

- Ттун цалчинни бакІрайн агълагъисса, душнил чІаравгу щяивкІун, ганихъ ппай учин бучІирив тІисса жагъил. Ттун цукъавххунма учайх-хива оърчІал душнийн ппай. МахІатталшиву оърмулуд, - куна.

Нагу, ганил гихунмайсса ихтилат бяличІан бувну, хъачІрайх кагу дуртун, ттучІанмайва бувну, мурччавун ппай куссия. Ларисал мурччив ттулмийннуйн ларсса чІумал ттун ттуламийннуй гунизив хъусса ххива. Гай муксса кІирину дияхха.

- Вана, ванийнин микІ лавчІун бивкІсса ттул чурх, Рамазан, ина бассан бавай. Мудан пикрилий бикІайссия: та, чув, цукун хъувивав ва иш, тІий. Ина цалчинсса адаминал инсанна, Рамазан, ттул мурччайн ппай кусса. Буттал ххира баву къахІисавну, - куна.

ХІасил, ттул Лаллухъиял шяравун Ххадижат ниттирссичІан лавгсса чІун хъинну бахтти бусса хъуна. Жу яла Ларисащал икърал дурссия, жува шагърулийн бучІайхту, на ттулва чІаххул Арсен ва Сабрина гайнначІан мугъи гъанбуван, куну. ЧІалкъавхъуну жу хъатІигу бувссия. Тямадашиву дуллалисса Арсеннул чІарав аькълукарну дуссия Ххадижат ниттиррсигу.

Вихъул 2020 ш.



Драматургия

Сиянат ХАЖИЕВА



ССИГЪА

(Кітя актернансса сценка)

Сценалий бур шябивкІун къари ва къужа. Къужлул канихь дур аьсав. Лагма-ялтту ягу бивтуну.

КЪАРИ. Ца ссигъа булуннача, хьунсарив бувчІин?... (Пауза. Къари къужлукъ ялугълай дур, ганал жаваб дулуннин. Къужа ур хьхьичІун уруглай, яла, жиплува ссунтІ бувккун, ссунтІа тІун икІай). Да, на вицаллахха гьалгъа тІисса!.. (Къюнч учай къужлуйн).

КЪУЖА. (Ганал дакІнийн шай ссунтІ. Аьнча тІун икІай). Ина бакІрава дуклай дурав? Цивхьуну бур тІар?..

КЪАРИ. ОьнтІуллуву оьрватІив кьяр-кьяр тІий бия тІар... (Пиш-пишгу тІий, ганах дуруглан дикІай).

КЪУЖА. Ина чІур-чІур тІий дурав?

КЪАРИ. Ца ссигъа булуннача вихьхьунма, хьунсарив бувчІин?

КЪУЖА. Ина ттухь цичІав учав?

КЪАРИ. (Лахьну, ганал вичІилухун диркІун). Ца ссигъа булуннача, хьунсарив бувчІин?

КЪУЖА. (Рязий акъа). Му ци леххавур, на кьюкІ хьуну акъарахха ттигу...

Къари. (Чулиннай диркІун). Муниятурахха ина аппарат вичІайн лавх-хусса... (Хъян дикІай).

КЪУЖА. (Къаччан бивкІсса куна). Ина циван хъяй дурав, бачІи ссихІ?..

КЪАРИ. Хьунсарив бувчІин ссигъа?

КЪУЖА. На чІиви оьрчІрив ссигъралсса буллан?... (Пауза). Хъинни, бусласу.

КЪАРИ. Шанна ччаннай заназисса, мукъва я бусса, мукъра вичІи дусса зат ци духьунсар?

КЪУЖА. (Ца лахІзалува). Му за буслайний, инсаннал мазрай, духІин-нарай бусан кашайрив?!

(Чу хъяврин буллай). Буду, буду, гьюдугъду! Цахьи лахьну буси му за, вицалла инара гьалгъа кьатІий!

КЪАРИ. (Лахъну, тикрал буллай.Къужа ганил чларавнай шай, вичи кЮла дуллай). Шанна ччаннай заназисса, мукъва я, мукъра вичи дусса зат цирикъай?

КЪУЖА. (Пикрирдавуна лагай). Цал ттигу тикрал бувала му вилва суал...

КЪАРИ. Шанна ччаннай заназисса, мукъва я бусса, мукъра вичи дусса зат ци духъунссар?

КЪУЖА. (Пикрирдайгу ивкун). Ттун мукунсса жанавардания къабавссар, кка,- ча ккаккави...

КЪАРИ. Пикри бува, къужай, пикри бува...

КЪУЖА. Гюла, цал ттигу тикрал бувала...

КЪАРИ. (Паракъатну, лагъсса чуний). Шанччаннай заназисса...

КЪУЖА. (Хъювссулну). Му за буслайкун, вицалла инара гьалгъа къатий, лахъну бусан къашай-рив, бачи ссих!

КЪАРИ. (Сситгуй). Да, я укуна къаритара на ина, я тукун! Хъунмасса иш бурив шикун му бувчин!

Вил канихъ ци дур?!

КЪУЖА. Ци дур?

КЪАРИ. Аьсав!

КЪУЖА. Мунийну цивхъуну бур тар?

КЪАРИ. (Ганал ччаннай ка щай). Ва аьсав дакъа вица занан къашай, вагу хъанай бур вил

Шамулчинмур ччан, кива я вилвасса, гаймий кива - бишай яру!

КЪУЖА. (Сситгуй изай, амма унийн агъай, яъни, щяиклай). Дацун, ина ттуя ссигъри буллай диркун дурахха! Виятува цукунсса ссигъри ляхъан бував?! Бавив нагу вияту ляхъан?

КЪАРИ. Бува, На, ина кунна, ссирипур тун ххайурав? Ва цир ттулгу аьсав... Яругу нагу бишара, тайлассар, вичлахун чутру къабучара... Яр, барххуй, (ганайх ттунгъану ках-шах тун диклай) тти жува хъунив хъуну буру, ци банссар...

КЪУЖА. Ттун дакний дурахха инагу, вил жагьилнийсса чунгу... Лахъира-лахъисса ликри, бярдун кунмасса яру...

КЪАРИ. Вил турча Чапаевлун кунмасса ссирсилтту...(Къужа рязийну пиш-пиш тун иклай).

КЪУЖА. Да, къарий, дуссия ттулгу мукунсса чун, душру, илхьи даркуну, хъирив заназисса...

КЪАРИ. Тайлану буси, барххуй, ттиния жулва оьрму лавгунни, на мудан вин щак-шук тийнна диклайссия жагьилний, дяъвайнна, аьттийнна, тачлав дурссарив ина ттуйн хаиншиву: ттуцал ялапар хъанан ивкний шийнай цамур хъамитайпалуцал...

КЪУЖА. Мий щин дакний буссар тар тти ...

КЪАРИ. Гукъай буси тти, таний кунна, ттигу дяъванххай урав вихунна...

КЪУЖА. (Ивзун лавгун, ца лахъзалува занашай ца стакан шагьнал лачал канихъну). Букки...

КЪАРИ. Вайгу чуннигар, вай букансса ккарччив дурив ттул...

КЪУЖА. Букки, на мий вин букан лавсун къаувкирача...

КЪАРИ. Мунийну ци хъунтиссар?

КЪУЖА. Мийксса хъанних эшкьи дурну иклайссия на, учиннуча, лютишиву дуллай...

КЪАРИ. (Чулиннай). Агъ, хъунмавхъу ниц, хъунмавхъу ниц, ацлу, на вицлуксса баннача! (Пиш – лищал).Къавихра.

КЪУЖА. Ина цлуклай дия, на тлайлану бусав.

КЪАРИ. Инания цилла члумал даврия учлайва, ляркъусса клапикл ттухъхъун дулайва...

КЪУЖА. Агъ, ттул бачли ссихл, вин хъамабивтурив на командиров-карттайн лагайсса ивклиши – ву, ттун премия, шабашкагу гъашайва... Вилгуния ухъунссия вина ххуйизайсса гивах дав - рий хъунама иклу, укунасса адаминал инсан иклу. Лажинни, ина так ттуйн иман дир – хъуну дуссияв? Тлайламур бусан, на вийн вихшала дирхъуну иклайссия. Ттун клулли ина ттуйнна лажин тиртлусса шарсса диркшивугу ...

(Чирттарайх ках-шах чай. Ч!алай дур га ссибивзун душиву. Къари, чулиннайгу диркун).

КЪАРИ. (Цихъра цурда). На вин тачлав хаиншиву къадурссар, амма на ина мукун къаитанна!

(Дирзун лагай. Ца лахлзува дучлай ца стакан ппиринжралгу лавсун). Ма, ккалакку тти!

(Хъхъичлун бугъай стакан ппиринжрал).

КЪУЖА. На къавихра. Ина вилва клизвагу лалакьин къабайва...

КЪАРИ. (Пикридайгу диркун). Агъ, хъунмавхъу къячай, ина на жабилний чанклучин къаритайвав, ттуйн щак-щук тлий, инава тлурчан, цаймий лютий хъаннищал занай ивкун ура!..

На гъунттийва аърза булуннахха вия личлий хъунсса!.. (Аьсав гъздай ганайх рищун).

КЪУЖА. Ина бакправа дуклай дурав, на хъярчъя буллалисса! (Залланувун). Хлазран бакъархха учайсса:

«Балчаннул хасият клул дайссар, ганийх ттунгъану ках-шах куну, шарссанил хасият-ганин ссибизан бувну... (Аърчагу тлий, аьсавгу гъзд дурну, къужлуйх рищун дачай. Къужагу лихъай, ланклагу тлий).



Публицистика

МАХІАЧКЪАЛАЛАЛ АДВОКАТЪТУРАЛ
2-МУР КОЛЛЕГИЯЛУЛ ХЪУНАМА
АЗУЕВ СУЛЕЙМАН ОБМАЕВИЧЛУЩАЛССА
ИХТИЛАТ



Ттигъанну жул корреспондент Дагъусттан республикалий ца дурксса адвокатнащал хъунабавкъуну, ганахъхъун цаппара суаллу буллунни. Ялавай бишлай буру гай суаллу ва жавабру.

- Сулейман Обмаевич, буккултрахъ вилва оърмулия бусарча ччива.

- На увссара Ахъушийл районналийсса Бархъаллал шяраву 1960 шинал 25 сентябрьданий колхозниктал Азуев Обмал ва Нурижатлул кулпатраву. Дурккусса бакъанугу, ттул нину-ппу хъинну мяърипат дусса бия... Жу мукъа уссу бия. Даргиял дянив ялапар хъанай бунугу, жу тачла в гайннал сан бакъул бувсса иш къавхъуссар. Ялунгума лап лавай бавцуну, хурматрай биклайва жуха даргаллал халкъ.

- Ина школа чув къуртал бувссар? Тай шиннардия ци дакний ливчери?

- 1977 шинал Бархъаллал Дянивмур даражалул школа къуртал бувссия. Ттун яла-яла тарихрал дарс ххирасса диклайва. Та заманнай учительталгу ляличийнува ххуйсса биклайва, тайннахасса хурматгу дуклаки оърчал чиннав, халкъуннал чиннав лавайсса биклайва. Гай цалла даврил устартал бия, хъинну ялув бавцуну дарс лахъхъин байва жу. Мунияту бусса

оьрмулхун ций дакИний ливчIунни. Ттул классный руководитель Куса МахIаммадович МахIаммадов икIайва. Га лап паракьатсса, гьира бутанну дарс дишайсса ия. Тарихрал учитель Кьаландаров Якьуб XIаммадович жун цинявннан ххирая. Ганал жун чIивинийва бувчIин бувна Ватан ва Ватан-налул хьхьичIсса бурж тIисса мукьурттил мяьна. Нажмуттин Мусаевич Мусаевлул география, Яхья МахIмудович МахIмудовлул военно-патриотический дарсру дишайва. Вай учительтурал цимийвагу бархьарачунан оьрмулувун путевка дуллуссар.

- Школалий ниттил мазрал дарс нитти-буттан ччай бухьурчари оьрчIан лахьхьин байсса, яьни факультативный дарсирайн кIура даен даврийн ина ци чара?

- XIакьину кьурушрал замана бувкIун бур. Мюрши миллатирттал мазурдища хьуни мазурдищал бяст буван бюхьлай бакьар. Агана мюрши миллатирттал мазурдил чулхуннайсса политика хIукуматрал даххана кьадарча, иш оьнихун багьантIиссар. Жува тIурча, ниттил мазрай гьалгьа тIун аьркинссару шаппа, жулва маз буруччин шаймур буван аьркинссар.

-Школалий динналул дарс дишаврийн ина ци чара?

- Динналушал кьадархIуну дарсру дихьлахьаву ттинин, хаснува исламрал динналушал кьадархIуну, бяйкьу маша бивкIссар. Гьарца элмулул вирдакI – динни. XIасибул-калам, динналулли элму хьхьичIуннай дуллай диркIсса цилва чIумал, дунявийсса элму дукканнийнна: медицина, астрономия, эстетика, философия.

- Ина Армиялий кьуллугь бувссарив?

- Бархьаллал Дянивмур даражалул школа кьуртал бувну махь, на Армиялийн увцуна. На кьуллугь буллай ивкIра артиллериялул частьраву, батареялул старшинану ва полкрал разведкалий. Ттул пикрилий Армия – му чара бакьа цума-цаннангу ххалбан аьркинсса оьрмулул школа бур. Тикку чIалан бикIай цума цу уссарив. Гужлан шай Ватанналухсса ччаву, бувчIай нитти-буттал захIматрал кадру-кьимат.

- Ина цумур институт кьуртал бувссар?

- Армия лавхьун махь, МВД РД-лул тIайла увккуна Рязаннайсса Высшая школа МВД-лий юридический факультетрайн. 1986 шинал на тIайла увккуна МВД-лийн кьуллугь буллан. Ттун циняр дарсру ххира хьуна. На гьира буну ккалай уссия. Школалий дуклай унава ттун ххира юридический элму. Рязаннай тIурча ттухь дарс дихьлай ия машгьурсса аьлимчу Зайнуттин Астемирович Астемиров. Га хьанай ия СССР-данул исправительно-трудовой правоул гьану бивзма. Профессор Астемиров ттун эбратну хьуна, цанчирча, чIивисса лакрал миллатрал вакил, га профессоргу хьуну, Училищелул хьунаманал хьиривчуну зий. Мукуна тикку дарс дихьлай ия уголовный правоул и криминалистикалул цIа дурксса профессор Огурцов Е.Г. Профессор Меркулов А.В. тIурча гражданское правоул ва гражданский процессрал яла гужма саньткарнан ккалли айва СССР-даний..

СССР – данул чIумалсса дуккавилгу, ттисса Аьрасатнал чIумалмунилгу дянив диялсса тапаватшиву дур. РФ-ралмур дуккавил кьайда, танийх бурувгун, махьун дагьсса дур.

- Буси гихунмайсса вилва оьрмулия?

- 1985 шинал на буцав Бархьаратусса Азиева Шати Тажуттиновна.

Жу кІя арс хьуни барду. Ттул шарсса ОьрчІал поликлиникалий медсе-
страну зий бур.

- Вилла даврия бусарча ччива.

- 1993 шинал на МВД-лул даврия лавгра. Зун ивкІра банкрай юристну
ва цаймий личИи-личИийсса идарарттай. 2003 шинал, статусгу лавсун, ад-
вокатну зун ивкІра. 2007 шина 2014 шинайнин зий ивкІра Дагъусттаннал
Адвокатътурал Палаталул вице-президентну. Мува ппурттуву сакин дурсса
МахІачкьалаллал 2-мур адвокатътурал коллегиялул председателънугу на
увчІунна. Муния шинай шикку зий ура. Агана, цан зий ура адвокатну
чирча, на жаваб дулунна: ттун хьинну ххирар ва даву. Мунил на уххан
къаарача, ялунгума игъалаган увара. Адвокатнал даву на хІакиннал давришал
лацан давияв. Мий личИи-личИийсса, цаннишал ца къадархІусса чІалай
дунугу, дуссар кІивагу пишалул аьмсса лишанну. Агана хІакиннал зу
чурххал цІунциялуца мурахас буварча, адвокатнал дакІнил цІуцаврица
мурахас буллалиссару.

- Махъсса ппурттуву тамансса авазасса давуртту ялун лирчунни. Му
захІатсса ишираву коллегиялул даву цукун дачин дурссия?

- Пайлассар, махъсса ппурттуву резонансныйсса давуртту чІярусса
хьунни. Цаппара цинявннан кІулсса къуллугъчитурал адвокатнугу на хьу-
ра. На учивияв: цалва подзащитныйтуран кумаг бан, шаймур бувайссар
цума-цагу адвокатнал, куну.

- МВД-лул даврийн ина ци кьимат бищара?

- МВД РД-лун хьхьу-къини дакъа зун багълайсса чІун дуссия. Амма
мийннал лажин лухИи къадунни. Масалларан, 2018 шинал МахІачкьалалий
РавхІаният Оьргъулиева тІисса жагъилсса хьамитайпа бивкІуна. Ганий
рахІму къабуну бия, 300 азара къурушрансса мусил ссинжирданул
цІаний. Цуцав барагу акъая. Ттун къчагъ къалякъинсса ххива. Амма
на аьйкълай ивкІун ура. Анализ ДНК дурну, милицанал къчагъ
увгъуна. Диялсса цаймийгу давуртту дурссар, МВД-лий цалла даврил
профессионалтал буну тІий. Даки дарцІуну учин бюханссар министр
МВД РД МахІаммадов А.М. цалла даврил минахур ур, куну ва цакъсса
каялувчи ур, куну. Юриспруденциялия ихтилат багъний, на кІици авияв
Аьрасатнал Конституционный судрал член ХІадис Аьдуллаевич ХІажиев.
Га, мийжаннугу, цІа дурксса аьлимчури, Аьрасатнаву акъа, улу, дазул
къатІувгума. Мукуна кІици авияв Хавчаев Аьдулла АьбурахІимович,
чІярусса шиннардий дакІмарцІну судебный системалий зий ивкІсса. Вай
бакъассагу, буссар жулва цябала цаймийгу ххаллилсса юристал.

- Аьрасатнал ва Дагъусттаннал инсаннал ихтияду дуруччаврил систе-
малийн ци чара ина?

- Гьакссагу лацинсса тагъар дур му системалул. Уполномоченный по
правам человека тІисса цІагу дуллуну, яла цичІав ихтияду дакъасса
халкъ бур мий. Цири мийннаша дан шайсса? Мий бикІан аьркинни цалла
даву кІулсса, цими бусса ва даки тІайласса.

- Цумий адвокатътурая эбрат ласара ина?

- Совет заманалул адвокатътал: Семен Львович Ария, Федор Никифо-
рович Плевако ва цаймий; ттизаманнулмийннава - Генри Маркович Резник.

- 1999 шинал ополченецтурайн ци чара ина? Мийннал цІанийгу тамансса
турду гьагълай бурхха.

- Пайламур бусан, му масалалуву ччанавккусса затру бур. Хисав бува инава, та чумал республикалийвагу къаивкисса чувналгу цал-цал ккаккан дай ополченецнал удостоверение. Му чун нанисса затри? Начгу диклан аьркиннихха!

- Коронавирусрал хIакъираву бурич чинсса?

- Коронавирус - жуйнма цинявннайну ливксса бала бур. Вирусология ва фармокология пандемиялийн хIадурну бивкIун бакъар. ЧIявусса халкъ ливтIунни Дагъусттаннайгу, Аьрасатнавугу. Хъунмасса иш буссар ява жува низам дуруччаврилгу.

- Конституция РФ-рал дахханашивуртту дуллалаврия вилци пикри бур?

- Ттуща дакI дарцIуну учин бюхъанссар, дахханашивуртту дува ягу мадара, так Аьрасатнаву хIакъинусса къини В.В.Путиннул кIану бугъансса, ганал кунна даву дачин дан бюхъансса чув акъар, куну. На укун тIий ура дунияллул арагу чIалай, Аьрасатнал лагма чIуллалисса Натолул бурхIлугу чIалай. ХIукуматрал виваллил тагъаргу щалла ххуйсса дакъар. Мунилссагу бан так цIанасса президентнаща бакъа щичацIав хъуншиву къакIулли.

- Политиктурава вин щий дакI дакъай?

- ХъхъичIва Аьралуннал генштабрал хъунаману ивкIсса генерал Валентин Ивашов ур хIакъсса виричу ва дакIмарцIсса инсан. Гъарца ганал зумату бувксса махъ тIайласса бикIай. Дагъусттаннал политиктурая ихтилат ласурча, ттун тари изай сенатор Сулейман Абусаидович Керимов. Танал жунма бувсса хъинбалул бачIиннул бачIивагу бансса цучIав укканшиву къакIулли. Пандемиялуя ххассал бан 3 млрд буллуссар Дагъусттаннан. Му бакъассагу, гъарца Хъунмасса Буттал КIанттул цIанийсса дяъвилул ветераннан 2 млн арцул буллунни. Чара бакъа кIицI лаган аьркинни депутат ГД РФ Аьбдулмажид Варисович МахIрамовлул цIагу - ва чIявуну увкIун Дагъусттаннайн, халкъ къамул буллай, гайннал умудру биттур буллай икIай.

- Ци чара ина жулла республикалул автономиялул 100 шин шаврийн?

- Зунттал халкъ ябивщуну бивкIссар, автономиялул мий цачIунмай бувссар. Автономия дирхъукун, тамансса хъхъичIуннайшивуртту хъуссар: ххуллурду бувссар, гидроэлектростанцияртту бувссар, порт тIивтIуссар. Автономия дихълай биялсса захIмат бувссар Габиевлул. Жува ганайн барчаллагърай бикIан аьркинссару. Так ревоциялул ва совет властьрал салкъи дурмур, коммунистураца ва либералтураца дуруччинни къархъусса.

- Ци чара ина Дагъусттаннайн Меликов Сергей Аьлимович тIайла уккаврийн.

- Агана лайкъсса къаивкIссания, тIайла къауккантIиссия. Хъунмасса умуд бур ганал дагъусттаннал халкъуннал ахIвал гъаз банссар, даража лавай банссар тIисса. Къуллугъу барча буллай, на ганан чIа тIий ура хъинбайбихъу, тIайлабацIу!

- Ци учивияв ина «ЦIубарз» журналланул буккултрахъ.

- Бюхъаннав зул журнал, тIутIайх бичиннав. Газетру ва журналлу бушаву - мугу миллат сагъну бушаврил лишанни.

- Барчаллагъ, Сулейман Оьмаевич, цуксса вилла чIун дакъанугу, жучIан редакциялийн увкIун тIий. ПайлабацIу баннав вин гъарца дуллалимуниву!..

Ихтилат бувссар Милана РАДЖАБОВАЛ

» Критика ва Библиография «



Сибирбаг КЪАСУМОВ,
Дагъусттаннал халкъуннал шаэр

АБАЧАРА ХІУСАЙНАЕВЛУЛ ТВОРЧЕСТВОЛИЯ УРЧИВА-АЦИВА МАХЪ

**Чув - унугу хІарачат
Ниттил ккукку хІалал бан,
Ливчуну яру бачай,
Лявхъу кІану лавай бан.**

**Щарнил халкъ, вирттал бакъа
Ттуяту чув шайссияв?
Мийннаву инсап дакъа
Ттуя инсан шайссияв?**

НахІу-гъилишиву мукъурттил! Ягиншиву мийннува пар тІисса чаннал! Ссал гужрал бурвав му чани партІий бувну? Ци хІикматрал дурвав му чаннал нахІу-гъилишиву жулва базу-базурдавуху нани дурну, ъттуттурчІавугу дасласи дуллай? Цири ва? Аъзисса жулва ниттил мазрал бияларивкъай, ХІусайнахъал Абачарал пагъмулул гужрив? Ягу, мий кІивагу цаннийн ца щуну, парх куска цІарал ламарив?

ЧІалачІисса куццуй, шеърилуву уттинин шинчІав къабавсса, щилчІав къаувкусса ляличІийсса цавагу я махъ, я калима дакъари. Мунишалва архІал «Ниттил ккукку», «Лявхъу кІану», «Инсап», «Инсаншиву» лакку мазраву бур учинсса, инсаннал дакІниву яла язимий асарду хІасул буллалисса, гъарца къини, гъарца ссятрай баллай бухъурчагу, тачІав бух къашайсса, щяв къабагъайсса махъру бур, цивгу шаэршиврул гъу-нарданул цирив ца янин чІалакъачІисса, амма чуврив душиврийн шак бакъасса лахъшиврийн, ларайсса поэзиялул даражалийн гъаз бувсса.

Ссаву чІалай бур вин му гъунар? – куну, цІувххунахъгу, на учивияв: хІарачатраву! Виртталсса шарнил халкъгу бусса, халкъуннаву ларайсса инсапу дусса, ляхъу кІанугу лавай бан, ниттил буллусса ккуккугу хІалал бан, авторнал, цува чув ухъурчагу, буллалисса хІарачатраву. Му инсаншиврул лавайсса бурж хъама къабитансса лавайсса асар буккувугу чантІ учин бан бюхъавриву. КІай ялттува, оьванма кунма, увкуну гъан бувсса ххуттардил чІарах, букку оьна гъан къаивтун, ца лахІзалийссава-гу аглан увну, буссарив ва укунсса асар ттувувагу – бакъассарив? – тІий, цахъва цува зума цІухлахи ан бюхъавриву. Ца мукъуйну – поэтикалуву.

* * *

Лакрал машгъурсса чичу, аьлимчу, литературалул ахтарчи Абачара ХІусайнаев увну ур І92І шинал таний Гъази-Гъумучиял округрайсса Хъусрациял шяраву, хъудугъул кулпатраву. Гъашину Абачаран там хъанай дур оьрмулул 70 шин.

70 шин. ЧІяруссаривкъай мий, чанссарив? Гъалбатта, чІумул, ахир дакъашиву хІисавравун ларсун, пикри барчан, 70 шин бучІир ца лахІзалун ккалли дангу. Амма инсаннал оьрмулул ккал дуллалаврихун багъувкун, ттул пикрилий, хІисавравун ласун аьркинни къа чІумулгу, дунияллулгу ахир дакъашивуча, му ахир дакъашиврува инсаннахъхъун биривсса лахІзалулу мунал бивтсса ххуллурду ва дурсса давуртту.

Вай чичурду дуллай айишиннин, ттул тамансса хІал хъунни, Абачарал оьрмулул даптарданул 70-ллагу лажин ххилтІу дуллай, ва пикри хъунни, мюрш хІисаврттахун къаагъну, миву ттунма хъунабавкъмуния Абачара ххирамийннахъгу бусан.

Буттал шяраву школагу къуртал бувну, Абачара лавгун ур Гъумук дянивмур даражалул школалий дуклан.

**Вай экъи нанисса
Хъун бярнил щатІив,
Бакъарив душваврал
Хъюрухъру чІантІив.**

**Бакъаривла бальзам
Ччучлачи дакІнин
Лултту къурнил хъхъев-хъхъев,
Ччярав дяркъу щин!**

«Гъумучиял шагърулухъ» тІисса Абачарал творчестволуву ца яла чаннамур ттеркъукъину ккалли бан бучІисса шеърилува чІалай бур цукун ликъаххайсса асар биян бувссарив «шаэрнил, шавкъиралгу ччучлай», къачІа-къачІа лаглагисса, оьрмугу, дуниялгу цал хъхъичІун

хъаттирду тІитІлатІисса, оббалларал иттав уттигу уруган увасса жагьилсса жула шаэрнал дакІнийн нахІу-хІалимсса, цал ккавкама мудан хьурдай тІутІи айсса Гъумучиял тІабиабтрал, лухччи-ссавнил ва инсантурал. Мьяйжанссар, шеъри чивчуну бур шаэр, дяъвилий щаву дирну, комиссовать увну увкІун махъ:

**Ватанналул цІаний
Талай цІу яргний,
Вирттаврал хъазамру
Барурду шайний,
Вил муси кІикІайсса
Магьир каруннил
БувцІуссар душманнан
БивкІулуд бокал.**

Амма шеъри бувккунал Абачарал дакІний, гьаманки, та оьрчІнийсса асар цІулагаврийн цукунчІав щак къаучинссар.

Гъумук школагу къуртал бувну, Абачара увххун ур Орджоникидзелийсса (Владикавказ) І-мур пехотный училищелувун.

1941 шинал, лавмартсса душман жулла Ватанналийн ххяххсса чІумал, дан-дитанмургу ду-дуний къадиртун, 20 шинал оьрмулуву, оьчІарарайн чІила дахъра щусса Абачарангу багъну бур ярагъ кІунттил бугъан – Буттал кІанттул цІанийсса Хъунмасса дяъвилуву жулла Ватан душманная дуручлан.

**Аьзизсса оьрмулуд
Жагьилшиврул аргъ,
Дяъвилуд цІараха
Ттун кІул къархьуссар.
Му хІайп тІий ухьурча –
ПюрунчІулнияр
Гъюжу дукканнавкъай
ДикІул дакІнил ттарцІ, -**

учинтІиссар шаэрнал яла, дяъви къуртал хьуну махъ,

1947 шинал, жушравун лавгсса букку цанмавагу хІисав къахьунну, ссихІгу вив бугъан увну, къуману хІайпсса пикрирдавун лаган уллай, «Чув буру, дустал» тІисса аьрайсса цалва дустал дакІнин бичлачисса ца шеърилуву, - цалсса туну шеърирдайх хьунсса мажал щил буссар, - цалсса шаэр хьунама лейтенантнал чинналуву жагъ взводрал, жагъ роталул командирну:

**Гитлерчийтурал кьюкьрай
Автоматрах хатI бихьлай,
Царах ва янсав чIутIух
ЦIусса тарих ур чичлай.**

Абачара шеърирду чичлай айивхьуну ур 1937-38 шиннардийва. Амма унгу-унгусса шаэршиврул пIяй Абачарал творчестволуву личлай бур дяъвилул шиннардий ва мунияр махъ чивчусса шеърирдава.

НукIува оьрмулуягу, дунияллиягу за бувчIин бувасса чIумал, щюлли жагьилний:

**Сси лап аскисса затри,
Ссавур ятIул мусири.
Цан данна ахIмакьшиву–
Машара оьгтулучув!**

тIий, сайки, цинявпагу жагьилсса чичулт куна, аькьлу-кIулши бусан хIарачатрай ивкIсса шаэр утти, дяъвилул цIаравухгу лавгун, душманшивугу, оьбала ва зидгу цирив кIул хьувкун:

**ОьвтIий бур ттуйн ттигу някI чIутIул тIюьпан,
ОьвтIий бур цIанил ва бивкIулул майдан,
Агь, виргтаврал дуккай журат дунал жан,
Тиккур кьаритайсса гьунардан ххяххан, -**

тIий, утти цува ур хIадурну ххяххан «цIанил ва бивкIулул майданнийн, жан гьунардан ххяххан кьаритан». («Харьков жулвар» тIисса шеърилуву) Укун «шаэршиврул шавкьгу», гражданиншиврул буржгу бюхттулсса даражалийн цаннил ца гьаз буллалисса шеьригу, туну, муку-тукунссар учин кьахьунссар.

Гьаманки, мий ца шаэршиврул шавкьирава нанисса, цагу инсаншиврул куртIнива кьавхь тIисса кIивагу щаращул рахIматрал духьунссар Абачарал творчестволий мудан щюлли-вириннасса, гьалххасса аргь дизан дурсса.

«Ттун чIявусса бакIрайн кьабагьссар оьрмулуву, – тIий, чичлай ур «ХIусайнахьал Абачарал шеърирду» тIисса статьялуву («ХIакьину ва гьунттий». Дагкнигоиздат, 1981 ш.) лакрал машгьурсса чичу М-3. Аминов, – Абачарал кунма, хIалимсса, хIат-хIисав дакьа инсаннай цIими бусса, цалва бусса маэшатту, кIулмур-кьакIулмургу кIибачIин хIадурсса инсантал ккавккун, кIулну тIий, ттуца бюхьанссар Абачарал иширттал ва мукьул дянивсса ара архсса дакьар, хIатта мукьувунияр Абачара цалла дакIниву, адав-инсаправу лавайсса шаэр ур учин».

Адавгу, инсапгу, инсаниятрах ччаврил хъяхъа тїсса дакїгу дакъ-
анаща бюхъайссарив, туну, укун чил дардгу, къювугу цаллашиврий
къамул дан:

**Лахъхъу диркїунни къари,
Арс, аьзизсса, арс тїийнна
Аьрайва ливчїсса арснах
Хьулувун ялугълайнна.**

**Къаригу, къарил дардгу
Аьрщарал дургъунугу,
Дакїния дуккайссарив
Тагу, танил къювугу!**

Дяъвилул шиннардийсса Абачарал творчестволул гъанулул чарттуну
ккалли бан бучїир: «Дон», 1942 ш., «Шамайчїансса чагъар», 1942 ш.,
«Ттулва чанглихъ», 1943 ш., «Лачин Исмяил», 1943 ш., «Шахшахъал
Аьлихъ», 1943 ш., «Харьков жулвар», 1943 ш., «Душниятту аьрайн»,
1943 ш., «Оьрчїая шаппай», 1943 ш., «Гъумучиял шагърулухъ», 1943
ш., «Бикїай ца-ца душнил», 1944 ш., «Ахїмад-хан Султїан – ссавнил
пагъливан», 1944 ш., «Ттун кїулли», 1944 ш. Вайннувагу на личїи ба-
вияв шаэрнал творчестволул бюхттулшивурттуну ккалли хъанахъисса
«Шамайчїансса чагъар», «Гъумучиял шагърулухъ», ва «Бикїай ца-ца
душнил» тїсса лакрал гъарца хъатїай, мажлисирттай ва байраннай
учайсса халкъуннал балайлийн кїура бавсса шеъри.

**Итгалун дагълайсса
Сипатирттавух
Аьлтту хьурча ина,
Кагъруба чїантїив,**

**Хъама ритай виха
Щалла дуниял,
Сукку шай ттул мурччив,
Вихъ ихтилат дан...**

Бикїайхха ца-ца оьрчїгума, чил бунугу, жулва хьурдай чин кун-
масса. Бакъарив ва шеъригу шаэрналгу, къашаэрналгу цалва хьурдай
чинсса? Бакъарив, мьяжаннугу, ца лахїзалийсса духъурчагу, дуниялгу
хъама ритан дурну, ва шеърилул жува гъарма «кагъруба чїантїах» ва
цалва-цалва шамайхъах луглаги уллай? Мукун букку луглаги ан бюхъ-
авриву бакъарив, туну, поэзиялул гужгу, буржгу бусса?!

«Азарлий урчІттуршра ччянира хьуну, муьцІаллий шан кусса ши-
нал, май зуруй, кІусса щаву дирсса ка дурурххуну, гьан унна на, шава
хьин хьанан, Лаккуйн». ЗахІматсса щаву дирну, талан кьабюхьлай,
буттал шяравунай зана хьусса Абачара, 1943–45 шиннардий зий ивкІун
ур Ккуллал райисполкомрай. Исполкомрал дахху-ласулул отдельла-
ний зузисса Абачаран щинниаргу хьинну кІул хьухьунссия дяввилул
шиннардий зунттал шархъавусса ккаши-мякьгу, миккусса шахъаннил,
хьюльорчІал ахІвал-хІалгу. Му кІулхьушиву буслай бур чаривагума адав
личинсса иширттавуугу, ца-цасса инсаннаву му тачІаврагу чантІ кьаучай-
шиву ккаккан дан кунма, бюхханну чивчусса «Шалланул гьухьа» тІисса
шеърилува. Циксса хІайп буриу ххал бара шяирнал вай ххуттардиву:

**Къаччайнма чил хьуна
Шалланул гьухьа,
Ччайнма кІилчин лаххан
Нясив къавхьусса.**

1945 шинал Абачара увххун ур, Москвавуллал университетрал фи-
лологиялул факультетрал восточный отделениялул иран группалуу
дуклан. Ва ишгу ккалли бан багьлай бур жула шаэрнал оьрмулуу ца
яла агьаммурну. Цанбакъача, дунияллул литературалушлалгу, культура-
лушлалгу, искусстволушлалгу дус шавришлал архІал Москвавуллал уни-
верситетралгу, микку дарс дихьлахьисса шалла дунияллун машгьурсса
аьлимтуралгу хьунмасса хьин чулийсса асар биян бувну буну тІий
жула шаэрнал творчестволийн, пикри-зикрилийн, оьрмулул зана-кьу-
лу шаврийн. Москвавуллал университетраву дуклакисса шиннардий
Абачарал тІайланма парс-таджикнал мазрая лакку мазрайн таржума
буну бур Абулкъасим Фирдавсинал, Абу Абдуллагь Рудакинал, Абу
Аьли Ибн-Синал (Авиценна), Оьмар Хайямлул, Жалалуттин Румил,
МуслихІаттин Сяьдинал, Шамсуттин ХІафизлул, Бадруттин Гьила-
линал, Сяидо Насафинал ва цаймийнналгу шеърирду. Немец мазрая
Гьанрих Гьайнил, ингилис мазрая Джордж Байроннул, оьрус мазрая
Пушкиннул, Лермонтовлул ва цикссагу дунияллул цІадурксса клас-
сиктурал шеърирду.

**Лахьхьу ттул дус ия ттул душманнашлал,
Къачча мукун загьру хІаласса качар.
Хьун шатлучІа бивкІсса чІимучІалттуя,
Бюхьайсса ксса архну лихьан аьркинссар.**

Учинссарив, туну, шилчІав ва байт лакку мазравун, лакрал литерату-
ралувун цамур мазрава, цамур литературалува багьсса байт бур, куну?

Ттул пикрилий, къаучинссар. Укун усттарсса бур Абачарал таржумачий хIисаврайсса пагъму-гъунаргу.

**Дунъял ляхъан дайни каши канихънал,
Цанни къадурсса му дагъайкун диял?
Оъккину хъухъурча, тахсир щий хъуссар?
Ххуйну хъусса хъурча, цан гъагълагъиссар?**

Ва Абачарал парс-таджикнал мазрая лакку мазрайн таржума бувсса Оьмар Хайямлул байтгу, цала шаэрнал чивчусса «Аллагнахъсса суал» тIисса шеъригу чачIу биширча, щин-бунугу бувчIинссар дуняллул литературалулгу, парс-таджикнал поэзиялулгу цукун ликъаххайсса асар биян бувссарив Москавуллал университетраву жула шаэрнайн:

**Ухъурча ина мий, я хъунасса зал,
Вил симан дунаву вил дакIгу чув дур?
Вийн иман дирхъунал вийн вихшивури?
Зуна, цурк, къиярду, къачагъшивуртту?**

**Вай цимий азарда шинни лагайсса,
Вилва уммат вийнма мюгIи къахъанай?
Циксса идавсталли ина гъан бувсса –
Ци тарсъсса умматри, махъ къабувчIайсса?**

Вай лавай кIицI лавгсса Абачарал шеърилувасса байтрур. Мьяйжан-нугу, Оьмар Хайямлул байбивхъусса шеъри Абачарал къуртал бувсса хханссар.

Шаэр хIисаврайсса Абачарал творчестволия бусласисса ттулла вай щалла щаллу дакъасса, анавархъиннарайсса чичрурдаву на бусав, ттул-ва пикрилий, буккухъ букъавсун чара бакъамур. Шеърирду бакъассагу Абачарал чивчуну бур «Оьттул щаращи», «Бурккахъяннал ххурттама», «Ххуллул кIи-шанбачIулий» тIисса поэмарду. ЛичIи-личIийсса шин-нардий итабавкъуну бур «ЦIарал банавша», «Колхозрал гъи», «ДакI шанай дакъар», «ТутIал кацI», «Шеърирду ва поэмарду» тIисса жужру. Мий жужирдавусса шеърирдал хIакъираву, миву бумуния ва бакъамуния лап аьщу-дазуй авцIуну чивчуну бур нукIува кIицI лавгсса М-З. Аминовлул статьялуву. Мунихлуну ттун ччива ца-кIива махъ Абачарал прозалуягу учин.

1950 шинал, Москавуллал университетгу къуртал бувну, Абачара цIунилгу зана хъанай ур Лаккуйин. Лаккуй тамансса хIал бувну бур Абачарал Дянивмур даражалул школардал директорну, ниттил мазрал, оьрус мазрал, немец мазрал учительну Ккулув, ЧIяв зий. Лакку мазрал

ва литературалул дарсру дихълахъисса Абачаран шикку ашкара хъанай бур школардай оърчІру тарбия буллансса, мийннал буклансса прозалул жулла литература ссуусукъуну душиву. Цимурца къадиртун, ва агълай ур оърчІансса хаварду чичаврихун. Вайра шиннардий итабакълай ур хасну оърчІан чивчусса кІива хавардал жуж – «ЦулкІлул хІилла» ва «Битикъай чил кюру». Вай жужирдавасса тамансса хавардугу багъну бур Дагъусттаннал школардансса программардавун ва байбихъулул ва лаваймий классиртансса лакрал литературалул хрестоматиярдавун. Учин бюхъанссар, вагу Абачарал, нанижат дирхъуну, миллатрайгу, мунил ялун нанисса никирайгу аьтІий, дакІ цІуцІаву дурну дурсса ца хъуннасса давур, куну. ОърчІансса хаварду чичаврищала архІал Абачарал хІакъинусса къинигу хъуннасса давугу, аякъагу дуллай ур дуклаки оърчІал школардай лахълансса литературалул программарду, учебнику, хрестоматиярду ва укунма буклансса луттирду сакин буллай. Ттул пикрилий, вагу къачансса бусравран лайкъсса давур Абачарал дуллалисса.

Абачара ХІусайнаевлул творчестволуву ца аьчухну ялун чІалачІисса кІану бувгъуну бур «Бадрижат» тІисса мюрщимийннангу, хъунимийннангу, бугъаранангу буккултран ххуйну кІулсса, оьрус мазрайн таржума бувну, Москвавийгу итабавкъусса къисса. Ва къиссалул хІакъираву уттигу микку-тикку шархъаву ва шагърурдай, сурагъ буллан бикІай буккултращалсса хъунабакъавурттай. ЦІухлан бикІай, му цІунилгу къаитабакъинтІиссаривкъай, тІий. Мунилгу буслай бур Абачарал творчестволуву «Бадрижат» халкъуннан яла ххирамур произведение бушиву. Ссалли му халкъуннан мукссава мачча-гъан буллалисса? Ссавур мунил ляличІийшиву дусса? Шикку на тІайланма учивияв «Бадрижатлул» щалла ляличІийшиву, гъаманки, цуппа муна му жулва лакрал халкъуннал оьрмулувугу, багъу-бизулувугу, тІул-тІабиаьтравугу дур, куну. Мий цимурца Абачараша гъарца чулуха сазланну, хъиннува чІюлугу къабувну, хъиннува усалгу къабувну, букку вих хъунсса даражалий – къаралланий ккаккан бан бюхъавриву, къулчинмур векрал дайдихъулийсса лакрал шархъавусса халкъуннал оьрмулул суратругу, чІумуха лархъхъусса инсантурал хасиятругу буккул хъхъичІух устарту цаннил чІарах ца заназі дан бюхъавриву бур, куну. Мййжаннугу, «Бадрижат» ккалаккисса чІумал, букку, чІявуну хушравун лаглай, цува художественный произведение ккалай ушивугу хъама бивтун, ккалаккимунивух хІала-ккала къиссалувусса иширттавух чачун гъуртту хъанай, гъуртту хъанахъимийннащал архІал аьгу аьтІий, хъягу хъяй, ссигу бизлай, хІайпу тІий – ххаригу, пашмангу хъанай най ур. Мукун букку аьжугълув аншиврулгу, Абачара, му махІаттал ансса, уттинин щинчІав къабавсса, щинчІав къаккарксса ссахрив луглай, мийн-тийн ххяхлай, тивун-шивун ухлай акъарча, ца кІанава айивхъуну, мюрш ивкІун, уст-

тарну халкъуннан цанмагу оърмулуну чІявуну ккаккаймунія, инсаннал бакІрачІан бувкІмунія – цивава оърмулува лавсмунија – бургиярала, къулагъас дарала цал уттигу, жулва оърмулук, жулва иширтгах, жулла тІул-тІабиаџтрах, жулла хасиятиртгах, – тІисса куна, чичлай ур. Вайнна Абачарал къиссалувасса кІия гърттусалал сипатру:

«Чарил усттаргалгу Мюахъ чансса къабикІайва. КІайннавугу яла бюхъу бума Аьнилав ия. Аьнилавл къатрал чІиртталук исвагъину бакъин бувсса чарттал чІултти бивхъуну бия. КІай Аьнилавл къувкъуна ххяллул щуттава. КІива-шанма чІутІ бавкъуну, шамийлла бург рирщуну, кишинал ххяллуя чІулу бутайва. Сан бакъа гьарцаннал къабивтсса къунттуя Аьнилавл аьжаивсса къалагуртту, цІувцІу чартту байва. Аьнилавл къунтту цІувцІуну бувсса кІуссивуксса хъунисса кІуссив царагу паччахІлугърал цІигълуя ттинин бувтІушиву къакІулли. Хъулук чІиртталук бивхъусса гайннунун щарссанил щин рутІайва, аьркин дукъайва. Цалла канил бувсса хъунмасса авурсса дарвазалий чартту муксса ххуйну цІувцІуну, бючІан бувну бивхъуну бияхха, базурду чІалай бакъая. Аьнилавл кІяла ларзнил къатталалу цаймийннал тавхананияр марцІгъа, чІюлуя. Ларзнику рирщусса чарил ттарцІру, маз бивтуний кунна, дючІан дурсса дия. ЧІаланнай чІутІлих хъамитайпалул хъазамрал суратру дурну дия. Къатталу бия цІу буну чария бувсса, мукъра ликкурайсса мукъмурцІу стол. Ганий самоваргу дирхъуну, гъинттул Аьнилав чяй хІачІлай щяикІайва...

Барзулав личІийну гьарзасса хъу-лухччинул заллу акъая. Ганал цимийгу даву архІалла дачин дайва, архІалла къурталгу дайва. Барзулавхъул архІалва хІугу хІуй, цугу цулуй, хъугу къуру дуллай бикІайва. Вайннал кулпатгу хъунмасса бия, кумагчийгу чан къашайва. РукІлилу ниц, къаллуй оьл, лухччиний ххулу, къурув хъу дунугу, Барзулавл кулпат мийннул щаллу къабайва. Мунин бувну, ганал каница къяцІа-къютІилу чан къадайва. Га ия къалайчийгу, муххал усттаргу.

– Аллагънал магъула дичиннийн ялугъларча, ккашил ивчІайссар. ХІарачатранни барачат бикІайсса, – тІун икІайва га чІявуну.

Барзулавл гъунар яла-яла чал бурхІай бия. ЧІурппия, Бядухъа Барзулав къювкъу багълун ппалул хараллу лавсун учІайва. ДачІайва къатІув уккансса акъасса щахъаннийх, дан байва чухъри, булайва гайннан цанма лавхъхъусса хІакъ, даххайва тийх-шийх ххирану. Ласайва Гъумучату дух янна – дакъин дайва. Ласайва яншку чалагъайртту – рищайва мангъал, цІудайва. Байва муххал къаллу, бадрарду, лагайва Кураллавун, гьарзат тийх даххайва, кІива чай лачІал гьивурдугу дурну, шавайн учІайва.

«ОьрчІру чІукъа къабуккан», Барзулавл нюжмардий цал ккурч-аьрччапгу дан байва, ялун уттуллул нагълий бьвххусса туртул кучча ягу цирда оьлил нагълил ягълавгу бутІин байва. Къассаврая бакІ-щикІ,

вихссака ларсун, кулпат диклух ххуцI хьун къабитайва. Бихху тачIав къакъан къабайва. ХIайван, кIункIурдуву цивува цувппа бавцIан бувну, къячIавун бутIайва. КIилахъан, интлахъан кIункIурдуйн ца-ца кIичIала бутIлай, Барзулавхъул мудан, цIудикI канакисса кунма, бикIайва».

ЧIалачIисса куццуй вай кIиягу адаминаву цичIар я ляличIийсса дакъар, я ца ларшусса. ЦукунчIавсса хIарачат Абачаралгу бувну бакъар мийннаву ци-дунугу ца-ца ляличIийшинна –щивучIав бакъасса гьунар ккаккан бан. Вай бур жунма гьарца цархъал бакIрах хьунабакъайсса ца чарил, цагу муххал усттартал. Вайннал дуву-дитугу личIи-личIийсса дур, тIул-тIабиаьтгу. Тахмин, хIисаврай бургарча, вай кIинналагу аьмсса, цаннаха цаннал лархъхьуссагу цичIар дакъари. Амма бюхъ-анссаривкъай жуцава вай ца лаккучу, цагу къумукъ, лазгиричу ур учин. Ттул пикрилий, къабюхъанссар. Хьирив лавну, куртIну пикри бувсса чIумал, жунна лякъинтIиссар вай кIиягу адаминаву личIий-шиннардаяр чIярусса цашивуртту–аьмшивуртту цивгу, так вайннан кIиннаннагу дакъа, щалвагу жулва миллатран – зунттал халкъуннан хасъсса. Ххалдара циксса жулва Лакку кIанттунгу, миллатрангу хасъсса суратру буккул хъхьичI дацIан дуллау урив Абачарал, вай кIиягу адаминава бусласисса ацIва-къува ххуттаву: Къянатсса Лакку кIану, Лакку кIанттул къянатшиврух къабурувгун, бувсса хьунисса кулпатру, дуву-ритулул ссуссукушиву, чарабакъулун гьарца зунттал чувнан аьркинсса ци-бунугу ца канил пиша, мува чарабакъулун лахъхьин дурсса пишалул усттаршиву, кура-кирилий лавгун, цалла думур къ-алмух даххана дуллалаву. Вай цимурцаннуйхчIин чIалай бур зунттал халкъуннал цархъавусса. оьрму ва багъу-бизу. Вай кIиягу адаминаву щалва лакрал миллатрангу хасъсса яла хьунмур ца лашавугу – цала-цала канил марцIсса захIматрайну цивппагу, оьрчIру-кулпатругу щаллу буллалаву. Вайннула ялун – цинявппава зунттал халкъуннан хасъсса аькьилшивугу. Му аькьилшивугу цукун усттарну пар тIий дурив ххал дара: «Аллагънал магъула дичиннин ялугъларча, ккашил ивчIайссар. ХIарачатранни барачат бикIайсса», – тIисса Барзулвал мукъурттива ягу «ОьрчIру чIукъа къабуккан» мунал буллау ивкIмунива.

Миллатрал оьмургу, хьинмургу, мунил дард-хажалатгу къакIулсса мунил чулухуннайсса хьуннасса ччавугу, дакIцIуцIавугу оьтту-ттур-чIаву дакъасса инсаннаша укун, мунил дакI-ттиликI я-къатIа дичинну, муния чичин, ттул пикрилий, къахьунссия.

Чансса дакъар къиссалуву укун, ччавугу, дакIгу итадаркъуну, гьарца чулуха мюрш ивкIун, хьирив лавну, щаллу дурсса суратру. Абачаран ххуйну кIулли лакрал нукIу заманнул оьрму, танийсса халкъуннал багъу-бизу, маэшат. Хьиннува ххуйну кIулли лаккучунал дакI-аьмал, бюхъу-тяхъа. Ци захIматсса иширахъхьун агьарчагу, Абачарал «Бадри-жатлувусса» цаягу гьурттусала бан-битан бухлавгун, ласу бувхIуну

личІлай акъари. Ялунгу, рартІуну кІирагу кагу, ялун бивмур яла ласун, мунил кІушиврулу лавхІуну, гъагъан къабацІан, чумартну цацава шаймургу, къашаймургу буллай бур.

Барзулавл оърчІ – Маликлуца, хатІалий ккулла щуну, Барзулавл чІаххурачІан бувкІсса душнийн, ккулла лякълувух бувххун, ттиликІрахух ливчусса щаву хъанай дур. Гъарцаннанма чІалачІисса зат бур му я ккулла щусса душнин, я мунил махънан, яла-ялагу цанма хатІа канища бувкнан бигъасса зат бакъашиву. ЦІанакулгу мукунсса инсан бивкІулуца ххассал ан жула гъала-баласса духтурнацагума къабюхъай. Амма Барзулавл шиккугу хъис хІатти бухлаглай бакъари. Ванал, анаварну бувцуну душгу цачІанма шаппай, бувну лахъисса тІаннул ххалаххи, бавхІуну ганихун ганз-къарттусса хъхъагу, бувккун мий цанма кІулсса дарувравух, лякълуйсса ккутІух бучІлай, ттиликІрахух буклай, щаву хъин дуллай ур. Бургияра шиккугу цукун ххуйну кІулну дурив Абачаран аьтІавривухва хъагу хъай, хъахъавривухва аьгу аьтІисса мюрщи оърчІалсса психологиягу. Цукунсса къюву дакъахъунссия, къюву рахІат дансса цукунчІавсса дару-дарман бакъасса заманнай, лякълуйсса щавулул ккутІух бувчІуну, лахъива-лахъисса тІаннул ххалаххи, хъхъагу хъиривну, ттиликІрахух буклакисса чІумал чІивисса душнин!

– БацІукъай ца-кІира нюжмардува ина цукун къиссу буллан бикІарав, – тІий ур Барзулав, душ къювулия бйаххихху буллай. – Щюлли хъюру дан къурув занантІиссара, оърчІи-кІури, някІунна дурну, хІату бучІавантІиссара. Ттунгу дулаваннав?

– Туну, ина хъинсса урахха.

– Жува ина цукун шар булунссарав: ацІва чаг бизанну, шалла шар датІинну, шаннайра зюрнав-накъара архІалла рищунну, – гужсса хъатІи банну, зярмахмурдал дарайртталгу балгуну, жу ина, чайгу буртти бивтун, хІурматрай биян баннухха.

– Барзулав мяммай, – тІий бур, щавул къювугу хъама диртун, хи-яллал жаправун лавгсса душгу, – на вилва махъ бити, Маликлуцал къагъанна, – тІий.

Цунияргу захІматсса ччанакрулувун багълай бур къиссалуву тІул-тІа-биаьтгу, яхІ-къириятгу чувнал дусса цуппа Бадрижатгу. Бадрижат шар хъуну бур цинагу ччисса, цуппагу ччисса Садикълун. Бадрижатлух эшкъилул ччучлачима хъуну, вайннал ара лиян дан, дянив уххан букъав бигар къабитлай ур Аьйнилавл арс Аслан-ХІусайн. Шяраву, чулланий, хъув, ххалав Бадрижатлул ящайний ацІан къаитлатисса Аслан-ХІусайн, муния ци чулигу махъ буккан бан, халкъуннаву цува мунищал ишру буману ккалли хъун, хІалтІилуха мунийн ссалам-ссайгъатру, арцурду тІайла дуклай ур. Амма Бадрижатлул мий цичІар къамул къадаврицІун, хъуннасса ссавургу, хІарачатгу буллай бур му зат цалва махънан, яла-ялагу Садикълун кІул хъун къабитан. Ай, араптуннал дянив ссивцІу

мабагъарача, оь эьки малагарача, душманшиву мадагъарача тIисса мура-
драй. Амма Аслан-ХIусайн мугу, тагу бувчIайсса къучи акъари. Ахиргу,
ванал чичлай ур СадикълучIан, Бадрижат бачIин, цашчала ттупангирттай
уккан (дуэль) нану тIисса чагъар. Му чагъаргу хаварсиз бириллай бур
Бадрижатлухъхун. Бадрижатлул миккусса ссавургу ччима акъбил мяш
хъунсса дур. Бадрижат, му затгу щинчIав цалванан кIул хъун къабивтун,
цуппа лаглай бур оьрмулул угъара хъусса Аслан-ХIусайннул ниттиус-
сийчIан Ттаттал МяммачIан – цилвагу буттал ссурахъичIан, вихшала
дуначIан. Миккагу Аслан - ХIусайннул ниттичIан.

Вана Гулшагълухъсса Бадрижатлул ихтилат: «Гулшагъ, жува мач-
ча-гъанссагу буру, чIаххулгу буру. Гъаттайн руртIусса щин цачIанна
дирукун, ивкIуманалгума, нитти-буттайн къаоьвкуну, «гъуя, чIаххул!»
учайссар тIар. На вай дукрагу дукав (бургияра хъуннашиву ссавурда-
нул. С. Къ.), вай чяйгу хIачIав зунний дусшиврий. Амма ва истакIан
бувцIукун, ялтту бачай. Тти нагу му вил арснал ялтту къявхъ тIутIи
бувну бура...»

Гулшагълулгу, Аслан - ХIусайннул уссу Къагъирдулгу гъаба хIарачат
буллай бур Аслан- ХIусайннун цува лавмартсса, къадарсса даврихун
ахчуну ушиву бувчIин бан, ва му хъун нанимуния айшин ан. Аслан -
ХIусайн вайннацагу кар ан, сав ан хъанай акъари.

– Я Садикъ ттуца ивчIантIиссар, я – на танаша, жун, Бадрижат
бакъавчIуну, чара бакъар, – тIий ур га, Бадрижат цуппагу чIарав буну.

– Та гужну виричусса адамина урхха, ина танашал лаяйссарав,
пакъир? – цIувххуна Бадрижатлул.

– Вагу ярагъ, вагу къяпа, вагу дакI, нагу чув, – мюрая нагангу бучIан
бувну, гъарзат пахрулий ккаккан дуруна Аслан - ХIусайннул, – яр, на
учин-цIанинвагу Асланнахха. (Вай махъсса махъру Абачарал бишин-
ма бихълай ур Аслан - ХIусайннул зумув мунал акъклу-духIиннарал
даражагу, пахру-ххарагу буккул хъхъичI ябишин бан. С. Къ.).

– Вищал адаминагу иян ан циванни? – тIий, мйяжаннугу, къявхъ
тIий бур бияйнийн бивсса Бадрижат. – ЦIана ттухъ я ххалаххи, я чIила,
я ххаржан дакъар. На ина ивчIан къабувкIра. Тихунай увккукуннив,
къаитанна. Ина куннасса щарссаннин нагу адаминара. Утти на зунния
душманну наниссара».

Ххира хъун куннасса ухъурча, инсан щин-унугу ххира шайхха. Ххи-
ра хъун куннасса бакъарив, туну, жулва Бадрижатгу, Бадрижат жунма
буллусса ХIусайнахъал Абачарагу?

Укун дакIнил авкъатсса хъамитайпалул сипатгу лакрал литература-
луву ттун цамур хъуна къадаркъссар.

ДакIнил авкъатшивруцIун Бадрижатлуву дур хъуннасса инсаншиву-
гу. Аслан - ХIусайн укъавтун къаитанна тIий, цуксса къянкъасса нани-
ятращал, ттупанг-гу лавсун, къатIув бувккун бухъурчагу, га кIичIиравух

нанисса хІисав хъувкун, Бадрижат: «Нава цира зузисса, банмур ва бакъа бакъассарив? Авлияну эшкъи хъухъума литІлангуния къатІайлар. Инсан ивчІавуния яла хъунмур бунагъри тІар. Щукру, ва пикри дакІнин багъну, нава пашман хъусса», – тІий, кІихІулла хъанай бур. Чалай бур шиккугу Бадрижатлул сси-къащилул, зидлилнийр инсаншиврулмур даража ларайсса душиву.

Ккалаккима уцан къашайсса куццуй паргалну, кюрщант ххалуїх лахлахисса кунма, къиссалул сюжет бачин баврицІун, кІукун инсаннал дакІнил яла кІюла-кІюлабий кІанттурдайх, яла язимий асардайх, сситтул ва ссавурданул, оьбалларал ва хъинбалларал, къюкъалларал ва инсаншиврул зума-зумардайх буккулмий асардугу бачин бан бюхъаву - му чичул хъунмасса гъунаргу, магъиршивугур.

Ххал бигъара цал уттигу, мукІру шияра цукун бюхханну, ччиманал дакІ-ттиликІ кІункІу хъунну ккаккан бувну бурич Абачарал оьттулуцуну, оьттун буккан бувну, Щарав ялапар хъанакъисса Бадрижат къюлтІницІух хъхъувай буттал шяравунмай аьлтту буккан нанисса чІумалсса мунил дакІнил хІал.

«Цансса ссавнил къиблалухмур чулух, ухнилух зунттал бакІая кІива къазихърал лахъшиврий някІсса ва якъутрал рангсса чани куннивух ку экъи гъан буллаї, пперха тІий бия хъунмава-хъунмасса Ттурши цІуку. Хъунисса бирлиантру дурщусса аьсавртту кунма, (шиккура къулагъас дара цукун марцІсса ва аьщуйн щилащисса дурив Абачарал лащанбавуртту. С. Къ.), куннийн ку бивхъуну чІалай бия Хъамиттурши ва Цанттурши. НякІва-някІну, яргва-яргну липІ-липІ тІий бия Ригель. Тай ссавнилухсса лагъ-лахъсса зунттал щару, вай Бадрижатлун вакссара хъинну кІулсса, вакссара ххирасса ххяллу, ратІру, лултту нанисса Хъуннех, буттал шяравалу, ссав оьрчІи дурсса цІуртти – вай гъарица зат гъархъхъуну ганин ляличІийнура ххирану дия, гъурбатрая занакъусса га вайннуя буччин хъанай бакъая. Цуппа ялтту занай хъунхъусса аьрщарайх, цилва кІанайх, ччиту кунма, куклуну ша бизлай, яла аскима цурку кунма, бачин багълай бия, хаварсиз, цучІав ялун къауккан, анаварну бурчІила букъан бия. Цийнма цуппа мукІру хъун ччай бакъанугу, дакІнил куртІниву: – Цана? Цивана? – тІисса хІайплил агъу бия.

– Ттулла шяраву нава чил бура, – тІий бия пикри».

КІицІ лавгмунил чІарав учаларттал, бусаларттал, лувлякъирттал, лащанбавурттал авадансса, халкъуннал зумуну щинтасса мазгу, цІанакулсса инсантуран куннан ччянира хъама диртсса, куннангу кІурагу къакІулсса лакрал халкъуннал нукІу заманнул аьдат-эбадатругу (Ххавххумий дакЫил баву, оьттун уккан аву, оьттулуцуну къамул аву, шариаьтрал суд-диванну, силистталул ххуллурду, милица, оьттулуцунал оьрму, ва цаймийгу хъатІал, къюртІилул, багъу-бизулул, кири-куралул.) диширча «Бадрижат» бучІир лакрал нукІузаманнул оьрмулул энциклопедияну ккалли бангу.

Дагъусттаннай революция дишаврил иширттая чивчусса лакрал прозалува ца яла къулаймурну ккалли бан бучИир Абачарал «Арамтуннал кIунттил ярагъ бувгъуна» тIисса къиссагу. АцIния мукъра-ххюра шиная, лакрал литературалул редакторну зий, ттул канилух чансса къабувкунни ва темалиясса произведенияртту: хаварду, къиссарду, очеркру ва романну – двулогияртту, трилогияртту. Амма, дакI дарцIуну учин бюхъанссар: чIявусса къавхъунни мийннуву укун, аьщу-дазуй авцIуну, Лаккуй, Дагъусттаннай, Аьрасатнаву та чIумал мьяйжа-мьяйжаннугу хъанай бивкIсса иширтталгу хъирив лавну, мий иширттавух гьуртту хъанай бивкIмийннал цIарду-цIардугу куну, та къызгъинсса чIумул суратру аьрчча-мурчIи къадурну, аьлттуну, сагъну буккул хъхъичI дацIан дансса произведенияртту.

Жулва чичултрал чIявуну, художественный произведениярттаву авторнан ляхъан бангу бучIишиврул ихтиваргу цIакълин дургъуну, Дагъусттаннай революция дишаврил иширттая цанма вари чинсса цичIав кIулнугу бакъана, мий кIул бан, мийннул хъирив лаянсса захIматгу къабивхъунма, я чIун, я ишру, я тарих цичIав хIисавравун къалавсуну, тахмин, хIисаврай ялттутува ци-ци-бунугу чивчуну гъан бай. ЦIух-ху-бусу къабикIаншиврул лакрал уссавагу 4-5 революционертурангу, кIантурдангу цанна-цанна дакIнин дагъ-дагъсса цIардугу дуллуну. Мукунсса произведениярттаятурив буккугу ца цIана махъаллил шай. Я мийннува щинчIав цичIав дакIний къаличIай. Мий произведениярттал хъунмурчIин диял дакъашивугу буккуйн щялусса – Дагъусттаннайсса щалла революция, произведениялул автор часса урив, миччасса «революционертурал» дирхъусса кунмасса, асар биян буллалавриву дикIай. Щялусса затгу, туну, лахъи къалагай. Укун учин Абачарал къиссалия къахъунссар. Вайнна къиссалуву гьуртту хъанакъимий: Ккулатусса Чаг Къуби, Вачатусса Гъарун Саэдов, Гъумучасса Саэд ХIабиев, Ххюлусматусса МахIаммад Касаев, ГъунчIукъатIатусса Ибрагъимхалил ва Нурислан Къурбанаьлиевхъул, Ххутиятусса Манап Чанхиев, Грозный-лиясса Гикало – цинявппагу чIявучиву машгъурсса лакрал революционертал ва мийннал уртакътал. Укун чIявучин кIулсса, халкъуннаву машгъурсса инсантураягу, мийннал дуллай бивкIмуниягу, гъай-гъай, ци-ци-бунугу, цукун-бунугу чичин къахъунссар. – Да, му мукун бакъа-яхъакъай, да! – учинма чан къашавай тIий. Мунихлуну шикку аьркинни мискъал-заррагърал тIиссаксагу хъирив лавсса захIмат бишин. Къиссалуву гьуртту хъанакъимийннал цIарду мяълумну учаврищал архIал, цIа-цIа куну, мяълумну ккаккан бувну бур революциялул ишру хъанай бивкIсса кIантурдугу – Гъумучи, Къала, ГъунчIукъатIи, Лаваци, Темирхан-Шура, Порт-Петровск, Грозный ва цаймийгу. ХIатта щархъал ва шагъурдал лагма-ялттусса кIантурдал цIардугума:

«Хъурвахаллил ламугу лавхъун, Бухъливух лавай нанийни, кИй, ссавнил ва лухчинул дазуй мукъа инсаннал къаралти чІалап диркІуна». Гьалгъа Ххутив Чанхиев МапанлучІан Гъаруннул чагъар лавсун нанисса Чаг Къубин хъунабавкъсса инсантураяр. (С. Къ.)

«На ярусаннайх тихунай Бушихъун, тиха ялавай Грозныйлийн, гикка Гатойлив чачаннал партизанначІан лавгссия» – тИй, буслай ур вава Чаг Къуби, Лаккуйн Туркнал аьрал бувкІун, лакрал партизатуран къюлтІ хъун багъсса чІумал, цува Чачаннал партизантурачІан лавгсса куц буслай.

«– Баяра, да! – увкуна адаминал лахъсса чІуний. Циняв, махІатгал хъуну, бу-буний бавцІуна. – Чалкъавхъуну цІусса хІукумат дан, жулва хъунимий битантІиссар. Гивунсса захІматкашнак вакилтуралмий цІарду дусса сияхІ ацІния цалчинсса бюллетІенни. Му ацІния цалчинмур бюллетІен жулвамурди. Зузалт-хъузалтрай аьтІисса мискин-гъаривнал хІукумат дан, ацІния цалчинмур бакъа мабутари!

– Шамулчинмур бюллетІен хъус-къинилул заллухъруннал, хан-багтуралли! Му жулва бакъар! – КІанацІун бавхІуна Къубил. – Му мабутари, муни ка машари!»

Щин ци кІулссар хІакъину кІай та чІумал Горский правительстволул цархъавун гъан бувну бивкІсса бюллетенная ва тайннулсса буллак бивкІмийнная? Ягу, учиннуча тара Горский правительстволул мискин-гъаривнайх дачІин гъан дурсса чит, иникІма ва цаймий луртан лакрал буржуйтурал, щинчІав цичІав ккаккан къадиртун, шанма-мукъва багълун гилахра дарххуну, жипру арцул дурцІуну диркІшиву ва мий арцу зеххин жяматрал Гъарун Саэдов бакІчисса комиссия бувну бивкІшиву, ва мий буржуйтурачІан шаппа-шаппай лаглак зерххушиву.

Шиккугу на мукІруну ура, ва укун мюрш ивкІун, хъирив лавну захІмат бивхъусса давугу Абачарал дакъа цаманал къадантІий диркІшиврий. Абачаралгу му хъунмурчІин миллатрай, мунил лавгмуний ва бучІантІимуний аьтІий дуршиврий.

Хъунмуних ургІил бан кІулнал итгала чІиримургу архну къалагай. ЧИри дикІу, хъун дикІу ххуйсса усттарнал дурмургу чув духъурчагу чІалан дикІай. Оьрмугу, кІантурдугу ххуйну кІулсса Абачаран лапра ххуйну кІулли инсантурал гьалгъалул къайдардугу, кІантту-кІантурдал лугъатругу, кІулли мий усттарну цалла чичрурдаву ишла дангу:

– Яллахъалма, ваймий чуври, дус? – цІувххуна Касаевлул.

– Веймийннак ака бунни.

– Ина цан къабав, аьшнай? – увкуна Нурисланнул.

– На цидан бавияв, (І): чу къаивчІав, чил хъус къадукав!

– Вагъ, кІяламийннавах къуллугъ бувхъуви, – махІатгал хъуна Касаев.

– Ярчу, туну, ччашил ивчІан икІабияв. (I) Тайннаханияр хьинну зу-
хагу баннахха,- укун ккуллал лугъатрай гьалгъа тІий ур Къалалийсса
ярагъуннил ва луртанналул складиртгал къаралчий ккулатусса ХІа-
жибутта.

– ОьхІацІулт укунсса бакъа цукунсса бикІайссар? Дакъу дакъана
икІанссарца куну, сахъаннил, хьюлурцІал цитлия думийннал давла
бувну бури. Цумур сариатрай буссар сагъилун ларсмур къуруссиран
даххи тІий. Суй бан аьркинссар мий, – тІий, махъ лахълай ур халкъун-
найх дачІин итадаркъусса чит, чатан, а-та лаккуйсса буржуйтурал
цанна-цанна дарххуну, тили-хъили даврил хІакъиравусса митинграй
цІувкІуллал лугъатрай Хъун ЦІувкІрачу.

– Къуранналул ца суралий, ал-лазина ярбуна фи амвали н-нас тІисса
кІанай цилва багълуяр ххирану хъус даххан къабучІиссар тІий буссар
тІий, аьраб мазгу, къурангу хІала бувну, малла къадинан лайкъсса куц-
цуй гьалгъа тІий ур Итулав къадигу.

Вай укунсса гьуртту хъанахъимийннал гьалгъардал цанна-цаннасса
хасшивурттугу художественный произведениярттан чарабакъа аьр-
кинсса шартІри. Ванил хъунмасса кумаг буллалиссар произведениялул
маз авадан баврин, мивусса суратру аьчухну чІалачІи даврин ва цалва
гьурттусалтрал цанна-цанна хасъсса хасиятру ва тІул-тІабиаьтру ккак-
кан даврин. Амма ва шартІирахгу жулва чичултравасса чІявумийннал
личІисса къулагъасшинна къадикІай.

Лагрулух бурувгун, Абачарал жува ихтилат нани бувсса «Арамтун-
нал кІунттил ярагъ бувгъуна» тІисса къисса хъунмасса бакъари. Ваний
дикІаннагу дур 55-56 лажин. Амма мий 55-56 лажиннарай Абачарал
жухъва бувсумур хІисавравун ласурча, ванащагу бюхъанссия цаннил
хъирив ца томру чичлай ачин. Вагу дур ца Абачарал чичрурдан хасъсса
ляличІийшиву. Къаххирар Абачаран нагъил лахъи дуллан, мукъурттих
бяххан бувну, пикри хъхъалахъан буллан. Бургияра, цукун лазилакьин
дурну, капливун дуртун дурив Абачарал кІия гьалмахчунал дянивсса
ихтилат.

«Дия цІаннал я бахІлахІисса чІун. Гъелисса гъинтнил хъхъуну Гъарун
цувалу Гъумучиял бярнил ккурккайх сайр буллай ия. Хаварсиз, чаяв
увккун, ганащал Къубигу архІал ивзуна.

– Ссалам аьлайкум! – буллауна Къубил.

– Вааьлайкум ссалам! – лавсуна Гъаруннал.

– Игъалаглай урав?

– Ура ца чансса затрал пикрилий занай.

– Цива-ци бурарч му?

– Ачу бусаннача, – куну, Гъаруннул Къуби цащала кІава цанма ххуйну
кІулсса бярнил лувсса пукълувун увцуна».

Бури в туну шикку цавагу ва къаучирчагу бучИя, букъарчагу, цичІав къахъунссия учинсса махъ? Ттун ттунма къалявкъунни.

Къиссалувусса цинявпапу ишру хъанай бур мивусса хъунама гъурт-тусала Чаг Къубил лагма-ялтту, чачун му хІалану.

«Къубил арулла шин хъусса чІумал, нину диркІуна. Чалкъавхъуну, бутгал шарсса дурцуна. АчІи ккашилсса, ачІи кІачІасса Къубийн утти къапазругу щилан диркІуна. КІира-шанна шиной бакъа яхІ бан къавхъуну, Къуби Гъумукун ливхъуна». Укун Гъумукун увкІун, цал шярайх уклай, маэшат буллайгу ивкІун, яла мукун «лажин лухІину ччатІ канакисса оърмулий» дакІ къадаркъуну, къазахъшиву дуллай ивкІсса Къуби, чан-чанну тІий, революциялул иширттавух хІала уклай, ахиргу, ваная хъанай ур мискин-гъаривнахлу жан дулун хІадурсса, мийннал унгу-унгусса мукъахчу. Миккува Къубин лахълай бур революцион-ныйсса даву даврил къяйда. Бивхъусса бурж ччясса мутталий, ккаккан дурсса чІумуву биттур баву. Дуллалимунин щак бикІан къааьркиншиву, багъсса кІанай махъгу къянкъану учин аьркиншиву, аьркинний ярагъгу ишла бан аьркиншиву, яла-ялагу къюлтІмур цІакъну ябан аьркиншиву:

«Къубил гава къутІ учайсса кІанайн къутІ увкуна.

– Ачу, лавай лахъу, Къубий, – увкуна Ибрагъимхалиллул.

– Нурислам чуври? – цІувххуна Къубил, къатлувун уххайхту.

– Ттухъхъун булунгу бучІиссар.

– Вихъхъун була къатІива.

– Ттуйнгу вихшала дусса.

– Духъунссар, амма чагъар танахъхъун була тІива.

– Ярч, нагу танал уссурахха? Жува цаннан ца къакІулсса инсантал-лув, Къубий?

– Ина танал уссугу да, Гъаруннул дусгу да, му ттун кІулли. Амма инагу шикку ушиву кІулнува, чагъармур таначІан чивчунни. Багъишла а: вичІа къабитан къахъунссар.

– Багъишлассарача, туну, ялугълагъу».

– Ва Къубин лакрал машгъурсса революционертал Гъарун Саэдовлу-цІа ва Саэд ГабиевлуцІа лархъхъусса къянкъашивугу, явкІмулшивугур. Укун дан дакъа, дитан дакъа, ятинну ливчІун шярайх уклай ивкІсса Къубил занакъулу шаврийхчІин къюкІсса зунттаву цІанну ливчІсса жулва халкъуннаву революциялул чулухунмайсса пикри-зикрилул занакъулушин, мийннаву аькълу-кІулли чантІ учаву Абачараша бюхъуну бур цалва къиссалуву аьлттуну ва аьчухну чІалачІи дан.

Къубил чІара-чІарахгу къиссалул лажинтирттая, бакІрая ччаннайн дияннийн, гъаз хъанай дур Гъарун Саэдовлулгу, Саэд Габиевлулгу, мийннан ка-кумаг буллай бивкІмийнналгу бивкІу бакъасса сипатру. Мийннал лагма-ялттугу кай-кай хъанай дур, нукІува кІицІ лавгсса

куццуй, революциялул шиннардий Лаккуй, мйяжа-мйяжаннугу, хъанай бивкІсса иширтгал суратру.

КІицІ лавгсса цимурца гъануну лавсун, ттуща дакІ дарцІуну бюхъ-анссар Абачарал «Арамтурал кІунттил ярагъ бувгъуна» тІисса кысса лакрал литературалувугу, тарихравугу тачІав бивкІу бакъасса произведенияр, куну учин. Шикку кІицІ къалавгун битан къабучІисса зат ца бур. Къисса къуртал хъанай бур:

«Цусса къини дуркІуна, хавардал хъунимий махъа най бия», – тІисса калималийну. Буккугу ттигу аавхъуна ялугъий ур, Абачарал «махъа нанисса хъунимий хавардаягу» ци-бунугу бусаннин. Умуд бур Абачарал жува ттигу хъунма хІаллай ялугъий къабитанссару тІисса.

Ларай кІицІ ларгсса чичрурдачІа, къалиправу калпушрал кунма, жужраву ца цинма лайкъсса кІану бугълай бур Абачарал «НакІливух оь хІала буххаву» тІисса къиссалулгу. Къисса чивчуну бур, дявигу къуртал хъуну, инсантал, агъалийгу цайхва цивппа хъуну, щархъаву колхозиртгаву оьрму цІулаган буллалисса чІумуя. Къиссалувусса ишру хъанай бур архсса зунттавусса Хъударщиял шыраву. Чансса бакъар шыраву, колхозрал лагма лавгун, дакІмарцІну захІмат бихълахъисса колхозниктал. Колхозрай хъуннав, районналий хъуннав каялувшиву дуллалимийннал хІарачатрайну зунттаву хъу-лухччинул ссуусукъусса Хъударщиял колхозран бабаюртуллал зоналий къутаннай ряхт-туршрахъул гектарду целинный аьрщаралгу ларсун, колхозниктурал маэшат лавай хъуну, къама бичинсса кІанттурду бакъа бур. Думур аьрщарая колхозрал диялсса дучІия ласлай бухъурчагу, шыраваллил-мур социальныйсса оьрмулуву цукунчІавсса дахханашивуртту хъанай дакъари. Мунин сававнугу хъанай дур колхозрай каялувшиву дуллалимийннал бажар, нукІувамуних бурувгун, колхозниктурал маэшат чансса лавай шавугу цІакълин дургъуну, хІалли-хІаллих тІий, цала-цала ва цалва мачча-гъаннал чулухунмай бурган баву, колхозрал хъус дацлай, дахлай, тили-хъили дуллалаву. Му бувчІусса колхозникталгу, чара бакъама шырава чунчІав къагъарчангу, чара бума, колхозрал хъунимийннал дуллалисса къача-къучшивуртту духІан къахъанай, миву-тивун шагъурдайн бивзун лаглай бур. Шыравува ливчІимийгу мува сававрай гъаралу лирну нанисса бакІлахъиялулсса бан буклай бакъари.

– Ттуща, – тІий ур районналул вакил Рафиь Дамаданов Хъударщиял колхозрал председатель Тажуттиннухъ, – вил хІухчалт, дояркахъул, къуллугъчитал, тамансса колхозниктал, колхозницахъул оьккину зий бур учин къахъунссар. Амма жагъилтал МахІачкъалалий портраву, Каспийскалий, цаймий шагъурдай заводиртгаву зун циванни лихълахъисса? Цанни вил цаппара зузалтрал, хаснува жагъилтурал, цаймий кІанттурдай кунма, бархІ даврихъун къабуллалисса? Вин му савав лякъингу тачІав дакІнин багърив?

Вай бакъарив, туну, хаснува жулва миллатрал дянив лахъхъугу, хІакъинугусса яла хъунимий суаллугу, масаларттугу? КІантту-кІанттурдайсса бикІу, республикалийсса бикІу хъунимийннал, вай суаллу цил чІумал гъазгу бувну, цил чІумал мийннун жавабругу ляркъуну диркІссания, бюхъайссия, вай жулва лакрал шархъавусса эяллайн я щувкун, хІакъину жунна аѳІаву къалачІлангу.

Лакрал литературалува ва масалагу цалчин гъаз бувну бур Абачарал. Вагу дикІуча Абачарал миллатрайсса дакІцІуцІаврил ца барашинна.

Къиссалува Абачараша бюхъуну бур фермалийсса оьллу лахъан буву Къурбаннулгу, муна ччисса доярка АтІалгу, АтІал уссу – колхозрал завхоз Салманнулгу аралува усттарну лап ччанарккусса, цалнияр цал чІуллалисса, учиннуча, тарсъсса къарщишиннагу дагъан дурну, лапва усттарну му тарсъсса ччанакрулул кІутІ ттиреххин бангу. Буккугу, гъала, тти ци шайрив, гъала, ссайн буккайрив, гъала, ссайну къуртал шайрив, тІий, лажинналул хъирив лажин къисса къюлтІатІи увну.

Къурбан – дакІ-ттиликІгу тІайласса, давричІагу хІарачат бусса, жяматрал хъуслил махъгу цІакъну ацІайсса зузала. Салман – колхозрал иширттаву бажар бушивугу, колхозралгу, районналулгу, гихуннай микку-тикку шархъавуссагу хъунимийннал хъхъичІсса авторитетгу цІакълин дургъуну, дирирмур расуруллагъ тІисса чяпахъаннучий. Мий кІирагу цІарал хъапа-шапалувун биривсса АтІагу – Салманнулгу ссу, Къурбаннулгу – буцай душ.

Вана Къурбаннул ва АтІал дянивсса ихтилат:

– Къакъаччан бикІаннача, бусила, лажинни, вил иттах га (Салман. С. Къ.) цукун чІалай ур?

– Ина на багъишла а, учІи акъу ур.

– ХІатти цир? Ттул уссу куна, сахаватлусса, узданну чин ччатІ бишайсса, цама акъассар.

– Вагъ, мунихун багъарча, ганал ххуйми чулухалурду мунияр ялттусса цаймигу дурхха. ДавричІа ганал хъапа гъалбурцІил бур. Аьркинма цахухва гъан ан, усттар га ур. Масала, дукІу оьинтту на Бакреслив яттичІа уссия. Леххаврий увкІсса председателнак Хасаврайн Салманнуйн оьвкуна. ЧувчІав къаляхълахъисса комбикормалул ацІния ххюра тонна шамулку къини гилу хъуна.

– Туну учІиакъу га ссалли?

– Ина бура, ганал кунма узданну, цаманал ччатІ къабишайссар, тІий. Щил ччатІ? Вил, ттул, жяматрал ччатІ цана аьркиннан. Циван мяш хъувияр!

Бургияра лагма-ялтту. Чансса бурич ттигу, зулва ччатІгу зулва хъхъичІ бихълай, хъин сахаватлутал хъуну, заназисса къичи-къучитал. Чансса бурич цалва биялагу, кагу дияйссаксса, цашава бюхъайссаксса жяматгу хъамала бувну, мийннал оьгту-ттурчІай сикригу ятІул-кІири

дичин дурну, ялурхъяврин мийннал хъхьичІун бувккун, марці лачІал чІаллу хъуну, махъругу лахълахъисса къакъа къуллугъчий – мафиозтал?

– Агарда багъайкун правлениегу, колхозникталгу зурча, жушава, – тІий ур гихунайгу Къурбан, – циняннан укра дукра дукай столовая, яслирду, оърчІансса багъру бан хъунтІиссия, къужран пенсияртту бишин хъунтІиссия.

Гъай-гъай, мийгу хъунтІиссия, мийннуцІун ци-цигу хъуни-хъунисса давурттугу дан хъунтІиссия, инсантурайхгу ва хІакъинусса къини къадуккантІиссия, оърмугу арулла даражалул лавай хъунтІиссия, агана колхозиртталгу, районналгу, республикарттал хъунимийнналгу, къавда аькълурдал лякъри дуруххан дуресса паччахІтуралгу, цалва-цалвасса байсса кунма, халкъунналссагу байсса бивкІссания.

Шиккугу Абачара буккул хъхьичІун бия тІар, бакъая тІар тІисса ялттувасса хавардучийну увккун акъарча, хъанахъимунил куртІнивун увххун, цимурца гъалакІу дурну, жура-журасса инсантурал жура-журасса хасиятру куннийх ку ришлаши дурну, мива художественный произведениялун аьркинсса чани ва цІугу, чІявучил илагъисса пикри-хиялгу, щяв къабагъайсса асардугу ялун личин бан бюхъайсса гъунар бусса, хъунасса чичуну увккун ур.

Ттул пикрилий, гихунмай къиссалул мурад буслан цичІав аьркиншин дакъари. Му бувккунан цанмагу бувчІинтІиссар ва хІакъину щалвагу жулва билаят хъюлчу-кІутІу буллалисса перестройкагу Абачарал ванияр 20-30 шинал хъхьичІра дайдирухъуну диркІшиву, аьрщарал реформалул, луртанналул программалул ва щяраваллил социальныйсса оърмулун масаларттугу аькъилсса паччахІ – министрталгу, пІуй-гъуй тІисса пІартІийный секретарталгу, аьрщарацІатугу бувцуну, ссурулух лехлахисса чІумалва гъаз булла ивкІшиву.

КІицІ лавгсса къиссарду бакъассагу Абачарал чивчуну бур тамансса хаварду ва очеркругу. Ттул пикрилий, миІ гъарцаннуй ацІлан аьркиншиву дакъахъунссар. АвцІунугу, лавай кІицІ лавгмунийн, сайки, цичІав ххибан къахъунссар. Цан бакъача, нукІува кІицІ лавгсса куццуй, Абачара чІивиссаннугу, хъунасаннугу вава Абачара ур – дуллалимур цидухъурчагу оьгу, нягу, жангу хъхьирцІуну, ялун усттаршиву ва гъунаргу къюча бишин бувну дувайсса, ягу дурагу къадурну, тийнай ацІайсса.

60-ку шиннардий Абачарал чичулмур къалам куямур канихъхъун буллуну (ттигу аьркин багъарчагу тІий, экъива къаливчуну), урчІамур канил бугълай ур аьлимчунал перо. Аьлимчушивугу миллатрая ятсса, тий-ший дарцІусса дакъарча, гъаманки, миллатраха мунил литературалуха ва тарихраха зузисса дур. Абачарал, щархъавух, шагърурдайх уклай, бавтІуну бур цикссагу халкъуннал балайрду, лакрал халкъунначІан зана бунни халкъуннангу, заманалунгу хъама бивтсса ххаллилсса аьлимчу-просветитель Оьмархъал Аьбдулла, нукІу заманнул ххаллисса

шаэртал Къяхахъал Оьмахан, Гузунхъал ХIасан, Гъумучиял ПатIимат, Бархъаллал Маллай, Ккурккуллал Зайду, ЧукIундалав, сагъну уна, хъа-ма итавай ливчIсса Закухъал Курди. Вай цинявннал оьрмулия ва творчестволия Абачарал чивчунни элмийсса статьярдугу. Чивчунни цикссагугу ттизаманнул шаэртурал творчествовдугу ахттар дигълагъисса статьярдугу.


Вай цимурцаннул чIарав дишингугу лирчIунни утти Абачарал чирчусса лакрал ва Дагъусттаннал литературардугу ахттар дигълагъисса кандидатский ва докторский диссертациярдугу цаха зий, цив щаллу дуллайгугу, сайки, ца инсаннал оьрму лагайсса.

Укун дакI-аьмалгугу ххуйсса, захIмат бишингугу ххирасса, миллатрайгугу дакI цIуцIисса ур жула ххирасса чичу ва аьлимчу ХIусайнахъал Абачара. Абачарал дурсса вай цимурца цачIу дирхъуну, хIисав ларсукун, жунмагугу чIалай бур арулцIалла шинал оьрму къачIивисса манзил бушиву. Ххуллу цуксса битарчагугу, ци захIматшивуртту ккаккарчагугу, Абачара цIанакулгугу оьрмулугу, творчестволугу кIилчинмур аргъираву ур. Цала ца шеърилуву Абачарал увкуну бур:


**Дуван чIярусса дуссар,
На даймур щил дувайссар.
Лахъан буржру хъуниссар,
Ттухлу мий щил лахълайссар.**

Мяйжаннугу, Абачарал данмур щилчIав къадантIишиврийн мукIругу хъуну, жувагугу чIаучинну жуна ххирасса шаэрнан дуван думургу дансса, дакIнин ччисса мурадрайнугу иянсса цIуллушиву ва тIайлабацIу.





Индекс годовой 63334
Индекс полугодовой 73894



НОВОЛУНИЕ
На лакском языке